

## Tti Joinchehe Nirepresentanté Jesucristo

### *Are Jesús ndaĉho ixin tsí Espíritu Santo*

<sup>1</sup> Ngain saho librona janha cjin na para ixin jaha, Teófilo, cainxin tti joinchehe Jesús co cainxin tti cjoago Jesús desde nchanho are jehe coexinhi cjoago <sup>2</sup> hasta nchanho que jehe sacjoi para ngajni. Co antes que Jesús sarrocji ngajni, jehe coinchié co coetonhe nirepresentanté jehe conixin joachaxin que chonda Espíritu Santo. Jehe Jesús coetonhe na de ixin queĉén sinchehe na. <sup>3</sup> Co después de ndavenhe co xechon, jehe ĵago ngain cain chojní jehe. Co ngoixin cuarenta nchanho Jesús joinchehe tsje cosa para que chojni mé vintte na seguro que ixin jehe cjan jichon iná. Co vandaĉho ngain na de ixin queĉén ttetonha Dios.

<sup>4</sup> Co Jesús, are ĵa vehe ngain na, coetonhe na ixin rrochonhe na ngain ciudad de Jerusalén. Co ndaĉho ngain na:

—Chonhe ra hasta tsoenja tti ndaĉho Ndodana icha saho, inchin janha ondaĉhjan nganji ra cai.

<sup>5</sup> Ndoa que Juan joincheguitte chojni conixin jinda, pero ntthi quejanhi nchanho jaha ra siguitte ra conixin Espíritu Santo.

### *Are Jesús sacojín para ngajni*

<sup>6</sup> Co are Jesús ĵa vehe ngain na, jehe na joanchianguihi na co ndaĉho na:

—Soixin, ¿arato jihi, rrochjehe chojni Israel joachaxin para tsetonha ngain nonttehe iná?

<sup>7</sup> Co Jesús ndačo ngain na:

—Jaha ra xonhi joachaxin chonda ra para rrochonxin ra quesá o quehe hora Ndodá na sinchehe Ndo cosa jihi ixin jehó jehe Ndo chonda Ndo joachaxin para sinchehe Ndo cosa jihi. <sup>8</sup> Pero are tsí Espíritu Santo nganji ra, jaha ra rrochonda ra joachaxín Dios co mexinxin sačhjexin ra de nttihi co rronichja ra de ixin janha. Co jaha ra rronichja ra nttihi ngoixin Jerusalén, cottimeja satsji ra ngain ngoixin nonttehe Judea, co ngoixin nonttehe Samaria, co hasta cain lugar que jí icha cjin de nttihi ngataha nontte.

<sup>9</sup> Co are Jesús joexin ndačo cain yá, cain representanté jehe tatetsjehe na quexén saccoajín Jesús are sacjoi para ngajni. Co are onoi joiiji, joí ná ttjoi cjoanotaon co iviconha na. <sup>10</sup> Xa tatetsjehe na para ngajni ixin ttinó saccoajín Jesús are cononxin ngaca na yó xí tengá lontto roa <sup>11</sup> co ndačo cayoi xí mé ngain na:

—Jaha ra chojni Galilea, ¿quedonda tatetsjehe ra para ngajni? Xajeho Jesús que sacjoixin de nganji ra rrocjan tsí iná inchin are jaha ra vicon ra sacjoi.

*Are coinchiehe na Matías para vehe ngain lugar de Judas*

<sup>12</sup> Cottimeja cain nirepresentanté Jesús sacjoixin de ngagaha tti jnanchjan que dinhi Jné Nttaolivo, co sacjan na para ciudad de Jerusalén. Co jna mé anto chiaon jí jna de ngain Jerusalén inchin ley Israel tajanda chojni para sattji ngain nchanho que nchejogaha ni. <sup>13</sup> Co are joiiji na

ngain nchia tti vintte na ngain ciudad mé, jehe na coani na yoxin piso tti jehe na vintte na. Co de cain na vehe Pedro, Jacobo, Juan, Andrés, Felipe, Tomás, Bartolomé, Mateo, iná Jacobo xenhe Alfeo, Simón tti vaquetocaho gobierno romano, co Judas xenhe Jacobo. <sup>14</sup> Cain chojni mé vaʒatte na para vanchecoanxinhi na Dios conixin cain xanchó Jesús xanxí, co María, janné Jesús, co icha nanita cai.

<sup>15</sup> Ná nchanho tiempo mé nttiha vintte inchin ciento veinte chojni co Pedro vingattjen ngayé na co ndačo ngain na:

<sup>16</sup> —Tsjexin ra hermanos, chonda que joiconhe tti joindačo Espíritu Santo ngain David co jehe dicjin ngain tti jítaxin Palabré Dios. Ndačo nttiha de ixin Judas tti ndačo para quexén tse na Jesús co sajoicao na. <sup>17</sup> Judas vacji nganji na janha na, ixin jehe vechonda ʒajeho ʒa que janha na techonda na. <sup>18</sup> Pero conixin tti tomi que cjoenguehe na hna para ixin tti jianha que jehe joinchehe ngain Jesús, coehna ná nontte. Co nttiha Judas cjoico cjoixin já ngataha nontte mé co ʒhintaon cuerpoe co vačhje cain tti jiringa. <sup>19</sup> Co are cain chojni que vintte ngain ciudad de Jerusalén conohe na ixin jamé conhe, jehe na joincheguinihi na nontte mé Acéldama, ixin ngui-goehe hebreo, pero rročo ʒajeho Jnguihi Jni. <sup>20</sup> Ixin ngain libroe Salmo David ndačo janhi:

Chonda que sittohe nchiandoha jeha nchia,  
co ʒonhi chojni sintte ngaxinhi nchia.  
Co ndačo cai:

Iná chojni rrochonda tti ʒa que jehe vechonda.

21 'Co nttihi ngayá na te xí que vacjinho na cainxin tiempo are Jesús vehe nttihi nganji na 22 desde nchanho que Juan joincheguitte Jesús co hasta nchanho are Jesús sacojín para ngajni. Mexinxin chonda que ná de xí mé sehe nganji na para rrondache icha chojni ixin jehe seguro vicon ixin Jesús xechon después de ndavenhe.

23 Cottimeja coinchiehe na yó xí de nivacao na ngain cain nchanho mé. Ná vinhi José co cai vaguinhi Justo co Barsabás. Co yoxin tattita vinhi Matías. 24 Co are joexin coinchiehe na cayoi xí mé, joinchecoanxinhi na Dios co ndačo na:

—Soixin que chonxin ansén cainxin chojni, tjagohna na ra quexehe de cayoi xí tehe soixin ocoinchiehe 25 para sinchehe xá soixin inchin xa que vanchehe Judas. Pero jehe joinchetján xa mé ixin joinchehe jianha co jaxon jí ngain lugar tti jiquinixin sehe.

26 Cottimeja vantsje na suerte co suerte mé vit-totaon tattita vinhi Matías. Co rato mé jehe Matías vehe conixin ittejngo representanté Jesús.

## 2

### *Are Espíritu Santo joí ngain chojni que vaguitticaon Jesús*

1 Co are joí quiai dinhi Pentecostés, cainxin chojni que vaguitticaon Jesús tate na ngain nacoa lugar. 2 Co rato mé coinhi na ná ruido anto soji que joixin de ngajni, inchin are tja čhintto soji. Jamé vařoin ngoixin ngaxinhi nchia tti texinhi na. 3 Cottimeja vicon na tsje neje xohi, co joí naná neje xohi mé ngataha cada na. 4 Co Espíritu Santo

joixinhi cuerpoe cain na conixin joachaxin. Co jehe na coexinhi na nichja na oje nguigoa inchin Espiritu Santo joinchenichja na.

<sup>5</sup> Co tiempo mé nttiha vintte tsje chojni judío ngain Jerusalén que joixin de tsje nación ngoixin mundo. Co chojni mé anto vaguitticaon ley Israel co cjoí ngain Jerusalén para joinchesayexin Dios inchin ndačo ley mé. <sup>6</sup> Co are coinhi na ruido ngain nchia mé, anto tsje chojni mé xatte nttiha. Co ni inoenco na quehe rroxaxaon na ixin naná na coinhi na nguigoehe na tenichja entre cain chojni que vaguitticaon Jesús. <sup>7</sup> Co tavinttetsjecoa chó na co vinttegoan na admirado. Co ndache chó na:

—Pero cain chojni que tenichja janhi; ¿jehe na ajeha de nttihi nonttehe Galilea na na? <sup>8</sup> ¿Quehe jitonhe? Cain ján na tettinhi na tenichja na ojeje nguigoaha na cada na. <sup>9</sup> Nttihi ngayá na te chojni que joixin de Partia, Media, Elam, Mesopotamia, Judea, Capadocia, Ponto, co de ngain nonttehe Asia, <sup>10</sup> de Frigia, Panfilia, Egipto, co cai te chojni que joixin de lugar ngain Africa que jí icha ndaha de ciudad de Cirene. Cai tsje chojni romano te nttihi. Co de cain chojni romano, canxion na goan na chojni judío, co icanxin na goanha na de razé chojni judío pero ditticaon na religioen chojni judío. <sup>11</sup> Cai jí chojni que joixin de Creta, co Arabia. Pero cainxin na ján na tettinxin na tti ndačo jehe na ixin nichja na de ixin tsje cosa jian que Dios nchehe co nichja na cain ojeje nguigoaha na ján na.

<sup>12</sup> Co vinttegoan admirado cain chojni mé co noeha na quehe xaxaon na co joanchianguihi chó

na, co ndaĉho na:

—¿Quehe rroĉho cain jihi?

<sup>13</sup> Pero icanxin na cjoanoa na na co ndaĉho na:

—Ixin diguinttecoan chojni yá, mexinxin jañá teĉho.

*Tti nichja Pedro ngain chojni*

<sup>14</sup> Cottimeja Pedro conixin ittejngo representanté Jesús vingattjen co Pedro nichja sén co ndaĉho:

—Chojni de nonttehe Judea co cainxin chojni que te ngain ciudad de Jerusalén, tonoha ra co ttinhi ra jian tti rrondattjo ra. <sup>15</sup> Xí tehe dicoanha xa inchin jaha ra ŝaxaon ra, ixin jaxon ŝa ndoyo; nandá las nueve. <sup>16</sup> Tti jaha ra vicon ra jaxon, jihi tti ondaĉho profeta Joel are nichja co ndaĉho:

<sup>17</sup> Dios ndaĉho: ngain tiempo are ochiaon ndat-sjexin mundo,

rrorroanha Espíritu Santo ngain cainxin chojni.

Co chjan sayé joajnana para rrondache xan icha chojni de ixin janha,

co janha sinttaguicon xanxí co xannĉhí tsje cosa ŝá are toxinxin xan.

Co cain chojni que ojonchjan tsoxinxin tsje cosa de ixin janha.

<sup>18</sup> Rrorroanha Espíritu Santo nchanho mé ngain cain ninĉehe ŝana.

Co jehe na sayé na joajnana para rrondache na icha chojni de ixin janha.

<sup>19</sup> Co de ngajni noi tsjagoa na tsje cosa que vaguiconha chojni are saho.

Co ngataha nontte tsjagoaxin na tsje señal.

Tsjagoa na jni, ŝohi co ttjoi de joxon jihnchin.

<sup>20</sup> Are mé nchanho isinchengasanha co ndatsontie,

co conittjao ndarroccjan va inchin jni.

Cain yá tsonhe saho; cottimeja tsí nchanho are Jesús rrocjan tsí ngataha nontte,

co tsjago ngain cain chojni joachaxin que jehe chonda.

<sup>21</sup> Co cainxin chojni que nichja jian de ixin Jesús, tti chonda cain joachaxin, ngain cain chojni mé jehe sanjo iná vida naroa.

<sup>22</sup> Cai Pedro ndačo:

—Ttinhi ra řo jaha ra chojni Israel, tti rrondačhjan: Janha nichja de ixin Jesús tti joixin rajna Nazaret. Dios cjoagoha ra ixin jehe coinchiehe Jesús are chjé jehe jie joachaxin para joinchehe tsje cosa jian co para joinchehe tsje milagro, co para joinchehe tsje señal inchin jaha ra onoha ra. <sup>23</sup> Co anto icha saho Dios

ochonxin ixin jaha ra sinchehe ra nchaoha ngain Xenhe. Co ndoa, jaha ra tse ra Jesús co joinchecrienhe ra ngá rá chojni jianha. Co jehe na joinchecrucificá na Jesús ixin jaha ra joinao ra. <sup>24</sup> Pero Dios joinchexechon Jesús. Dios vantsje jehe de ngain tti nindadiguenhe ixin Jesús čoha sittohe ngayé nindadiguenhe. <sup>25</sup> Jańá conhe ixin Jesús joinchenichja rey David co ndačo:

Janha cainxin nchanho chonxin ixin Dios jí nganji janha.

Jí ngain lado jian na para que řonhi cosa sincheřaon na.

<sup>26</sup> Mexinxin ansenna anto čhjoin tonohé, co neje na nichjaxin palabra jian ixin anto chahna.

Mexinxin masqui cuerpona ndasenehe, pero janha  
 xonhi rroxagoan

<sup>27</sup> ixin soixin tsinttoeha almana ngain lugué cho-  
 jni ndadenhe,

ni sanjoha joachaxin para rroxantte cuerpona  
 janha tti nttaha xá soixin ixin soixin anto  
 rinao na.

<sup>28</sup> Cjoagohna na nttiha que danjo iná vida nara.  
 Co anto rrochahna are janha sicon soixin.

<sup>29</sup> Co Pedro joinchehe sigue nichjé chojni co  
 ndačo:

—Janha ndattjo ra ndoa ixin David ndogoeli-  
 toa na ndavenhe co xavá. Co lugar tti jehe  
 xavá, mé xa jí jai. <sup>30</sup> Pero David cjoí ná profeté  
 Dios co nichja lo que Dios cjoagoe, co venohe  
 ixin Dios ndačo ngain jehe ixin ná de xanntí  
 xančhjen rrojiguehe xan rey inchin David co jehe  
 rey mé Cristo. <sup>31</sup> Mexinxin osé tiempo vatto David  
 chonxin quehe siconhe ngain Cristo. Co jehe  
 nichja ixin quexén rroxechon Cristo. Co ndačo  
 ixin almé rroguittoeha nttiha tti dittohe cain nin-  
 dadiguenhe ni cuerpoe rroxantteha. <sup>32</sup> Co ján Dios  
 joinchexechon jehe Jesús, co cain janha na vicon  
 na que Jesús ndoa xechon. <sup>33</sup> Co jehe saccoajín para  
 ngajni co jí ngain lado jian de Dios. Co jehe Ndo  
 chjé Ndo Jesús joachaxin para rroanha Espíritu  
 Santo inchin jehe Ndo ndačo Ndo. Co Jesús  
 rroanha Espíritu Santo nttihi, co Espíritu Santo mé  
 tti nchehe cosa jiji que jaha ra dicon ra co ttinhi  
 ra. <sup>34</sup> Ixin jeha David tti sacjoi para ngajni. Ixin  
 David ndačo:

Tti Ttetonha ndačo ngain tti Ttetonna:

“Darihi ngaca lado jian na,



35 hasta que janha sinttagacha jaha de ngain cainxin tti ningaonha.”

36 Mexinxin cainxin chojni ngain nación Israel chonda que tsonohe na seguro ixin Jesús, tti jaha ra coenganito ra cruz, Dios ndačo ixin jehe Jesús chonda cain joachaxin para ixin ján na, co jehe mé Cristo.

37 Co are jehe na coinhi na cain tti ndačo Pedro, anto coá na joachjaon co joanchianguihi na Pedro co icha representanté Jesús co ndačo na:

—¿Quehe nchao sinttaha na?

38 Cottimeja Pedro ndačo ngain na:

—Ttentoxinhi ra vidá ra ngattoxon con Dios, co diguitte ra cada ra de ngain nombré Jesucristo para que sitjañaha ra cain tti jianha que joinchehe ra. Co jamé Dios rrorroanha Espíritu Santo nganji ra, 39 ixin Espíritu Santo jí para ixin jaha ra, co para ixin xanha ra, co cai para cainxin chojni que te cjin, rročo para cain chojni que sinao sayé Dios.

40 Conixin palabra jihi, co icanxin icha palabra, Pedro nichjexin na, co ndačo ngain na:

—Ncheha ra inchin tenchehe cain chojni jianha que sinchetján almé na, co nchehe ra cosa jian para que rrochonda ra iná vida naroaxin.

41 Co cain chojni que vitticaon tti ndačo Pedro, jehe na joiguitte na. Co nchanho mé inchin ní mil chojni coexinhi vitticaon Jesús co joiguitte na. 42 Co cain chojni mé vaguitticaon na jian co vanchehe na inchin vacjago nirepresentanté Jesús. Co vaguitticaon chó ná, co vanchecoanxinhi na Dios co vařatte na cain na para vajine na tti niottja que dinhi Santa Cena.

*Vidé chojni que vitticaon Cristo tiempo mé*

<sup>43</sup> Conixin joachaxin que Dios chonda, nirepresentanté Jesús joinchehe na tsje milagro co tsje señal, co cainxin chojni goan na admirado. <sup>44</sup> Co cainxin chojni que vaguitticaon Jesús anto vagoan na unido co vacjenguijna chó na čhjoin. <sup>45</sup> Co coexinhi joinchecji na cosé na co vaconchjea na tomi ngain nivagondehe. <sup>46</sup> Nchanho co nchanho važatte na ngain nihngo icha importante. Co ngain nchiandoha na vanecaho chó na. Co cain na anto vaché na co ni ná na conoeha na orgulloso. <sup>47</sup> Jehe na vanchecoanxinhi na Dios. Co cainxin icha chojni ngain rajna vechonda respeto ngain cain na. Co cada nchanho Jesús, tti chonda cain joachaxin, vancheguitticaon icha co icha chojni.

### 3

*Ná tti rrengo xingamehe*

<sup>1</sup> Ná nchanho, Pedro co Juan sacjoi na nihngo icha importante ní hora tsocjin ixin hora mé hora para vanchecoanxinhi na Dios. <sup>2</sup> Co cainxin nchanho are mé, nttiha icanxin chojni vaguicao na ná tti xí rrengo desde que digoan. Cainxin nchanho vagaquehe na tti rrengo mé ngain puerté nihngo mé que dinhi Puerta que čhjoin Jí, para vaganchiagaha tomi ngain chojni que vaguixinhi nttiha. <sup>3</sup> Co are tti rrengo mé vicon Pedro co Juan tedixinhi na nihngo, jehe joanchiagaha tomi ngain na. <sup>4</sup> Cottimeja Pedro co Juan tsjehe na jian jehe tti rrengo mé, co Pedro ndačo ngain:

—Tsjehe nganji janha na.

<sup>5</sup> Co tti rrengo mé tsjehe jian ngain na, ixin  $\text{\texttimes}$ axaon puede rrochjé na čhoan cosa. <sup>6</sup> Pero Pedro ndačo ngain:

—Janha chondaha tomi para rrochjaha, pero lo que janha chonda rrochjaha jaha: ngain nombré co de ixin joachaxín Jesucristo, dingattjen co ttjixin rottea.

<sup>7</sup> Cottimeja Pedro tsehe rá tti xí mé lado jian co joinchengattjen, co rato mé cosoji cayoi rotté.

<sup>8</sup> Co tti rrengo mé čhinca co vingattjenxin rotté, co ocoexinhi sacjoixin rotté. Co sajoixincaho cayoi na ngaxinhi nihngo. Jehe jittjixin rotté co jičinca co jinichja jian de ixin Dios. <sup>9</sup> Cainxin chojni vicon na sacjoixin rotté co nichja jian de ixin Dios.

<sup>10</sup> Co cain chojni mé anto  $\text{\texttimes}$ aon na ixin que $\text{\texttimes}$ én conhe ixin cain jehe na chonxin na jehe tti xí mé co nohe na que jehe tti vaguehe ngandanguí tti puerté nihngo que dinhi Puerta čhjoin Jí para vaganchiagaha tomi.

### *Tti nichja Pedro ngain Portal de Salomón*

<sup>11</sup> Co jehe tti rrengo que ndaxingamehe vacataonxin Pedro co Juan. Co jehe sacjoi conixin Pedro co Juan ngain parté nihngo icha importante que dinhi Portal de Salomón. Co cainxin chojni goan na admirado co ttinga na cjoí na tti te canio nicanxion. <sup>12</sup> Pedro are vicon cain chojni nttiha, ndačo ngain na:

—Chojni de Israel, ¿quedonda doan ra admirado jaha ra? ¿Quedonda tsjena ni ra janha na, inchin janha na mero rrojinttaxingamá na xí jihi conixin joachaxin que janha na chonda na, o ixin janha na anto chonda na respeto ngain Dios? Jeha de

ixin janha na, <sup>13</sup> sino que Dios de ndogelitoa na xančhjen Abraham, Isaac, co Jacob, Dios mé tti chjé icha tsje joachaxin ngain Xenhe que dinhi Jesús. Co Jesús mé tti jaha ra cjoiho ra ngain Pilato. Co masqui Pilato joinao rrocanchjanda Jesús, jaha ra joinaoha ra. <sup>14</sup> Co jaha ra ndačho ra para rrocanchjanda na Jesús, tti Dios coinchiehe co tti joxon jian vanchehe. Sino que ndačo ra ixin icha jian para coanchjanda na ná chojni que vagoen icha chojni. <sup>15</sup> Co jamé ndagonhe ra chojni que danjo vida. Pero Dios joinchexechon chojni mé. Co janha na vicon na cain yá. <sup>16</sup> Co nombré jehe Jesús, o icha jian ndačhjan, tti confianza que janha na chonda na ngain jehe, mé tti joinchexingamehe xí jihi que jaha ra dicon ra co chonxin ra. Ján, seguro que ixin confianza mé tti joinchexingamehe jian xí jihi inchin jaha ra nchao dicon ra.

<sup>17</sup> Co janha onona are jaha ra conixin cain xittonha ra gonhe ra Jesús, noaha ra quehe joinchehe ra. <sup>18</sup> Pero Dios joinchehe jañá, inchin ondačo are icha saho ngain profeté que nichja lo que tti jehe Dios cjoagoe. Co jehe ndačo ixin Cristo chonda que rrojiguenhe. <sup>19</sup> Mexinxin ttentoxinhi ra vidá ra, co ditticaon ra Dios, para sitjañaha ra cain cosa jianha que nchehe ra. Cottimeja Dios nchao tsjenguijna ra para que jaha ra anto rroché ansean ra. <sup>20</sup> Co cai Dios rrorroanha Jesús, tti Cristo, ixin Dios coinchiehe jehe icha saho para que jehe tsjenguijna jaha ra. <sup>21</sup> Masqui jai Jesucristo chonda que tasehe ngajni hasta que tsí nchanho para Dios sinchekhjian jian cain cosa, inchin ndačo osé tiempo vatto ngain cain

xón que dicjin profeté Dios ngain tiempo mé.  
<sup>22</sup> Moisés ndačo janhi ngain nindogoelitoa na  
 xančhen: “Dios, tti chonda cain joachaxin, rror-  
 roanha nganji ra ná profeta que sačhjexin de  
 ngayaha ra, inchin jehe Dios rroaha na janha.  
 Ditticaon ra cainxin tti rrondattjo ra jehe mé.  
<sup>23</sup> Co cainxin chojni que sitticaonha, profeta mé  
 sintteha na ngain chojni Dios co ndasitján na.”

<sup>24</sup> Jañá cain profeté Dios desde Samuel co icha  
 profeta que joí después, nichja de ixin quexén  
 conhe tiempo jai. <sup>25</sup> Co jaha ra xanntí xančhen  
 de cain chojni mé. Mexinxin cain tti cjoagoe Dios  
 cain profeta, mé para ixin jaha ra. Co para tsjen-  
 guijna jaha ra, Dios joinchechjiancaho ná trato  
 ndogoelitoa na xančhen are Dios ndačo ngain  
 Abraham: “Co de ixin chojnia, janha sinttanchaon  
 cainxin chojni ngataha nontte jihi.” <sup>26</sup> Are Dios  
 joinchexechon Xenhe, rroanha Xan saho nganji  
 ra. Jañá Dios jointtanchaon ra para que tsinttohe  
 ra cada ra tti jianha que nchehe ra.

## 4

### *Are nittetonha ngain nihngo tse na Pedro co Juan*

<sup>1</sup> Pedro co Juan xa tenichja na ngain chojni are  
 joí canxion xidána conixin tti xittetonhe cain xisol-  
 dadoe nihngo icha importante conixin icanxin  
 xisaduceo. <sup>2</sup> Tedoñao xa ixin Pedro co Juan vac-  
 jagoe na chojni co vandačo na ixin chojni que  
 ndadenhe rroxechon na inchin Jesús oxechon.  
<sup>3</sup> Cottimeja jehe xa tse xa Pedro co Juan para sav-  
 iquixinhi xa na hasta tti ndoexin ixin nchanho

mé otsocjin. <sup>4</sup> Pero tsje chojni que coinhi tti ndačo cayoi jehe na, vitticaon na Jesús. Co de cain chojni que coexinhi vitticaon Jesús nchanho mé, jehó xí ovittja chiaon naho mil xa.

<sup>5</sup> Co nchanho yoxin xatte nttiha ngain Jerusalén canxion xivaquetonha ngain chojni judío, conixin canxion nivachonda joachaxin ngain nihngo co canxion ximaestroe ley Israel. <sup>6</sup> Co nttiha cai vehe ná xí vinhi Anás, mé xidána icha importante. Co nttiha cai vehe Caifás, Juan, Alejandro, co vintte cainxin ni ichó xidána icha importante. <sup>7</sup> Cottimeja rroanha na joajna para joiŕacoa Pedro co Juan. Co coín na Pedro co Juan ngosine para joanchianguihi na, co ndačo na:

—¿Quehe joachaxin chonda ra, o quensen chjá ra joachaxin para jaha ra nchehe ra cain jihi?

<sup>8</sup> Cottimeja Pedro, conixin joachaxín Espíritu Santo, ndačo ngain na:

—Soixin ra xó ttetonha ra ngain chojni Israel, co soixin ra xó chonda ra joachaxin ngain nihngo icha importante: <sup>9</sup> jai soixin ra danchianguiha ra ixin quexén cjoenguiha na ná tti rrengo co quexén jointtaxingamá na. <sup>10</sup> Rrondačhjan na ngattoxon con ra, para que tsonohe cainxin chojni Israel ixin xí jihi que jí ngattoxon con ra, jehe xa xingamehe xa pero de ixin nombré co joachaxín Jesucristo tti joixin de rajna Nazaret. Co Jesucristo mé xajeho tti soixin ra joinchecrucificá ra. Co Dios joinchexechon jehe. <sup>11</sup> Inchin ndačo ngain tti jitaxin Palabré Dios de ixin Jesús: “Jehe mé tti xó que soixin ra, xó ttette ra nchia, joinaoha ra. Pero jehe goan tti xó icha importante de ngain

nchia.” <sup>12</sup> Ni ná chojni nchao rrochjá na ján na iná vida naroa, ixin Dios ndačo que xonhi iná chojni ngataha nontte jihi chonda joachaxin mé; jeho Jesús.

<sup>13</sup> Are cainxin nivaquetonha coinhi na tti nichja Pedro co Juan, jehe na goan na admirado ixin venohe na que Pedro co Juan venoeha xón jian, co ixin cayoi jehe na inchin chojni que xonhi chonxin. Pero masqui jamé, xaonha na para nichja na. Cottimeja vinttegatsoan na ixin cayoi nimé vacao na Jesús. <sup>14</sup> Co tti xí que joinchexingamehe Pedro co Juan nttiha tajingattjen ngayé na, mexinxin čhoha joinchecaxin na Pedro co Juan ni ná cosa. <sup>15</sup> Cottimeja coetonhe na Pedro co Juan vačhjeeyexin de ngain na co jeho na vittohe na nttiha para cjoao na ixin quexén sinchehe na. <sup>16</sup> Co ndačo na:

—¿Quehe sonttoho na ngain cayoi xí tehe? Cainxin chojni que te nttihi Jerusalén nohe na ixin cayoi xí tehe joinchehe milagro jihi. Co ján na čhoha rrondačo na ixin ndoaha. <sup>17</sup> Pero para tsonoeha icha chojni ixin quehe joinchehe cayoi xí tehe, ján na sonttoxaon na de soen na para que ixonhi chojni rronichjexin conixin nombré co joachaxín Jesús.

<sup>18</sup> Cottimeja vayé na Pedro co Juan para coetonhe na ixin čhoha rrondačo na ni tsjago na conixin nombré co joachaxín Jesús. <sup>19</sup> Pero Pedro co Juan ndačo ngain na:

—Xaxaon ra, soixin ra, ¿andačo Dios ixin icha jian jí si sitticanho na tti rrondačo ra soixin ra co sitticaonha na tti ndačo Dios, o ani nahi? <sup>20</sup> Janha

na čhoha tsinttoa na de rronichja na cain cosa que vicon na co coian na.

<sup>21</sup> Cottimeja cain xittetonha nichja xa icha para joincheñaon xa na, pero coančhanda xa Pedro co Juan para sacjoi, ixin xonhi razón vittja xa para rroquiaxinhi xa icha, ixin cainxin chojni nichja jian de ixin Dios are vicon na tti joinchehe Pedro co Juan. <sup>22</sup> Co tti xí que xingamehe de ixin joachaxín Dios vechonda icha que cuarenta nano.

*Nirepresentanté Jesucristo joanchiehe na Dios para que rrochjé na icha confianza*

<sup>23</sup> Are Pedro co Juan ocoančhanda na, cayoi jehe na sacjoi na para tti vintte tti icha nirepresentanté Jesús co ndache na cain tti ndačo cain xidána que vaquetonha ngain icha xidána, co cain nichonda joachaxin ngain nihngo. <sup>24</sup> Co are tti icha nirepresentanté Jesús coinhi cain yá, cain na joinchecoanxinhi na Dios, co ndačo na:

—Ndodana na, soixin tti Dios, tti joinchechjian ngajni, co nontte, co ndachaon, co cainxin cosa que jí. <sup>25</sup> Co soixin tti ndačo ngain Espíritu Santo para jehe joinchenichja xinchehe xá David. Mexinxin David ndačo:

¿Quedonda cain nación toñao nganji?

¿Quedonda cain chojni xaxaon cosa que xonhi xé?

<sup>26</sup> Cainxin xirey ngataha nontte co cainxin xittetonha coato chó xa

para tsetocaho xa Dios co para tsetocaho xa Cristo tti coinchiehe Dios para rey, jañá čo David.

<sup>27</sup> 'Co ndoa, ngain ciudad jihi Herodes, Poncio Pilato co chojni que joixin ojé nación, co chojni Israel coato chó na para coetocaho na Jesús, tti Xanha jian, tti soixin rroanha para ttjenguijna na.



<sup>28</sup> Jañá joinchehe na cainxin tti soixin ndaĉho are icha saho que chonda que rroguiconhe. <sup>29</sup> Co jai tsjexin, jehe na toñao na nganji na janha na co rinao na sincheĉaon na na. Mexinxin ttjenguijna ni ra para rroĉaonha na are rronichja na joajná soixin. <sup>30</sup> Co nttatsán na ñao soixin, conixin joachaxian ttjenguijna ni ra para sinttaxingamá na chojni nihi co para sinttaha na icha milagro de ngain nombré Jesús, tti Xanha icha jian.

<sup>31</sup> Co are joexin nichja na jañá ngain Dios, lugar tti te na nttiha coingui, co cain na chonda na tsje joachaxin de Espiritu Santo. Co joinchehe na sigue nichja na de ixin Palabré Dios sin joaĉaon.

*Cainxin cosa que vechonda ná na, cai cosé cain ni icha*

<sup>32</sup> Inchin ĉaxaon ná chojni que vaguitticaon Jesús ĉaxaon cain na, co ĉajeho conohe ngain ansén cain na. Ni ná na ndaĉhoĉa na ixin cosé na jeho para ixin jehe na, pero cain na ndaĉho na ixin cosé ná na cai cosé cainxin ni icha. <sup>33</sup> Co nirepresentanté Jesús joinchehe na sigue ndache na icha chojni ixin Jesús xechon. Co Dios vaganjo ngain na anto tsje joachaxin are vanichja na, co vanchenchaon cain na. <sup>34</sup> Co ĉonhi chojni que vaguitticaon Jesús vanchehe falta ná cosa ixin chojni que vechonda nonttehe o nchiandoha vanchecji na cosa que vechonda na co vaquiaho na tomi <sup>35</sup> co vaganjo na tomi ngain nirepresentanté Jesús. Co jehe na vaconchjeya na tomi mé inchin vagondehe ni icha para ĉhoan cosa. <sup>36</sup> Jañá joinchehe ná xí vinhi José co ndogoelitoe ĉanĉhjen vinhi Leví. Jehe joixin de ngain ná nontte ngosine ndachaon dinhi Chipre. Co

nirepresentanté Jesús joincheguinhí na Bernabé. Nombre yá rrocho tti nchegavanguehe ñao chojni. <sup>37</sup> Xí mé joinchecji xa ná nonttehe xa co joiaho xa tomi co joanjo xa tomi ngain nirepresentanté Jesús para ixin jehe na sanjo na tomi mé ngain chojni noa que vaguitticaon Jesús.

## 5

### *Cosa jianha que joinchehe Ananías co Safira*

<sup>1</sup> Pero vehe iná xí que vinhi Ananías, co Safira vinhi čihi xa. Xí mé co čihi xa joinchecji na ná nonttehe na cai. <sup>2</sup> Pero xí mé vittoehe xa ná tanto de tomi co jehó ttoha tomi joicao xa ngain nirepresentanté Jesús, pero ndačo xa ixin joicao xa cainxin tomi ngain na. Co čihi xa venohe cainxin. <sup>3</sup> Cottimeja Pedro ndačo ngain xa:

—Ananías, ¿quedonda jaha coančjanda Satanás para coetonha nganji jaha para joincheyehe Espíritu Santo, co vittoaha ttoha tomi que cjoengaxin na hna de ixin nontteha? <sup>4</sup> Nontte que jaha joinchecji nontteha. Co are ojoinchecji nontte mé, cainxin tomi tomia, para que jaha nchao sinchehe inchin jaha rinao conixin tomi mé. Nchao para jaha danjo cain tomi mé, ni danjo johó ttoha tomi. Pero jaha nchehe jianha ixin ndačo que ixin rridanjo cain tomi nontteha co ndoaha. Jeha chojni tti jaha rrittemehe tti ndoa, sino Dios tti jaha rinao tsemehe tti ndoa.

<sup>5</sup> Are Ananías coinhi cain yá, jehe vetsinga co ndavenhe. Co cainxin chojni que conohe na yá anto řaon na. <sup>6</sup> Rato mé joí canxion xanxí. Co jehe

xan mé coensiha xan cuerpoe Ananías co sajoicoa xan para cjoavá xan.

<sup>7</sup> Vatto inchin ní hora, cottimeja cjoí n̄hichihí Ananías cai. Co venoeha n̄cha ixin quehe conhe xixihí n̄cha. <sup>8</sup> Co Pedro joanchianguihi n̄cha co ndācho Pedro:

—Ndachjenji na, ¿ajoinchecjixin ra nontte inchin precio que jaha ra ndācho ra?

Co jehe n̄cha ndācho n̄cha:

—Ján, precio mé.

<sup>9</sup> Cottimeja Pedro ndācho ngain n̄cha:

—¿Quedonda ndache chó ra para ttema ra tti ndoa ngain Espíritu Santo? Nttimé ndoja joí n̄joicjavá xixiha. Co jai tsjiho na jaha cai.

<sup>10</sup> Co rato mé vetsinga n̄cha ngaca Pedro co ndavenhe n̄cha cai. Co are vinttequí xanxí que joicjavá xixihí n̄cha, vittja xan jehe n̄cha cai ondadiguenhe n̄cha. Cottimeja joantsje xan n̄cha co sajoicjavá xan n̄cha ngaca tti xavá xixihí n̄cha.

<sup>11</sup> Co cainxin chojni que vaguitticaon Jesús nttiha, conixin cain icha chojni que conohe cosa jihi anto x̄aon na.

### *Tsje milagro co señal joinchehe nirepresentanté Jesucristo*

<sup>12</sup> Co tiempo mé nirepresentanté Jesús vanchehe na anto tsje señal co milagro. Co cain chojni que vaguitticaon Jesús vāxatte na ngain parté nihngo icha importante que dinhi Portal de Salomón. Co nttiha vechondaxin na servicioe na. <sup>13</sup> Co icha chojni anto vechonda respeto ngain chojni que vaguitticaon Jesús pero vāxaon na vacji na servicioe na. <sup>14</sup> Pero masqui jamé, icha tsje chojni, xí co n̄hí vitticaon Jesús,

tti chonda cain joachaxin. <sup>15</sup> Co hasta cainxin chojni que vechonda ninihi vagantsje na tti nihi ngandehe nttiha ngataha cania o ngataha saon. Ixin vajinao na que are vagatto Pedro masqui cara jeho saoen vagattotaon jehe ninihi mé para vanchexingamehe na. <sup>16</sup> Cai tsje chojni vaquixin de icha rajna que vintte chiaon Jerusalén co vaquiaho na tsje chojni nihi co tsje chojni que veninxin espíritu jianha. Co cainxin chojni mé vaxingamehe na.

*Nittetonha ngain nihngo joiningaconhe na Pedro co Juan*

<sup>17</sup> Cottimeja xidána icha importante co cain xicompañeroe xa que dinhi xisaduceo anto vintteconchjoehe xa ngain nirepresentanté Jesús, <sup>18</sup> co tse xa chojni mé co coiaxinhí xa na ngaxinhí cárcel tti jí tsje chojni que joinchehe tsje cosa jianha. <sup>19</sup> Pero ná ángel de Dios conxiré puerté cárcel are tte co joantsje cain nirepresentante mé co ndačo ngain na:

<sup>20</sup> —Sattji ra ngain nihngo icha importante. Co nttiha ttequinhi ra cain chojni cainxin de ixin tti vida naroaxin que danjo Jesucristo.

<sup>21</sup> Co cain chojni Jesús vitticaon tti ndačo ángel. Co are vingasán joixinhi na nihngo icha importante co coexinhí na joinchecoenhe na chojni.

Co rato mé xidána icha importante co xicompañeroe xa coetonhe xa cain nivechonda joachaxin ngain juzgadoe na para xatte na. Cottimeja rroanha na xipolicía ngain cárcel para joixacoa nirepresentanté Jesús. <sup>22</sup> Pero are xipolicía joihi xa ngain cárcel, ivittjaha

xa nirepresentanté Jesús. Co sacjan xa para joiquetonhe xa xidána. <sup>23</sup> Co vinttendačo xa:

—Vittja na puerté cárcel jijé jian co cain xisoldado tatenda xa nttiha. Pero are conxirá na puerta, ixonhi chojni te ngaxinhi nttiha.

<sup>24</sup> Are xicapitén xisoldadoe nihngo icha importante co cain xidána que vaquetonha ngain icha xidána coinhi xa cain yá, anto joanchianguihi chó xa ixin quehe conhe, co quehe rročo cain jihi.

<sup>25</sup> Co rato mé joí ná xí co ndačo xa ngain na:

—Cain tti xí que jaha ra coiaxinhi ra, te xa ngain nihngo icha importante co tenchecoenhe xa chojni.

<sup>26</sup> Cottimeja tti xicapitén xipolicía cjoí xa conixin canxion xipolicía para joiaho xa cain nirepresentanté Jesús. Pero xonhi joinchehe xa ngain chojni mé ixin xon xa que puede cain chojni que te nttiha ngain nirepresentanté Jesús rrocaxin na xa xo. <sup>27</sup> Co are ojoiaho xa cain nirepresentanté Jesús ngain juzgado tti te xi icha, nttiha coengattjen xa cain na. Co xidána icha importante ndačo xa ngain na:

<sup>28</sup> —Janha na coetonha ra ixin itsjagoeha ra chojni conixin nombré co joachaxín Jesús. ¿Co quehe joinchehe ra? Ngoixin ciudad de Jerusalén joexin joinchecoenhe ra chojni tti jaha ra noha ra, co jaha ra nchecaxin ni ra ixin janha na gonhe na xí yá co rinao ra que chojni sitticaon na jamé.

<sup>29</sup> Cottimeja Pedro co cain icha nirepresentanté Jesús ndačo na:

—Janha na chonda que sitticanho na Dios saho que chojni. <sup>30</sup> Tti Dios de nindogoelitoa na

ʒančhjen joinchexechon Jesús, tti soixin ra co-eriahnda ra nganito ná cruz co nagoenxon ra. <sup>31</sup> Co Dios joinchecajinhi para ngajni. Co nttiha Dios coín ngain lado jian co chjé joachaxin para que jehe ttetonha cain chojni co para jehe danjo ngain na iná vida naroaxin. Co cai Dios chjé Jesús joachaxin para ttjenguijna chojni Israel tsentoxinhi vidé na co para ixin Jesús sinchetjañehe na cain cosa jianha que nchehe na. <sup>32</sup> Co cain yá janha na vicon na, co cai Espíritu Santo tjago ixin ndoa conhe. Co Dios rroanha Espíritu mé ngain cain chojni que ditticaon ngain jehe Dios.

<sup>33</sup> Co are coinhi na cain yá, coñao na co joinao na narrogoenxon na na. <sup>34</sup> Pero ngagué cain chojni que vechonda joachaxin nttiha vehe ná xifariseo vinhi Gamaliel, co xí mé vanchecoenhe xa icha chojni quehe vaquetonha ngain ley Israel. Co cain chojni vaʒaxaon na anto jian de ixin xí mé. Co vingattjen xa co coetonha xa vantsjeyexin na nchion rato cain chojni Jesús. <sup>35</sup> Cottimeja ndačo xí mé ngain cain icha chojni nttiha:

—Cain jaha ra ʒo xí Israel ra, ttjiho ra cuidado tti sinchehe ra ngain xí tehe. <sup>36</sup> ʒaxaon ra que ná tiempo vatto, joí ná xí vinhi Teudas, co ndačo xa ixin jehe xa anto importante xa. Co inchin nó ciento xí vaguitticaon co vacao jehe Teudas. Pero icha chojni vitticaonha co ndagoen Teudas, co cain chojni que vacao ndachjequé na, co ndajoexin cainxin. <sup>37</sup> Co cai icha después, are cjoinhi ná censo para vinttetaxin cain chojni, are mé joí ná xí de nonttehe Galilea que vinhi Judas. Cai ndačo xa ixin jehe xa anto importante xa, co tsje chojni vacao xa cai. Pero cai icha chojni

vitticaonha co ndagoen xa, co cain chojni que vacao xa ndachjequé na cai. <sup>38</sup> Mexinxin jaha ra icha jian tančhjanda ra cain xí tehe co dixintteha ra ngain xa. Ixin si cain cosa yá jehó xa tenchehe xa, chonda que ndatsjexin toin, <sup>39</sup> pero si Dios ndačo cain cosa yá, jaha ra čhoħa rrondačo ra ixin ndatsjexin. Mexinxin tančhjanda ra cain na para jaha ra tsetocħa ra Dios.

<sup>40</sup> Co cainxin na vitticaon na tti ndačo Gamaliel. Cottimeja vayé na cain nirepresentanté Jesús, vintja na na ixin nttá, cottimeja coetonhe na cain chojni mé ixin irronichjaha na conixin nombré co joachaxín Jesús. Cottimeja coančhjanda na na sacjoi na. <sup>41</sup> Co are cain chojni Jesús sacjoixin de ngain cain chojni ngain juzgado, anto ché na ixin Dios coančhjanda na para vetan na tangui de ixin nombré Jesús. <sup>42</sup> Co vaquinttoeha na de vacjagoe na chojni, ixin cainxin nchanho vanichja na de ixin Jesús ngain nihngo icha importante co ngain nchiandoha tsje chojni cai.

## 6

*Are coinchiehe na yáto xí para cjoenguijna nirepresentanté Jesús*

<sup>1</sup> Co tiempo mé, anto cotsje chojni que vaguitticaon Jesús. Pero chojni que vaguitticaon Jesús que vanichja griego nchion coñao na ngain chojni que vaguitticaon Jesús que vanichja hebreo. Ixin nimé ni vinttendačo na ixin cain nčhiganha que vanichja griego que vintte ngain na vacaha nča jian vane nča are vaconchjea na cada nchanho

tti vane cain chojni que vaguitticaon ngain Jesús.  
<sup>2</sup> Cottimeja tti tteyó nirepresentanté Jesús joatse cainxin chojni co ndačo ngain na:

—Nchaoha jí si janha na tsinttoa na de rronichja na joajné Dios ngain icha chojni jeho por ixin rrochjaha na tti sine na. <sup>3</sup> Mexinxin icha jian ttinchiehe ra yáto xí de ngacjan jaha ra, pero xí que ditticaon jian ngain Jesucristo, co chonda joachaxin de Espíritu Santo, co chonxin quehe rinao Dios. Co tti yáto xí mé ndache ra xa para sinchehe xa řa jiji. <sup>4</sup> Co janha na rrocjan na sinttacoanxian na Dios, co sinttacoán na icha chojni joajné Dios.

<sup>5</sup> Co cainxin na vitticaon na tti ndačo nirepresentanté Jesús, co coinchiehe na yáto xí. Saho coinchiehe na Esteban, tti anto vaguitticaon Jesús co tti chonda tsje joachaxin de Espíritu Santo. Co xí icha vinhi xa Felipe, Prócoro, Nicanor, Timón, Parmenas, co yatoxin xí vinhi Nicolás. Co jehe xa joixin xa de ciudad dinhi Antioquía, co icha saho xí mé coexinhi xa vaguitticaon xa religioen chojni judío. <sup>6</sup> Cottimeja joiaho na tti yáto xí mé para ngain nirepresentanté Jesús. Co jehe na joinchecoanxinhi na Dios co coín rá na ngataha já tti yáto xí mé para ná señal que cain xí mé coexinhi xa joinchehe xa řa para ixin Dios.

<sup>7</sup> Co ttinga icha tsje chojni coinhi joajné Dios ngain Jerusalén. Co icha cotsje chojni que vitticaon Jesús, hasta tsje xidána de ngain religioen chojni judío cai vitticaon xa ngain Jesucristo.

*Are coiaxinhi na Esteban*



<sup>8</sup> Esteban vachonda anto tsje joachaxin de Espíritu Santo co Dios anto vanchenchaon jehe Esteban. Co jehe Esteban vanchehe tsje milagro co señal ngattoxon con chojni. <sup>9</sup> Cottimeja jói canxion chojni de ná nihngo Israel que vinhi los Esclavos Libertados. Co cai icanxin chojni joixin de ngain ná rajna dinhi Cirene, co de ciudad de Alejandría. Co jói icha chojni cai que joixin na ná nación que dinhi Cilicia co icha chojni que joixin na nonttehe Asia. Cainxin chojni mé coexinhi na joinchediscutí na ngain Esteban. <sup>10</sup> Pero coixinha na ngain ixin Espíritu Santo anto cjoenguijna Esteban co cjoagoe jehe quexén nichja ngain chojni mé. <sup>11</sup> Mexinxin chojni mé cjoenguehe na hna icanxin chojni para ndacho ixin jehe na coinhi na nichja Esteban jianha de ixin Moisés co de ixin Dios. <sup>12</sup> Co jañá joinchehe na para joincheguitticaon na cain chojni, co cain nivechonda joachaxin ngain nihngo Israel, co cain ximaestroe ley Israel. Cottimeja cain na coñaohé na Esteban co tse na co joicao na ngain juzgadoe nihngo Israel. <sup>13</sup> Co cai cjoé na icanxin chojni que ndacho ixin Esteban nichja jianha, masqui ndoaha tti ndacho na. Co chojni mé ndacho:

—Jan, ndoa, xí yá anto nichja xa jianha de ixin nihngo icha importante co de ixin ley Israel. <sup>14</sup> Coian na ndacho xa ixin Jesús que joixin Nazaret sinchexantte nihngo icha importante jihi co tsen-toxinhi cain cosa que coetoan na Moisés sonttoho na.

<sup>15</sup> Cottimeja cain chojni nttiha tsjehe na Esteban. Co vicon na ixin jidaquín ngá con Esteban inchin ngá con ná ángel.

## 7

*Tti ndaĉho Esteban*

<sup>1</sup> Cottimeja xidána icha importante joanchian-guihi xa Esteban co ndaĉho xa:

—¿Andoa cain tti ndaĉho chojni jihi?

<sup>2</sup> Co Esteban ndaĉho:

—Soixin ra, ttinna ni ra tti rrondaĉhjan. Dios de ján na anto jian co ĵago ngain ndogoelitoa na Abraham are vehe ndo ngain nonttehe Mesopotamia antes que jehe ndo sacjoi ndo Harán. <sup>3</sup> Co Dios ndaĉho ngain ndo: “Ttinttohe nontteha co cain ni ĵa ichó, co sattji ngain nontte que janha tsjagoĥa.” <sup>4</sup> Cottimeja ndogoelitoa na Abraham vaĉhjexin ndo de ngain nonttehe Caldea co sacjoi ndo ngain nonttehe Harán. Co vehe ndo nttiha Harán. Cottimeja ndavenhe ndodé ndogoelitoa na Abraham, co Dios rroanha ndogoelitoa na Abraham ngain nontte jihi, tti ján na te na jai. <sup>5</sup> Pero Dios ĵa joanjoha ni rioho nontte nttihi ngain ndogoelitoa na Abraham. Pero Dios ndaĉho ixin sanjo nontte mé ngain xenhe ndogoelitoa na Abraham masqui ĵa vechondaha ndo chjan tiempo mé. <sup>6</sup> Co masqui jamé, pero Dios ndaĉho ngain ndogoelitoa na Abraham ixin xanntí ndo ĵanĉhjen sintte xan oje nontte que jeha nonttehe xan co ngain nontte mé tsochji xan ngain ĵa co icha chojni sinchehe feo ngain xan para nó ciento nano. <sup>7</sup> Pero cai Dios ndaĉho ngain ndogoelitoa na Abraham: “Janha rrochjaha castigo tti chojni que sinchehe feo ngain xannttia. Cottimeja jehe xan satsjixin xan de nttiha para sinchesayana xan ngain lugar jihi.” <sup>8</sup> Co are

Dios joinchechjian trato mé ngain ndogoelitoa na Abraham, Dios coetonhe ndo para chjá na ndo ná xöhe que dinhi circuncisión. Mé rrocho ixin cain chojni que chonda xöhe mé, chonda parte ngain trato mé. Mexinxin are concjihi xenhe Abraham, xanIsaac, co vatto jni nchanho de concjihi xan, Abraham chjé xan xöhe mé. Co xajeho jamé joinchehe Isaac después ngain Jacob, xenhe jehe Isaac. Co xajeho jamé joinchehe Jacob después ngain cain tti tteyó xenhe, tti xancjoi ndogoelitoe tti tteyó grupoe chojni Israel.

<sup>9</sup> Co cain xenhe Jacob mé, tti cjoi ndogoelitoa na xančhjen, conchjoehe na ngain José tti xanchó na icha nchín. Co jehe na joinhecji na xan ngain chojni que sacjoi ngain nonttehe Egipto. Pero Dios cjoenguijna José,<sup>10</sup> co masqui tsje cosa tangui conhe José nttiha Egipto, después Dios coančhjandaha José ngain cain cosa mé. Co Dios chjé jehe jian joarrixaon, co cjoenguijna José para que Faraón joinao jehe José. Faraón tti rey ngain Egipto co jehe rey mé chjé José anto tsje joachaxin para vehe gobernador de Egipto co vaquetonha ngain nchiandoha rey mé.

<sup>11</sup> Cottimeja vehe jintta ngain nonttehe Egipto co ngain nonttehe Canaán. Mexinxin anto tangui vehe para cain chojni ngoixin nontte mé. Co cain nindogoelitoa na xančhjen ivaguittjaha na tti vane na. <sup>12</sup> Pero are Jacob conohe ixin vehe trigo ngain Egipto, rroanha nttiha canxion xenhe, tti xancjoi ndogoelitoa na xančhjen. Co mé tti saho nttiha que cjoi xan nttiha. <sup>13</sup> Co hasta tti yoxin nttiha que joiqehna xan trigo nttiha Egipto, José

ndačo ngain xanchó ixin quensen jehe. Co are mé tti rey ngain Egipto conohe cai quensen nichó José. <sup>14</sup> Cottimeja José ndačo para jói ndodé José, ndoJacob, conixin cainxin nichó. Co cain jehe na vittja setenta y cinco chojni. <sup>15</sup> Jañá conhe para Jacob sacjoi Egipto, co nttiha vehe hasta ndavenhe, co cai nttiha venxin cain ndogoelitoa na xančhjen. <sup>16</sup> Co después xenhe sajoicao xan nttaloroé na ngain nonttehe Siquem para xavá nnta ngain cueva tti coenanxin Abraham conixin tomi ngain xenhe Hamor nttiha Siquem.

<sup>17</sup> 'Co are ochiaon jói tti tiempo para tsonhe tti ndačo Dios ngain Abraham, cainxin chojni Israel anto cotsje na ngain Egipto. <sup>18</sup> Cottimeja iná rey coexinhi coetonhe na nttiha. Rey mé vechonxinha José. <sup>19</sup> Co rey mé joincheyehe nindogoelitoa na xančhjen co anto feo joinchehe ngain na. Co jehe rey mé coetonhe nindogoelitoa na xančhjen que tsinttohe na xenhe na que nandá vagoan para ndasenhe xan. <sup>20</sup> Co ngain tiempo mé concjihi Moisés. Dios anto joincheoxinhi chjan mé. Co nindoha Moisés joincheganguixin na ngain nchiandoha na, ní conittjao. <sup>21</sup> Cottimeja chonda que cointtohe na para ndarroguenhe. Co nchanho mé ná nchichjehe rey vittja Moisés co sajoicao ncha para nchiandoha ncha co joinchegangui ncha Moisés inchin ná xenhe ncha. <sup>22</sup> Mexinxin Moisés coangui cain tti venohe chojni Egipto co jehe anto vechonxin para vanichja co cain tti vanchehe jehe, vanchehe jian.

<sup>23</sup> 'Are jehe ovechonda cuarenta nano, jehe xaxaon joitsjehe cain nirajné, tti chojni Israel.

<sup>24</sup> Co nttiha vicon Moisés ná chojni Egipto jitjáya

ngain ná chojni Israel. Co Moisés para cjoenguijna chojni Israel que jidicaon, Moisés nagoenxon chojni Egipto que jitjáya. <sup>25</sup> Jañá joinchehe Moisés ixin řaxaon que cain chojni Israel řajeho nirajné jehe. Co řaxaon ixin jehe na venohe na que Dios rroanha Moisés para santsjexin na de nttiha. Pero jehe na venoeha na mé. <sup>26</sup> Co nchanho yoxin, Moisés vetan yó chojni Israel que tetteto co jehe joinao ixin irroqueto na. Mexinxin ndačo ngain na: “Jaha ra de řajeho rajna ra, ¿quedonda tedonhe chó ra jaho ra?” <sup>27</sup> Cottimeja tti jidoen xicompañeroe conxinca Moisés co ndačo ngain: “¿Quensen coín jaha de juez co xinajni para tsetonha nganji na? <sup>28</sup> ¿Arinao nasoenxon na janha cai inchin nagoenxon ná chojni Egipto jna?” <sup>29</sup> Co are coinhi Moisés yá, sacoi ngain de nttiha co sacjoi ngain nonttehe Madián. Masqui jehe vechon nttiha, pero nttiha jeha nonttehe. Co nttiha vechonda yó xenhe xanxí.

<sup>30</sup> Vatto cuarenta nano. Cottimeja ngain rotté ná jna dinhi Sinaí, viconxin Moisés ná ángel de Dios ngacjan ná řohi. Co řohi mé jiche ngagaha ná canchaha. <sup>31</sup> Moisés medio řaon ixin tti jehe vicon, co are conchienne ngain canchaha para vicon icha jian, coinhi ndačo Dios janhi: <sup>32</sup> “Janha tti Dios de nindogoelitoa řančhjen, janha tti Dios de Abraham, de Isaac, co de Jacob.” Cottimeja Moisés coexinhi řanga de joařaon, co ni čoha tsjehe icha ixin anto řaon. <sup>33</sup> Co Dios ndačo ngain: “Dantsjenga cattea de rottea ixin tti lugar que rrittingachje yá ná lugar santo. <sup>34</sup> Janha vicon que anto tettín chojnina ngain Egipto, janha coian

que tedetan na tangui, co janha xincanji na para itsoenha na jañá. Tsjexin, janha rrorroanha jaha ngain Egipto.”

<sup>35</sup> 'Mexinxin masqui jehe na cjoanoa na Moisés co ndačo na ngain: “¿Quensen coín jaha para ixin tsetonha co sarihi juez?”, pero Dios rroanha Moisés mé inchin ná tti ttetonha co para coančjandaha na conhe na icha feo nttiha. Co rroanha tti ángel que Moisés viconxin ngacjan xoi canchaha para ndache jehe cain yá. <sup>36</sup> Co

Moisés tti joantsjexin nindogoelitoa na xančjjen de ngain Egipto, jehe tti joinchehe tsje milagro co tsje señal. Jehe joinchehe cosa mé ngain nonttehe Egipto co ngain ndachaon que dinhi Mar Rojo co ngagaha jna tti vacji na ngoixin cuarenta nano. <sup>37</sup> Co Moisés mé tti ndačo ngain cain chojni Israel: “Dios rrorroanha ra ná chojni que sačhjexin de nganji ra que rronichja tti jehe Dios tsjagoe, inchin rroanha na janha. Nchehe ra caso ngain.”

<sup>38</sup> Co Moisés mé tti vehe ngagué cain chojni are ngagaha jna. Co cai jehe vehe conixin tti ángel que nichjaxin ngataha jna Sinaí. Co cai Moisés nichjaxin ngain cain nindogoelitoa na xančjjen. Co jehe mé tti vayé palabré Dios que danjo vida, co jehe dicjin palabra mé para que ján na jai chonda na palabra cai.

<sup>39</sup> 'Pero nindogoelitoa na xančjjen čhoha na vitticaon na, co coñaöhe na co joinao na sarrocjan na para Egipto. <sup>40</sup> Co are Moisés xa vehe ngataha jna Sinaí cain na nichja na ngain Aarón, tti dána icha importante, co ndache na Aarón: “Rinaho na que sinchechjianna ni ra canxion dio

que sitaonna na nttiha. Ixin nonaha na quehe conhe Moisés tti joantsjexin na de ngain nonttehe Egipto.” <sup>41</sup> Cottimeja joinchechjian na ná coxinttachjan co goen na tsje coxigo para coín na ngain dio mé. Co anto ché na ngain tti jehe na joinchechjianxin na rá na. <sup>42</sup> Cottimeja Dios sacjoixin de ngain na. Co coančhanda na para jehe na joinchesayehe na cosa que dicon ni ngajni. Co janhi jitaxin ngain libro que dicjin profeté Dios: Jaha ra chojni Israel, ¿agonhe ra coxigo para vachjana ra va janha

ngoixin cuarenta nano ngagaha jna?

<sup>43</sup> Nahi, vachjanaha ra va tiempo mé. Sino que jaha ra vacjiho ra tti dio dinhi Moloc, co tti cosa inchin ná conotse que jaha ra ndačo ra ixin dio co ncheguinhí ra Renfán.

Cain retrato yá jaho ra joinchechjian ra para joinchesayehe ra.

Mexinxin janha santsjexin ra de ngain nacioan ra co rrorroanha ra icha ndaha de Babilonia.

<sup>44</sup> Ndačo Esteban cai:

—Ngagaha jna nindogoelitoa na xančhjen joinchechjian ná nchia de joxon manta para ixin Dios, co nttiha vaquenchjinha na tabla que jitaxin ley de Dios. Co jehe na joinchechjian na nchia mé inchin coetonha Dios ngain Moisés, ixin Dios cjoagoe Moisés co ndačo: “Nchechjian nchia inchin nchia jaha vicon.” <sup>45</sup> Co are Moisés ndavenhe, Dios coinchiehe Josué para coetonhe chojni Israel, co jehe sajoicao nchia mé are vantsje nindogoelitoa na xančhjen de ngagaha jna co are savacao na ngain nontte que Dios vanjo ngain na. Pero tiempo mé icha chojni vintte nttiha. Pero

Dios cjoenguijna nindogoelitoa na xančhjen para vantsjexin na chojni mé de nonttehe. Co jañá cjoí hasta que David joiguehe rey. <sup>46</sup> Dios anto joinao rey David. Co David joinao rrojinchechjian ná nchia para ixin Dios de ndogoelitoa na Jacob. <sup>47</sup> Pero Salomón tti joinchechjian nchia mé para ixin Dios. <sup>48</sup> Jañá joinchehe Salomón masqui Dios que jí noi seha ngaxinhi nchia que nchechjian chojni. Ixin profeté Dios ndačo janhi:

<sup>49</sup> Janha Dios na co ngajni inchin nttaxintaonna co ngataha nontte inchin tti ttingachje rotena. Mexinxin, ¿quehe nchia sinchechjian ra para ixin janha?

¿O ngain quexehe nchia nchao sinttajogaha?

<sup>50</sup> ¿Ajeha janha conixin rana tti jointtachjianxin cain cosa yá? čo Dios.

<sup>51</sup> Pero Esteban joinchehe sigue ndačo:

—Pero soixin ra cainxin tiempo atto cha ansean ra co vittoaxinha ra vitticaon ra. Co soixin ra inchin cain tti chonxinha Dios ixin rinaoha ra sitticaon ra Dios co ttinxinha ra Palabré Dios. Cainxin tiempo ningaconhe ra Espíritu Santo inchin vanchehe cain ndogoelitoa ra xančhjen.

<sup>52</sup> Nindogoelitoa ra xančhjen joinchehe na feo ngain cainxin niprofeté Dios. Co jehe na goen na cainxin chojni mé que ondačo are icha saho de ixin quexén tsí Cristo tti anto jian. Co are ojoí Cristo, soixin ra joinchechienhe ra ngain chojni romano co nagoenxon ra. <sup>53</sup> Co masqui ángel ndache nindogoelitoa ra xančhjen ley de Dios, pero soixin ra ditticaonha ra.

*Are Esteban ndavenhe*



<sup>54</sup> Co are cain na coinhi na cain cosa yá, icha co icha coñao na ngain Esteban co hasta joinetaon neno na ixin anto coñao na ngain. <sup>55</sup> Pero Esteban anto vechonda joachaxin de Espíritu Santo hasta jehe nchao tsjehe ngajni co vicon chíxo tti jí Dios co cai vicon Jesús tajingattjen ngain Dios lado jian. <sup>56</sup> Cottimeja ndacho:

—¡Tsjexin ra, janha dicen ngajni jixangué co tti Xí que joixin de ngajni tajingattjen Xa ngain Dios lado jian!

<sup>57</sup> Pero jehe na coejé na ndatsjoen na conixin rá na co coyao na soji. Co cainxin na tse na Esteban. <sup>58</sup> Joantsjexin na de ciudad mé co coaxin na Esteban xo. Co chojni que coaxin xo joantsje na lonttoe na que tetsá na co cointtohe na lontto nttiha ngain ná xanxí que vinhi Saulo. <sup>59</sup> Co are tetaxin na Esteban xo, jehe joinchecoanxinhi Dios co ndacho:

—Jesús, soixin tti chonda cain joachaxin, dayehe espirituna.

<sup>60</sup> Cottimeja vettoxin co ndacho sén:

—Soixin tti chonda cain joachaxin, nchetjañehe na tti jianha que jehe na tenchehe na jaxon.

Co are joexin ndacho yá, jehe ndavenhe.

## 8

### *Saulo vaningaconhe chojni que vaguitticaon Jesús*

<sup>1</sup> Co Saulo cai anto ché ixin Esteban ndavenhe.

Co xajeho nchanho que Esteban ndavenhe anto tsje chojni coexinhi joinchehe feo ngain chojni que vaguitticaon Jesús ngain Jerusalén. Co cainxin na chjequé na sacjoi na ngain ngoixin nonttehe

Judea co nonttehe Samaria. Joho nirepresentanté Jesús sacjoixinha na de Jerusalén. <sup>2</sup> Co canxion xí que anto jian vaguitticaon xa ngain Jesús cjoavá xa cuerpoe Esteban co anto tsjangaxin xa Esteban. <sup>3</sup> Co tiempo mé Saulo anto feo vanchehe ngain chojni que vaguitticaon ngain Jesús, hasta vaguix-inhi nchiandoha na para vagantsje xí co nčí co vaquianganji na co vaquixinhi na ngain cárcel.

*Are chojni Jesús nichja tti jian joajna ngain nont-tehe Samaria*

<sup>4</sup> Pero chojni que vačhjexin de Jerusalén, ngoixin tti vacji na, vandache na icha chojni tti joajna que danjo iná vida naroa. <sup>5</sup> Ná de jehe na que vačhjexin de Jerusalén vinhi Felipe, co jehe cjoí ngain ná rajna nonttehe Samaria co coexinhi ndache chojni nttiha de ixin Cristo. <sup>6</sup> Co chojni nttiha vaquinhi na jian tti vandačo Felipe. Co jehe na vaguicon na cain milagro que jehe vanchehe conixin joachaxín Dios, <sup>7</sup> ixin tsje chojni que vechonda espíritu jianha vagačjehe na cain tti jianha mé, co espíritu jianha mé vacoyao are vagačhjexin de ngain na. Co tsje chojni que čhoha vaquingui co chojni que čhoha vacji cai vacoçoenhe na. <sup>8</sup> Mexinxin ngain rajna mé chojni anto vaché na.

<sup>9</sup> Pero nttiha cai vehe ná xí que vinhi Simón. Icha saho jehe xa vehe xa ná ttoso ngain rajna mé, co jehe xa vancheyehe xa co vanchexaon xa chojni nttiha ngain nonttehe Samaria. Co vandačo xa ixin jehe xa ná chojni anto importante. <sup>10</sup> Niyeye co ninchinchin, cainxin na anto jian vaquinhi na tti vandačo xí mé co vandačo na:

—Xí yá tti chonda jie joachaxín Dios.

<sup>11</sup> Co cain na anto vaquinhi na tti vandaçho xí mé ixin jehe xa vancheyehe xa na conixin joattosohe xa anto sé tiempo. <sup>12</sup> Pero are Felipe ndache na tti jian joajna de ixin quežén Dios ttetonha co de ixin nombré Jesucristo, are jehe nichja jañá, anto tsje chojni, xí co nchí vitticaon na co joiguite na. <sup>13</sup> Co cai Simón vitticaon co joiguite. Cottimeja jehe vacao Felipe. Co anto vagoan admirado are vicon tsje milagro co señal que vanchehe chojni Jesucristo.

<sup>14</sup> Are mé cain nirepresentanté Jesús xa vintte na Jerusalén. Co are jehe na conohe na ixin chojni Samaria vitticaon na joajné Dios, rroanha na Pedro co Juan nttiha. <sup>15</sup> Co are cayoi nimé joihi na nttiha, joinchetsenhe na ñao Dios que jehe rrorroanha Espíritu Santo ngain chojni que vitticaon Jesús nttiha Samaria <sup>16</sup> ixin xa joiha Espíritu Santo conixin joachaxin ngain ni ná na, ixin jeho joiguite na de ngain nombré Jesús. <sup>17</sup> Cottimeja Pedro co Juan coín rá ngataha já na co jañá jói Espíritu Santo ngain na conixin joachaxin.

<sup>18</sup> Co are Simón vicon ixin Espíritu Santo ttí ngain chojni are nirepresentanté Jesús vaquín rá na ngataha já na, jehe joinchenttoxinhi na tomi <sup>19</sup> co ndaçho:

—Chjana ra janha joachaxin yá cai, para que are janha cai tsín rana ngataha já quexeho chojni, Espíritu Santo tsí ngain jehe na conixin joachaxin.

<sup>20</sup> Cottimeja Pedro ndaçho ngain:

—Dios sinttatján jaha conixin tomia cai ixin jaha xaxaon que tti danjo Dios nchao sina conixin tomi. <sup>21</sup> Jaha jiquininxinha sinchehe xa jihi

ixin ansean jeha jian ngain Dios. <sup>22</sup> Ttendoenhe ñao cosa jianha jihi, co nchetsenhe ñao Dios para ver si jañá sinttatjañaha tti jaha xaxaon ngain ansean. <sup>23</sup> Janha chonxin ixin jaha anto tonchjoaha co ansean jianha, co cain cosa jianha yá tti tančjandaha jaha para ttinxin tti jian.

<sup>24</sup> Cottimeja Simón ndačo:

—Nchetsenhe ra ñao Dios para ixin janha para xonhi tsonna de ixin tti jaha ra ndachjenji ni ra.

<sup>25</sup> Cottimeja Pedro co Juan ndache chojni nttiha quehe joinchehe Jesús are vacao na. Co cai jehe na nichja na palabré Dios. Cottimeja sacjan na para Jerusalén, co are ngatja nttiha, nichja na tti jian joajné Jesucristo ngain tsje rajna ngain nonttehe Samaria.

### *Felipe co ná xí de Etiopía*

<sup>26</sup> Are joexin cain yá, ná ángel Dios, tti chonda cain joachaxin, ndačo ngain Felipe:

—Dingattjen co sadingajin ngain nttiha que xincajinxin de Jerusalén para Gaza.

Nttiha mé datto nttia lugar tti xonhi chojni te. <sup>27</sup> Felipe vingattjen co sacjoi. Co ngatja nttiha mé vetanxin ná xí de nación que dinhi Etiopía. Xí mé vechonda xa tsje joachaxin ngain nchí que vaquetonhe nación mé. Co nchí mé vinhi ncha Candace. Xí mé tti venda cain tomí co cosé nchí mé. Co jehe xa cjoí ná xí eunuco ixin xonhi chjan vechonda ni xonhi nchí vecao xa. Dicji xa ngain Jerusalén para joinchesayehe xa Dios. <sup>28</sup> Co nchanho mé sajicjan xa para ngain nonttehe xa jingá xa carro que ttinganji conxin co jitjao xa xón que dicjin

profeta Isaías. <sup>29</sup> Cottimeja Espíritu Santo ndačo ngain Felipe:

—Tonchienhe tti jí carro jiha co tato tti jidicao carro.

<sup>30</sup> Co are Felipe conchienenhe nttiha, coinhi ixin xí mé jitjao xa xón que dicjin Isaías. Felipe joanchiangui ngain xa co ndačo:

—¿Attinxin quehe rročo xón que rritjao?

<sup>31</sup> Co xí mé ndačo xa:

—¿Quexén janha tsianxin, si xonhi quensen ndachjenji na quehe rročo?

Cottimeja joinchetsenhe xa ñao Felipe ixin tsani carro mé co sehe ngaca xa.

<sup>32</sup> Co tti parte de tti jitaxin Palabré Dios que jitjao xa, mé ndačo:

Joicao na joigoen na inchin are doen na ná coleco, jamé savicao na jehe.

Co jamé inchin corregochjan tencoa va are cjinhi na va,

jamé jehe cai conxireha rroha.

<sup>33</sup> Icha chojni cjoanoa na jehe co anto feo joinchehe na ngain masqui xonhi tiempo jehe joinchehe cosa jianha.

Co de chojni jehe, ¿quensen nchao rronichja?

Ixin jehe na nagoenxon na are jehe vehe ngataha nontte jiji.

<sup>34</sup> Co xí mé joanchianguihi xa Felipe co ndačo xa:

—Ndachjenji na nttatsanha ñao, ¿de ixin quensen ndačo Isaías? ¿Ade ixin jehe o de ixin iná chojni?

<sup>35</sup> Cottimeja Felipe coexinxin nichja de ixin lugar de Palabré Dios tti jitjao xí mé. Cottimeja jehe ndačo ngain xa tti jian joajné Jesús. <sup>36</sup> Co are

jidattocaho xa ngain ná lugar tti jí jinda, ndačo xa ngain Felipe:

—Nttihi jí jinda. ¿Ačoha siguittexin na nttihi?

<sup>37</sup> Felipe ndačo ngain xa:

—Si ndoa ditticaon jaha, nchao.

Co jehe xa ndačo xa:

—Ditticanho que Jesucristo ján Xenhe Dios.

<sup>38</sup> Cottimeja xí mé coetonha xa ixin coengattjen na carro mé, co cayoixin na vania na co sacjoi na para ngain jinda; co Felipe joincheguitte xí mé. <sup>39</sup> Co are vačhjenguixin na de jinda, Espíritu Santo que Jesús rroanha sajoicao Felipe. Co xí mé icjanha xa vicon xa Felipe, pero sacjoi xa noxon nttiha jiyá xa co anto ché xa. <sup>40</sup> Co rato mé Felipe xago ngain rajna que dinhi Azoto, co sacjoi de rajna co rajna para ndache chojni tti jian joajna hasta joihi ngain ciudad de Cesarea.

## 9

### *QueXén Saulo coexinhi vitticaon ngain Jesús (Hechos 22.6-16; 26.12-18)*

<sup>1</sup> Co tiempo mé Saulo xa anto feo vanchehe ngain chojni que vaguitticaon Jesús, tti chonda cain joachaxin. Co jehe vanchexaon de narrogoenxon cain na. Mexinxin joitsjehe xidána icha importante <sup>2</sup> para joanchiehe xa carta que chjé jehe joachaxin para rrocjixin ngain ningoe ciudad de Damasco para rrocjé cainxin chojni que vaguitticaon tti jian joajné Jesús co para rrotse na co sarrojicao na cain na, xí co nchí para ngain Jerusalén. <sup>3</sup> Pero are ngatja nttiha, ochiaon ngain ciudad de Damasco, vingasantte ná xohi que joixin de ngajni

ngá nttiha tti jittji. <sup>4</sup> Cottimeja Saulo vetsinga ngataha nontte co coinhi tté Jesús que ndačo:

—Saulo, Saulo, ¿quedonda ningaconna co feo nchena?

<sup>5</sup> Cottimeja Saulo joanchiangui co ndačo:

—¿Quensen soixin?

Co tté mé ndačo:

—Janha Jesús tti jaha ningaconhe co feo nchehe ngain. Pero jaho rritoniha ixin jaha inchin coxintá are xantoe va con garrocha.

<sup>6</sup> Cottimeja Saulo jixanga de joaxaon co ndačo:

—¿Quehe rinao soixin que janha sinttaha?

Co Jesús ndačo:

—Dingattjen co ttji ciudad de Damasco, co nttiha jí chojni que rroundattjo quehe chonda que sinchehe jaha.

<sup>7</sup> Co cain xí que joicao Saulo tavinttetsjeco xa ixin coinhi xa tti jinichja pero xonhi quensen vintteguicon xa. <sup>8</sup> Cottimeja vingattjen Saulo de ngataha nontte, pero are conxiré jmacon ichoha vicon ixin ndacochejo. Mexinxin tsehe na rá co sajoicao na ngain ciudad de Damasco. <sup>9</sup> Are joiji na Damasco, Saulo viconha ngoixin ní nchanho, co ngoixin nchanho mé xonhi joine ni xonhi vihi.

<sup>10</sup> Co ngain Damasco vehe ná xí vinhi Ananías co xí mé vaguitticaon xa Jesús. Co jehe xí mé cononxinhi xa Jesús, co Jesús ndačo:

—¡Ananías!

Co jehe ndačo:

—Ntitihi rrihi. ¿Quehe rinao, soixin?

<sup>11</sup> Cottimeja Jesús ndačo:

—Dingattjen co sattji ngain tti nttiha dinhi Nao. Co are saso ngain nchiandoha Judas, danchiangui

de ixin ná xí que joixin Tarso, dinhi Saulo. Co xí mé jinchecoanxinna xa janha jaxon. <sup>12</sup> Co jehe xa cononxinhí xa co vicon xa ná xí dinhi Ananías jitonchienne ngain xa co ttín rá ngataha já xa para nchao rrocjan xa sicon xa.

<sup>13</sup> Are Ananías coinhi cain yá, ndačo:

—Soixin, tsje chojni ndachjenji na de ixin xí yá co de ixin cainxin cosa jianha que joinchehe xa ngain chojni que ditticaon soixin ngain ciudad de Jerusalén. <sup>14</sup> Co jai jói xa nttihi conixin joachaxín xidána que ttetonha ngain icha xidána para rrotse xa cain chojni nttihi que nichja jian de ixin soixin.

<sup>15</sup> Pero Jesús ndačo ngain:

—Sattji ixin janha coinchiá xí mé para rronichja xa de ixin janha ngain chojni de icha nación co ngain cain rey de cain nación co ngain chojni Israel cai. <sup>16</sup> Janha tsjagoa xa cain cosa tangui que chonda que tsonhe xa ixin jehe xa sitticaon na xa janha.

<sup>17</sup> Cottimeja Ananías sacjoi para ngain nchia tti vehe Saulo. Co are jehe joixinhi nchia mé, jehe coín rá ngataha já Saulo, co ndačo ngain:

—Hermano Saulo, Jesús, tti chonda cain joachaxin, tti nichjaha jaha ngatja nttiha, mé tti coetonna para joihi nttihi para que jaha nchao sicon iná co para que Espíritu Santo tsí nganji jaha conixin tsje joachaxin.

<sup>18</sup> Co rato mé vinttjixin de ngain jmacon Saulo nchin cosa inchin jochochjenhe copescado, co Saulo onchao vicon iná. Cottimeja Saulo vingatjen co joiguitte. <sup>19</sup> Cottimeja joine co cjan vechonda fuerza iná. Co nttiha vehe ngain ciudad



de Damasco canxion nchanho ngain chojni que vaguitticaon Jesús nttiha.

*Are Saulo nichjé chojni ngain ciudad de Damasco de ixin Cristo*

<sup>20</sup> Saulo toin coexinhi nichja ngain cain ningoe chojni judío co ndačo ixin Jesús ján tti Xenhe Dios. <sup>21</sup> Cain chojni que vaquinhi tti vandačo Saulo vagoan na admirado, co vandačo na:

—¿Ajeha xí jihi tti vanchehe feo ngain chojni ngain ciudad de Jerusalén que vaguitticaon Jesús? Co ¿ajeha xí jihi tti joí nttihi cai para ixin rrotse xa cain chojni que ditticaon Jesús co para ixin sasicao xa na para sinchechienhe xa na ngain xidána que ttetonha ngain icha xidána?

<sup>22</sup> Pero Saulo icha vañaonha para vanichja, co cjoagoe na conixin tti xón que jitaxin Palabré Dios que ixin Jesús jehe tti Cristo, hasta chojni judío que vintte ciudad de Damasco vinttegoan na admirado ixin Saulo oditticaon ngain Cristo.

*Are Saulo sacinguehe chojni judío*

<sup>23</sup> Cottimeja vatto tsje nchanho, co chojni judío vinttendache chó na para rrogoen na Saulo. <sup>24</sup> Pero Saulo conohe que cjoao chó na ixin rrogoen na co ixin nchanho co ttie vachonhe na Saulo ngain cain lugar tti dačhjexin chojni de ngain ciudad ixin rrogoen na. <sup>25</sup> Pero chojni que vaguitticaon Jesús, chojni mé ngá ná nttaxa jie coengaha na Saulo co ná ttie vantsje na ngadoxin ná ventané ttjariho co joinchegania na Saulo para nontte. Ttjariho mé vehe ttjario ngoixin ngandehe ciudad mé, co jamé jehe nchao sacinga.

### *Are Saulo vehe ngain Jerusalén*

<sup>26</sup> Are Saulo joihi Jerusalén, joihao coato chojni que vaguitticaon Jesús, pero cainxin na vaʒagoen na ixin jehe na vitticaonha na ixin Saulo ovitticaon Jesús. <sup>27</sup> Masqui jamé, Bernabé joicao jehe ngain nirepresentanté Jesús. Co Bernabé ndache na ixin ngatja nttiha Saulo vicon Jesús, tti chonda cain joachaxin, co ixin Jesús nichja ngain, co ixin después de mé Saulo nichja sin joaʒaon ngain ciudad de Damasco conixin nombré co joachaxín Jesús. <sup>28</sup> Co Saulo vittohe canxion nchanho ngain Jerusalén co vacao nirepresentanté Jesús. <sup>29</sup> Jehe vaʒaonha para vanichja conixin nombré co joachaxín Jesús, tti chonda cain joachaxin, co cjoao chojni judío que vanichja na nguigoa griego. Pero chojni mé joihao na rrogoen na Saulo. <sup>30</sup> Co are chojni que vaguitticaon Jesús coinhi na cainxin mé, savicao na Saulo ngain ciudad de Cesarea. Co de nttiha rroanha na ngain ciudad de Tarso.

<sup>31</sup> Cottimeja cain chojni Jesús vajinao chó na, co vaquetocaoha chó na ngain ngoixin nonttehe Judea, nonttehe Galilea, co ngoi nonttehe Samaria. Co coangui na icha co icha de ixin Dios. Cainxin na vanchehe na cainxin cosa inchin joihao Jesús, tti chonda cain joachaxin. Co Espíritu Santo cjoenguijna na para que ʒatte icha tsje chojni.

### *Are Eneas coxoenhe*

<sup>32</sup> Pedro ngaria rajna co rajna para vaguitsjehe chojni que vaguitticaon Jesús. Co ná de nchanho mé sajoitsjehe nivintte rajna Lida. <sup>33</sup> Nttiha vetan

ná xí vinhi Eneas que venihi co vetsinga jni nano vaquinguiha. <sup>34</sup> Co Pedro ndache:

—Eneas, Jesucristo sinttaçoanha. Dingattjen co datsín caniaha.

Co rato mé vingattjen Eneas. <sup>35</sup> Co cainxin chojni que vintte ngain rajna Lida co ngain nontte Sarón vicon na quehe conhe tti Eneas. Co cainxin chojni mé coentoxinhi na vidé na co vitticaon na Jesús, tti chonda cain joachaxin.

### *Are xechon nanita vinhi Dorcas*

<sup>36</sup> Co tiempo mé vehe ngain ciudad de Jope ná nanita vinhi Tabita que vaguitticaon Jesús. Co ngain nguigoa griego nanita mé vinhi Dorcas. Ngoixin vidé jehe vanchehe cosa jian co vacjenguijna chojni noa. <sup>37</sup> Co are Pedro vehe ngain rajna Lida, conihi nanita mé co ndavenhe. Cottimeja joinchetsinda na cuerpoe co vaquehe na ngain ná cuarto noi. <sup>38</sup> Jope vehe chiaon rajna Lida, co chojni que vaguitticaon Jesús ngain Jope conohe na ixin Pedro vehe ngain rajna Lida. Mexinxin rroanha na yó xí ngain Pedro co xí mé ndaço xa ngain:

—Chjin na toin para rajnana na.

<sup>39</sup> Cottimeja Pedro sacjoi ngain na. Co are joihi na nchiandoha nanita, savicao na Pedro ngain cuarto tti jí cuerpoe. Co cainxin nchiganha víxin ndaji na co tsjanga ncha co cjoago ncha lontto que Dorcas vanchechjian are vechon. <sup>40</sup> Cottimeja Pedro vantsje cain na. Co jehe vettoxin nntajochjihi co joinchecoanxinhi Dios. Cottimeja tsjehe nanita ndadiguenhe, co ndache:

—Tabita, dingattjen.

Cottimeja jehe nanita mé conxiré jmacon. Co are vicon nanita mé Pedro, xendoa co tavehe. <sup>41</sup> Cottimeja Pedro tsehe rá co joinchengattjen. Vayé cainxin chojni que vaguitticaon Jesús, conixin n̄higanha cai, co cjoagoe na nanita jichon nanita. <sup>42</sup> Cosa jihi conohe na ngoixin ciudad de Jope co tsje chojni vitticaon na ngain Jesús, tti chonda cain joachaxin. <sup>43</sup> Co Pedro vittohe canxion nchanho ngain ciudad mé ngain nchiandoha ná tti vinhi Simón que vagatse roé coxigo.

## 10

### *Pedro co Cornelio*

<sup>1</sup> Co tiempo mé vehe ná xí vinhi Cornelio ngain ciudad de Cesarea. Co xí mé vehe xa capitán ngain ná grupo de cien xisoldado. Co grupo mé vinhi Italiano. <sup>2</sup> Cornelio jeha judío, pero masqui jamé, jehe conixin nindoha anto vanchesayehe na Dios, co vanchehe na inchin joinao Dios. Co cai, jehe vaganjo tsje tomi ngain chojni judío noa. Co cainxin nchanho vanchecoanxinhi Dios. <sup>3</sup> Co ná nchanho inchin ní hora tsocjin jehe Cornelio vicononxinhi jian ná ángel Dios. Co ángel mé jói tti jí Cornelio co ndache:

—¡Cornelio!

<sup>4</sup> Jehe Cornelio tavetsjecoa tti ángel co anto x̄aon. Cottimeja joanchiangui co ndačo:

—¿Quehe rinao soixin?

Cottimeja ángel mé ndache:

—Dios ján joinchehe caso tti jaha nchecoanxinhi nanao co ixin tti jaha ttjenguijna cain ninoa.

<sup>5</sup> Mexinxin rroanha jaha canxion xí ngain ciudad

de Jope para tsiaho na ná xí dinhi Simón co xí mé dinhi xa Pedro cai. <sup>6</sup> Jehe xa jí xa ngain nchian-doha iná tti xí dinhi Simón, pero mé datse roé co, co nchian-doha jí nchia chiaon čica ndachaon. Co Simón Pedro rrondattjo quehe chonda que sinchehe.

<sup>7</sup> Cottimeja sacjoi tti ángel nichjé, co Cornelio vayé yó ninchehe xé co ná xisoldadoe que vaguitticaon Dios cai. Co Cornelio vechondehe xisoldado mé confianza. <sup>8</sup> Co coequín na cainxin tti conhe. Cottimeja Cornelio rroanha na para Jope.

<sup>9</sup> Nchanho yoxin are satettji ninchehe xé co xisoldadoe Cornelio co are ochiaon ciudad de Jope, Pedro cjo ngataha nchia tti vehe inchin ngosine nchanho para joinchecoanxinhi Dios. <sup>10</sup> Co anto venhe jintta co joinao rrojine. Ngoixin tenchechjian na tti rrojine, jehe Pedro vicononxinhi tsje cosa que cjoagoe Dios. <sup>11</sup> Vicon ngajni xiré co xincanji ná cosa inchin ná manta jie jitte canoi esquiné. <sup>12</sup> Ngá manta mé vehe cain coxigo que chonda nó rotté, conché, co conttoa. <sup>13</sup> Cottimeja coinhi tté Dios que ndačo:

—Pedro, dingattjen, donhe quexeho co rinao co jintte va.

<sup>14</sup> Pero Pedro ndačo:

—Nahi, soixin, xonhi tiempo janha joine cosa ttjoaha co ley Israel jitaxin ixin coxigo mé ttjoaha va.

<sup>15</sup> Cottimeja Dios nichjé iná co ndačo:

—Cosa que Dios joincheroa, jaha čoha rrondačo ixin ttjoaha.

<sup>16</sup> Jihi conhe ní nttiha, cottimeja sacjan manta mé para ngajni. <sup>17</sup> Are Pedro jiřaxaon ixin quehe

rroçho tti vicon, ninchehe xé co xisoldadoe Cornelio ttinga tedanchiangui na ixin ttinó jí nchi-andoha Simón co ojoiji na ngain puerté nchia. <sup>18</sup> Cottimeja joanchiangui na sén ixin anttiha jí ná tti dinhi Simón co cai dinhi Pedro. <sup>19</sup> Co Pedro xa jiçaxaon ixin tti vicon are Espíritu Santo ndache:

—Tsjexin, ní xí tedanchiangui xa ixin jaha. <sup>20</sup> Dingattjen co dania co nchedudaha de sattjiho xa ixin janha rroanha chojni yá.

<sup>21</sup> Cottimeja Pedro vania tti te chojni rroanha Cornelio, co Pedro ndache na:

—Janha tti tettjé ra. ¿Quehe rinao ra?

<sup>22</sup> Jehe na ndaço na:

—Coetonna na ná xicapitán dinhi Cornelio. Jehe ná xí jian que ditticaon Dios co cainxin chojni judío chondehe na respeto co rinao na xa. Mé ná ángel de Dios joí co ndaço ngain xa ixin rrorroanha xa joajna para que soixin tsji ndoha xa co jehe xa tsinhi xa tti soixin rrondache xa.

<sup>23</sup> Cottimeja Pedro ndache na para vixinhi na nchia. Co ttie mé vittohe na nttiha. Nchanho yoxin Pedro sajoicao na conixin icanxin chojni que vaguitticaon Jesús que vintte ciudad de Jope.

<sup>24</sup> Ndoexin joiji na ciudad de Cesarea. Nttiha Cornelio joichonhe conixin nindoha co chojni que navacaxon, cain nimé vayé Cornelio para que chonhe na nijoirroé Pedro. <sup>25</sup> Are Pedro joiji nchi-andoha, Cornelio vaçhje para chjé joajna co vettoxin nttajochjihi para rrojinchesayehe. <sup>26</sup> Pero Pedro joinchengattjen co ndache:

—Dingattjen. Caixon janha ná xí na inchin jaha.

<sup>27</sup> Co are jehe na nichjé chó na, joixincaho chó na nchia, co nttiha dixejo tsje chojni. <sup>28</sup> Cottimeja Pedro ndache na:

—Jaha ra noha ra ixin chojni judío čhoha řatte ngain chojni jé ni dixinha nchiandoha na. Pero Dios cjoagohna janha ixin irrondachjanha ixin řonhi chojni o cosa ttjoaha. <sup>29</sup> Mexinxin are joihi chojni que jaha ra rroanha ra, toin sajoihi co řonhi joanchianguia na. Mexinxin, jaxon rinaho tsonona quedonda vayahna ni ra.

<sup>30</sup> Cottimeja Cornelio joattehe:

—Jai vittja nó nchanho janha nttihi nchiania jointtacoanxian Dios are otsocjin, co hora mé řa joineha ixin jointtasayá Dios. Are mé vicon ná xí que jingá ná lontto jidaquín. <sup>31</sup> Co xí mé ndachjenji na xa: “Cornelio, Dios coinhi ixin jaha nichjehe co řaxaon tti nchehe jaha para ttjenguijna cain chojni noa. <sup>32</sup> Mexinxin rroanha jaha joajna ciudad de Jope para tsí Simón, tti xí que dinhi Pedro cai. Xí mé jí xa ndoha iná tti dinhi Simón, pero mé datse roé co, co nchiandoha jí nchia chiaon čhica ndachaon. Are tsí Simón Pedro, jehe rronichjaha jaha.” <sup>33</sup> Co jańá janha rroanha joajna jaicoa para joicjé na co anto nchao ixin jaha joihi daca. Dios jitsjehe ixin cain na te na nttihi co rinaho na tsian na cainxin cosa que jehe coetonha jaha para rrondachjenji ni ra.

*Tti ndačho Pedro ngaxinhi nchiandoha Cornelio*

<sup>34</sup> Cottimeja Pedro coexinhi nichja co ndačho:

—Jai ttianxin que ndoa Dios rinao cainxin chojni, masqui oje chojni, pero para ixin jehe cainxin na řajeho na. <sup>35</sup> Dios čhoha sinchejé chojni que

joixin iná nontte, sino que Dios rinao cainxin chojni que nchesayehe jehe co nchehe jian. <sup>36</sup> Dios rroanha Jesucristo ngagué chojni Israel para que Jesucristo, tti chonda joachaxin para cainxin chojni, nichja tti jian joajna que ndačo ixin Dios itoñaoha ngain chojni. <sup>37</sup> Co jaha ra anto jian noha ra quehe joinchehe Jesucristo ngain nonttehe chojni judío. Co jehe coexinhi joinchehe xé ngain regioen Galilea después de que Juan joexin nichjé co joincheguitte chojni. <sup>38</sup> Co noha ra quexén Dios joanjo joachaxín Espíritu Santo ngain Jesús que joixin rajna Nazaret co quexén Jesús vangaria co joinchehe jian co joinchexingamehe cainxin chojni que vaguetan tangui de ixin tti jianha que vanchehe inchínji ngain. Jañá vanchehe Jesús ixin Dios jí ngain. <sup>39</sup> Co janha na vicon na cainxin tti vanchehe Jesús ngain nonttehe Judea co ngain ciudad de Jerusalén. Cottimeja goen na are coenganito na nttacruz. <sup>40</sup> Pero nchanho ninxin Dios joinchexechon Jesús co Dios cjoagohna na ixin ján xechon Jesús. <sup>41</sup> Cainxinha chojni vicon Jesús, jehojanha na vicon na ixin Dios coinchiehna na desde are saho para ixin rronichja na ngain icha chojni. Janha na joinequinha na Jesús co viquinha na Jesús después de xechon. <sup>42</sup> Co Jesús coetonna na que rrondattjan na icha chojni ixin Dios coinchiehe Jesús para sehe Juez ngain chojni techon co ngain chojni ndavintteguenhe. <sup>43</sup> Co anto saho que Jesús joí ngataha nontte jihi, cainxin profeté Dios vandačo ixin cainxin chojni que ditticaon Jesús, Dios nchetjañehe na cainxin cosa jianha que nchehe na conixin nombré co joachaxín Jesús.



*Are Espíritu Santo joí ngain chojni que jeha judío*

<sup>44</sup> Xa jinichja Pedro are joí Espíritu Santo ngain cainxin chojni que jittinhi joajné Pedro. <sup>45</sup> Co chojni judío que vaguitticaon Jesús co joixin ciudad de Jope conixin Pedro vintegoan na admirado ixin Espíritu Santo joí cai ngain chojni que jeha judío. <sup>46</sup> Ixin coinhi na oje nguigoa jinichja chojni mé co cai joinchesayehe na Dios. <sup>47</sup> Cottimeja Pedro ndaço:

—Espíritu Santo joí ngain na conixin joachaxin inchin joí nganji na janha na. Mexinxin, ¿ají ná chojni que rroçhoja ixin jehe na siguitte na?

<sup>48</sup> Co Pedro coetonha ixin joiguitte na ngain nombré Jesucristo. Cottimeja chojni de Cesarea joinchetsenhe na ñao Pedro ixin sittohe ngain na icanxin nchanho.

## 11

*Tti joinchenohe Pedro cain chojni que vaguitticaon Jesús ngain Jerusalén*

<sup>1</sup> Nirepresentanté Jesús conixin icha chojni que vaguitticaon Jesús que vintte na nonttehe Judea, chojni mé coinhi ixin chojni que jeha judío cai vitticaon joajné Dios. <sup>2</sup> Co are Pedro joí ngain ciudad de Jerusalén, chojni que vandaço ixin cai chojni que jeha judío chonda na que sitticaon na ngain circuncisión co ngain icha costumbré chojni judío are ditticaon na ngain Jesucristo, chojni que vandaço jañá nichja na feo de ixin Pedro. <sup>3</sup> Co joanchianguihi na Pedro co ndaço na:

—¿Quedonda joitsjehe co jointtecoho chojni que jeha judío?

<sup>4</sup> Cottimeja Pedro coequín na cainxin lo que conhe co ndaço:

<sup>5</sup>—Are janha tarrihi ciudad de Jope co are rrint-tacoanxian Dios, vicononxinna ná cosa inchin ná manta jie que xincanjinxin de ngajni co jitte canoi esquiné co joí hasta tti janha rrihi. <sup>6</sup> Co are janha vicon jian ngaxinhi manta mé, vicon anto tsje coxigo que chonda nó rotté, coxigo čhintto, conché, co conttoa. <sup>7</sup> Co coian tté Dios que ndachjenji na: “Pedro, dingattjen, donhe va co jintte va.” <sup>8</sup> Pero janha ndačhan: “Nahi, soixin. ŕonhi tiempo janha joine cosa ttjoaha, co ley Israel jitaxin ixin coxigo yá ttjoaha va.” <sup>9</sup> Cottimeja tté Dios nichjahna iná co ndachjenji na: “Cosa que Dios joincheroa, jaha čhoħa rrondačo ixin ttjoaha.” <sup>10</sup> Jihi conhe ní nttiħa, cottimeja sacjan cainxin mé para ngajni. <sup>11</sup> Rato mé joiji ní xí ngain tti nchia joarihi. Vinttequixin xa ciudad de Cesarea ixin joicjé na xa. <sup>12</sup> Co Espíritu Santo coetonna ixin sacjoinha xa co nchao jointtaha para sacjoinha xa. Cai cjoinha incjaon nitehe tti niditticaon Jesús. Co cain na joixinhi na nchiandoha Cornelio. <sup>13</sup> Xí mé coequinna na xa ixin quečén vicon xa ná ángel tajingattjen ngaxinhi nchiandoha xa co ndache xa: “Roanha joajna ngain ciudad de Jope ixin tsí Simón tti dinhi Pedro cai. <sup>14</sup> Co jehe rrondattjo quečén jaha co cainxin nindoi nchao rrochonda ra iná vida naroa que ŕonhi tiempo tsjexin.” <sup>15</sup> Co are janha coexian nichjá na, Espíritu Santo ojoí ngain na conixin tsje joachaxin inchin are joí nganji na ján na are saho. <sup>16</sup> Cottimeja ŕaxanho tti ndachjenji na Jesús, tti chonda cain joachaxin; jehe ndaço: “Ndoa que Juan joincheguittexin ni

conixin jinda, pero jaha ra siguittexin ra conixin Espíritu Santo.” <sup>17</sup> Jañá Dios rroanha Espíritu Santo ngain jehe na inchin rroanha nganji ján na are coexinhi na votticaon na Jesucristo, tti chonda cain joachaxin. Mexinxin si Dios joinchehe jamé, janha čhoča ndačhjan nahi.

<sup>18</sup> Cottimeja are chojni que vaguitticaon Jesús que vintte na ciudad de Jerusalén coinhi na yá, inichjaha na feo de ixin Pedro, co vitticaon na ixin Dios anto jian co ndačo na:

—¡Caixon Dios chjé chojni que jeha judío joachaxin para ttentoxinhi na vidé na co para rrochonda na iná vida naroa que xonhi tiempo tsjexin!

### *Chojni que vaguitticaon Jesús ngain ciudad de Antioquía*

<sup>19</sup> Are saho are nagoenxon na Esteban, are mé, coexinhi na anto feo joinchehe na ngain icha chojni que vaguitticaon Jesús. Co tsje chojni que vaguitticaon Jesús chonda que sacoinga na hasta tti ngain nonttehe Fenicia co ngain nontte ngosine ndachaon dinhi Chipre co cai ngain ciudad de Antioquía. Nttiha nichja na tti jian joajna pero jeha ngain chojni judío co ngain icha chojni nahi.

<sup>20</sup> Pero canxion nivaguitticaon Jesús que joixin nontte ngosine ndachaon dinhi Chipre co rajna Cirene, chojni mé joiiji na ciudad de Antioquía co ndache na chojni que jeha judío tti jian joajna de ixin Jesús, tti chonda cain joachaxin. <sup>21</sup> Chonda na joachaxín jehe Jesús co jañá tsje chojni coen-toxinhi na vidé na co vitticaon na Jesús, tti chonda cain joachaxin.

<sup>22</sup> Are chojni que vaguitticaon Jesús ngain ciudad de Jerusalén, conohe cain mé, rroanha na Bernabé ngain ciudad de Antioquía. <sup>23</sup> Are Bernabé joiiji, jehe vicon ixin quexén Dios joinchenciaon chojni nttiha, co are vicon mé, anto ché. Jehe ndache cain na co ndačo:

—Conixin ansean ra ditticaon ra Jesús, tti chonda cain joachaxin.

<sup>24</sup> Co Bernabé ná chojni jian, co Espíritu Santo anto vaquetonha ngain co jehe anto vaguitticaon Jesús. Co jañá icha tsje chojni vitticaon Jesús por ixin Bernabé.

<sup>25</sup> Cottimeja Bernabé sacjoi para ciudad de Tarso para ixin joicjé Saulo. Co are vetan Bernabé Saulo, joicao ngain ciudad de Antioquía. <sup>26</sup> Co vintte na nttiha ngagué chojni que vaguitticaon Jesús ngoixin ná nano co joinchecoenhe na tsje chojni. Nttiha ngain ciudad de Antioquía tti saho lugar que chojni coexinhi na joincheguini na chojni que vaguitticaon Jesús, cristiano.

<sup>27</sup> Co tiempo mé canxion chojni que vanichja tti vagayé de ngain Dios joixin na de ngain Jerusalén co sacjoi na ngain ciudad de Antioquía. <sup>28</sup> Co ná de chojni mé vinhi Agabo vingattjen ngagué chojni que vaguitticaon Jesús. Co Espíritu Santo cjoenguijna para conohe quehe nichja jehe co ndačo ixin tsí tiempo que ngoixin mundo seha tti sine chojni. Co jañá joiconhe después, are Claudio vehe emperador. <sup>29</sup> Cottimeja chojni que vaguitticaon Jesús ngain ciudad de Antioquía ndache chó na ixin cjoenguijna na chojni que vaguitticaon Jesús, nite nonttehe Judea. Co naná na joanjo na según inchin chonda na. <sup>30</sup> Co jañá joinchehe na co

rroanha na Bernabé co Saulo para joicaohe na tti xí que vaquetonhe chojni que vaguitticaon Jesús que vintte nonttehe Judea cain tti joatse na.

## 12

### *Are ndavenhe Jacobo co are coiaxinhi na Pedro*

<sup>1</sup> Co tiempo mé rey Herodes coexinhi vanchehe feo ngain nivaguitticaon Jesús. <sup>2</sup> Jehe coetonha ixin nagoenxon na Jacobo, xanchó Juan, conixin espada. <sup>3</sup> Co are jehe vicon ixin chojni judío joincheḡoxinhi yá, jehe coetonha ixin tse na Pedro. Cosa jihi conhe ngain quiai pascua are jine na niottja que chondaha levadura. <sup>4</sup> Are tse na Pedro, coiaxinhi na ngain cárcel. Co nttiha jí nó grupo xisoldado jinda cárcel mé co cada grupo chonda nó xisoldado. Herodes ḡaxaon ixin are tsjexin quiai pascua, rrogantsjexin Pedro de ngain cárcel para ixin rroguicon chojni are Pedro ngain juzgado co are ndarroguenhe. <sup>5</sup> Co jañá Pedro tajiixinhi co tsje xisoldado jinda. Pero chojni que vaguitticaon Jesús nchanho co ttie vanchetsenhe na ñao Dios para ixin Pedro.

### *Dios vantsjexin Pedro de ngain cárcel*

<sup>6</sup> Ttie mé co ndoexin Herodes rrogantsjexin Pedro de ngain cárcel para rrojinchejuzguehe, co ttie mé Pedro tajijoa ngagué yó xisoldado co tajiḡhiixin yó cadena co icanxin xisoldado tenda xa cárcel ndojaxin. <sup>7</sup> Co rato mé joí ná ángél Dios co ngoixin ngaxinhi cárcel anto vingasán ḡohi. Angel mé catte nttachén Pedro co joinchexingamehe co ndache Pedro:

—Dingattjen jaicoa.

Cottimeja cadena tti jichiaxin rá Pedro vinttji cadena ngataha nontte. <sup>8</sup> Co ángel mé ndache:

—Nchenttedo cinturoan co tjanga cattea.

Co are Pedro joinchehe cain yá, ángel mé ndačo ngain:

—Daritsí nozá co chjin na.

<sup>9</sup> Co Pedro rroé ángel co sacjoi, masqui noeha andoa ni nahi tti jitsjehe. Xaxaon ixin jitsjehe inchin are toxinxin ni. <sup>10</sup> Pero vatto na tti te xisoldado saho co xisoldado yoxin, co are joiji na ngain puerta chia que jixin nongaxin nttiha, xiré puerta jeho puerta. Co vačhje na, co cjoi na inchin ná esquina. Cottimeja ángel cointtohe jeho Pedro.

<sup>11</sup> Cottimeja Pedro coinxin co ndačo:

—Janché onona ixin Jesús, tti chonda cain joachaxin, rroanha ná ángel co vantsjexin na de ngá rá Herodes co de ngain cainxin tti rrojinchena chojni judío.

<sup>12</sup> Co are Pedro xa jixaxaon de ixin cain yá, sacjoi nchiandoha María, janné Juan que cai vinhi Marcos. Co nttiha anto tsje chojni tenchetsenhe na ñao Dios. <sup>13</sup> Co are Pedro vinga puerta, vačhje ná xannčí vinhi Rode para joitsjehe xan quensen joí. <sup>14</sup> Co are coinhi xan tté Pedro, anto ché xan co xa conxireha xan puerta. Sacjan xan ttinga xan joiquetonha xan ngaxinhi ixin Pedro ngain puerta tají. <sup>15</sup> Cottimeja ndačo cainxin na:

—¡Ndadixenga jaha!

Co jehe xan anto ndačo xan ixin ndoa. Pero masqui jamé, jehe na ndačo na:

—Jeha jehe Pedro. Yá tti ángel que jinda Pedro.

<sup>16</sup> Co ngoi rato mé ndoja Pedro xa jidinga puerta. Co are conxiré na puerta co vicon na Pedro,

cainxin na x̄aon na. <sup>17</sup> Pero jehe joinchehe seña conixin rá para que jehe na tencoa na co coequinhi na quex̄én Jesús vantsjexin de ngaxinhi cárcel co ndache na:

—Ttequinhi ra cain yá Jacobo co ni icha que ditticaon Jesús.

Cottimeja vačhje co sacjoi ojé lugar.

<sup>18</sup> Co are vingasán xisoldado anto x̄aon xa ixin noeha xa quehe conhe conixin Pedro. <sup>19</sup> Herodes coetonha joicjé na pero čhoha vittja na. Cottimeja Herodes joanchianguihi xisoldado ixin quex̄én Pedro sacjoi, co coetonha nagoenxon na cainxin xisoldado mé. Cottimeja Herodes sacjoixin de nonttehe Judea co sacjoi ngain ciudad de Cesarea. Co nttiha vehe tsje nchanho.

### *Are ndavenhe Herodes*

<sup>20</sup> Icha saho Herodes vaganjo tti vane chojni ciudad de Tiro co Sidón. Cottimeja Herodes coñao ngain chojni mé. Co jehe na cjoao chó na ixin joitsjehe na Herodes. Co jehe na joincheconvensé na Blasto, ná xinchehe x̄é Herodes que chonda xa tsje joachaxin, ixin ndache xa Herodes ixin itsoñaoha ngain cayoi ciudad mé. <sup>21</sup> Co Herodes coín ná nchanho para ixin coinhi tti ndačo na. Co nchanho mé vengá lonttoe rey co tavetaha nttaxintaoen tti dehe are ttetonha, co coexinhi nichja ngain cain chojni. <sup>22</sup> Cottimeja cainxin chojni coexinhi coyao na co ndačo na:

—¡Jeha ná xí tti jinichja! ¡Jihi ná dios!

<sup>23</sup> Co rato mé ná ángel Jesús, tti chonda cain joachaxin, joinchehe que tse ná chin co joxon cotsindo coexinhi joine cuerpoe hasta ndavenhe

jehe Herodes. Jañá conhe Herodes ixin joinao que chojni joincheguinhí na dios jehe.

<sup>24</sup> Pero icha co icha tsje chojni coinhi joajné Dios co jamé icha co icha tsje lugar chojni vitticaon na Jesús.

<sup>25</sup> Co are Bernabé co Saulo joexin joinchehe na xé na, cjanxin na de ngain ciudad de Jerusalén co joicao na Juan que vinhi Marcos cai.

## 13

*Are Bernabé co Saulo coexinhí nichja joajné Dios ngain icha lugar*

<sup>1</sup> Ngagué chojni que vaguitticaon Jesús ngain ciudad de Antioquía vintte canxion chojni que vagayé joajna de ngain Dios co cai vintte canxion tti joinchecoenhe chojni de ixin Dios. Chojni mé vinhi Bernabé, Simón (que vinhi cai tti Ttie), Lucio de ciudad de Cirene, Manaén (que vanguicaho Herodes tti vaquetonha ngain nonttehe Galilea), co Saulo. <sup>2</sup> Ná nchanho are tecjáño na co tenchecoanxinhí na Jesús, tti chonda cain joachaxin, Espíritu Santo ndačo ngain na:

—Rroanha ra Bernabé co Saulo ngain tti xa que janha ochjaha na.

<sup>3</sup> Cottimeja cjáño na co joinchecoanxinhí na Dios icha, co después coín rá ni icha ngataha já cayoi na. Cottimeja rroanha na na savinttecji na.

*Bernabé co Saulo ngain nontte ngosine ndachaon dinhi Chipre*

<sup>4</sup> Cottimeja Bernabé co Saulo sacjoi ngain ciudad de Seleucia inchin coetonha Espíritu Santo. Co nttiha coaxin na barco que sajoicao na ngain



nontte ngosine ndachaon dinhi Chipre. <sup>5</sup> Co are joihi na ciudad de Salamina, tti dengattjen barco, coexinhi na nichja na joajné Dios ngaxinhi cainxin ningoe chojni judío. Co cai joicao na Juan Marcos ixin cjoenguijna na. <sup>6</sup> Joingaria na ngoixin nontte mé hasta joihi na ciudad de Pafos. Nttiha vetan na ná chojni judío que vinhi Barjesús. Co xí mé ttoso xa. Co jehe xa joincheyehe xa chojni ixin ndačo xa que nichja xa para ixin Dios. <sup>7</sup> Xittoso mé anto xiamigoe xa xigobernador que vinhi Sergio Paulo. Xigobernador mé vechonda xa jian joarrixaon. Co xí mé rroanha xa joajna ixin jói Bernabé co Saulo ixin joinao xa coinhi xa joajné Dios. <sup>8</sup> Co xittoso mé, que cai vinhi xa Elimas, čoha xa co joinaoha xa ixin xigobernador rroguitticaonxin xa tti nichja na. <sup>9</sup> Cottimeja Saulo, que cai vinhi Pablo, tavetsjehe xittoso mé jian. Co Pablo anto tsje joachaxín Espíritu Santo chonda. <sup>10</sup> Co jehe ndache xa:

—Jaha tti ncheyehe chojni, co jaha nchehe jianha; jaha xenhe inchínji co jaha tti ningaconhe cainxin tti jian. ¿Quedonda toncjamangui palabré Jesús, tti chonda cain joachaxin, para que chojni sitticaonha na jehe? <sup>11</sup> Janché, jehe Jesús sintacastigá jaha co tsejé jmacon co jaha siconha canxion nchanho.

Co rato mé ndaconaxinhi xa xehe. Cottimeja cjoé xa ná tti rrotse rá xa ixin idiconha xa. <sup>12</sup> Co are xigobernador vicon quehe conhe jehe xittoso mé, vitticaon xa Jesús ixin jehe xa tavetsjeco xa ixin tti cjoagoe na xa de ixin Jesús, tti chonda cain joachaxin.

*Pablo co Bernabé ngain ciudad de Antioquía que jí nonttehe Pisidia*

<sup>13</sup> Pablo co xijoicao ngain ciudad de Pafos nttiha coaxin na barco co sacjoi na ngain ciudad de Perge ngain nonttehe Panfilia. Pero Juan Marcos cointtohe na co sacjan ngain ciudad de Jerusalén.

<sup>14</sup> Cottimeja jehe na sacjoixin na de ngain ciudad de Perge co sacjoi na ciudad de Antioquía que jí ngain nonttehe Pisidia. Co nttiha are nchanho que nchejogaha na, joixinhi na ningoe chojni judío co tavintte na. <sup>15</sup> Cottimeja are xivaquetonhe nihngo mé joexin tsjehe xa xón que jitaxin ley que vayé Moisés co xón que jitaxin tti dicjin profeté Dios, xí mé rroanha xa joajna ngain na co ndačo xa:

—Si jaha ra noha ra čhoan palabra jian para ixin chojni nttihi, nchao nichja ra jaxon.

<sup>16</sup> Cottimeja Pablo vingattjen co joatsín rá para ixin chojni rrotenco na co ndačo:

—Tsjexin ra jaha ra chojni Israel co jaha ra que xagonhe ra Dios. <sup>17</sup> Dios de chojni Israel coinchiehe ndogoelitoa na xančhjen co jehe cjoenguijna na para anto cotsje na are xa vintte na nonttehe Egipto. Co después Dios vantsjexin na de nttiha conixin joachaxín. <sup>18</sup> Co Dios anto venda cainxin chojni mé ngoixin cuarenta nano ngagaha jna, masqui jehe na antoha jian vaguiticaon na ngain Dios. <sup>19</sup> Cottimeja Dios conxante yáto nación que vintte ngain nonttehe Canaán. Co cainxin nontte mé joanjo Dios ngain ndogoelitoa na xančhjen para inchin cuatrocientos cincuenta nano. <sup>20</sup> Co ngoixin tiempo mé Dios coinchiehe tsje xijuez para coetonhe chojni mé hasta are joí

profeta que vinhi Samuel. <sup>21</sup> Cottimeja chojni Israel joinchetsenhe na ñao Dios para que ná xirey rroquetonha ngain na. Mexinxin Dios joanjo ná xí vinhi Saúl, xenhe Cis, co mé ná xanntí ndogelitoa na xančhjen que vinhi Benjamín. Co xí mé vehe rey ngoixin cuarenta nano. <sup>22</sup> Cottimeja Dios joantsjehe Saúl joachaxin de rey, co chjé David joachaxin de rey. Co Dios ndačo de ixin David: “David, tti xenhe Isaí, ná xí que janha anto ncheřoxinna co jehe sinchehe cainxin tti janha rinaho.” <sup>23</sup> Jesús vehe ná xannti xančhjen de David mé co Dios rroanha Jesús para danjo chojni Israel iná vida naroa que xonhi tiempo tsjexin, inchin jehe ndačo are saho. <sup>24</sup> Icha saho que Jesús joí, Juan vanichjé cainxin chojni Israel co ndache na ixin chonda na que tsentoxinhi na vidé na co siguitte na. <sup>25</sup> Co are Juan chiaon jittjexin vidé, ndačo: “Janha jeha tti jaha ra řaxaon ra. Co después de janha, tsí ná tti rrochonda anto tsje joachaxin co janha jiquininxinha na ni para sisehe tsonxindangá corrié catté.”

<sup>26</sup> ‘Hermanos, joajné Dios tti danjo iná vida naroaxin, mé para ixin jaha ra řo xannti xančhjen de Abraham co jaha ra řo řagonhe ra Dios. <sup>27</sup> Chojni que vintte ciudad de Jerusalén co xivaquetonhe chojni joinoeha na quensen Jesús co ni vaquininxinha na tti vacjin profeté Dios masqui vatsjehe na řón mé ngaxinhi ningoe na cada nchanho que nchejogaha na. Pero masqui jamé, are ndache chó na ixin nagoenxon na Jesús, jańá joinchehe na inchin ondačo profeté Dios icha saho. <sup>28</sup> Co masqui chondaha na razón para nasoenxon na Jesús, pero joinchetsenhe na ñao

Pilato ixin rrorroanha xisoldado para nasoenxon xa Jesús. <sup>29</sup> Mexinxin are joexin goen xa Jesús inchin jitaxin ngain Palabré Dios, chojní jehe joinchegania na de nganito cruz co cjoavá na. <sup>30</sup> Pero Dios joinchexechon jehe Jesús. <sup>31</sup> Co para tsje nchanho Jesús xago ngain chojni que vacao are joixin nonttehe Galilea co sacjoi ngain ciudad de Jerusalén. Co chojni mé tti ndache icha chojni de ixin Jesús jai.

<sup>32</sup> 'Co jañá janha na tenichja na tti jian joajna de ixin tti ndačo Dios ngain nindogoelitoa na xančhjen are saho. <sup>33</sup> Co ján na xanntí xančhjen na de nindogoelitoa na. Mexinxin jai Dios ojoinchexechon Jesús. Co jehe Dios joinchehe mé para ixin ján na inchin jehe ndačo ngain yoxin Salmo sé tiempo vatto. Co Salmo mé ndačo: "Jaha Xanhna. Co janha chjaha vida jai." <sup>34</sup> Co cai are saho Dios cjoago ixin rrojinchexechon Jesús para que rrorrengaha cuerpoe are ndačo ngain Palabré Dios: "Janha sinttanchaon jaha ra inchin ndattjan David." <sup>35</sup> Mexinxin cai ndačo ngain iná Salmo: "Co soixin sanjoha joachaxin para rrorrenga cuerpona janha tti nttaha xá soixin ixin soixin anto rinao na." <sup>36</sup> Co, ndoa, David joinchehe xé Dios ngagué chojni que vintte are tiempoe David inchin coetonha Dios. Pero cot-timeja ndavenhe co xavá čhica nindoha co cuerpoe ndarrenga. <sup>37</sup> Pero cuerpoe Jesús que Dios joinchexechon, xonhi conhe. <sup>38</sup> Mexinxin cain jaha ra chonda que tsonoha ra ixin Jesús nchao nchetjañehe chojni cain tti jianha que nchehe na. <sup>39</sup> Ley que vayé Moisés čhoha nchetjañehe cain

titi jianha que nchehe chojni, pero conixin Jesús cainxin chojni que ditticaon Jesús, ditjañehe cain tti jianha que nchehe na. <sup>40</sup> Mexinxin ttjiho ra cuidado ixin tsoenha nganji ra inchin dicjin profeté Dios ngain tti jitaxin Palabré Dios are ndačo na:

<sup>41</sup> Tsjexin ra, jaha ra x̄o tjanoa ra, tadinttetsjecoa ra co ndasenne ra ixin janha Dios na. Co janha sinttaha ná cosa ngain tiempoa ra co cosa mé sitticaonha ra masqui chojni rrondattjo ra.

<sup>42</sup> Cottimeja are Pablo co xijoicao vačhjexin na de ningoe chojni judío, chojni que jeha judío joinchetsenne na ñao Pablo ixin are sinchejogaha na iná nttiha ijni nchanho, tsinhi na x̄ajeho tti nichja Pablo. <sup>43</sup> Are cainxin chojni vačhjexin nihngo, tsje chojni judío co canxion chojni que jeha judío pero que vaguitticaon na inchin chojni judío, cain nimé rroé na Pablo co Bernabé. Co Pablo co Bernabé ndache na ixin jehe na tsinttoeha na de sinao na Dios.

<sup>44</sup> Are joí nchanho que nchejogaha chojni judío iná, merocoa ngoixin ciudad x̄atte ngain ningoe chojni judío ixin tsinhi na joajné Dios. <sup>45</sup> Pero are chojni judío vicon ixin joí anto tsje chojni, coexinhi na conchjoehe na co coexinhi na nichja na oje que Pablo jinichja co nichja na jianha de ixin Pablo. <sup>46</sup> Cottimeja Pablo co Bernabé x̄aonha are nichja co ndache na:

—Chonda que nichja na joajné Dios nganji ra saho ixin jaha ra judío ra. Pero jaha ra rinaoha ra tsinhi ra co jaha ra x̄axaonha ra ixin jian para

rrochonda ra iná vida naroaxin que xonhi tiempo tsjexin. Mexinxin jaxon janha na rronichja na ngain chojni que jeha judío. <sup>47</sup> Ixin jañá coetonna na Dios, tti chonda cain joachaxin, ixin ndačo: Janha joaqué jaha inchin ná xohi para ixin cainxin nación.

Co para rronichjehe chojni ngoixin mundo que nchao rrochonda na iná vida naroa que xonhi tiempo tsjexin.

<sup>48</sup> Are coinhi chojni que jeha judío, anto ché na co coexinhi na ndačo na ixin joajné Jesucristo, tti chonda cain joachaxin, atto jian. Co cainxin nicoinchiehe Dios ixin chonda na iná vida naroaxin que xonhi tiempo tsjexin, cainxin nimé vitticaon na Jesús. <sup>49</sup> Co jañá coexinhi na nichja na ngoixin nonttehe Pisidia joajné Jesús, tti chonda cain joachaxin. <sup>50</sup> Pero chojni judío nichja ngain canxion nanita que anto jian vaguitticaon inchin chojni judío, co ngain tattita que vinttechonda joachaxin ngain ciudad mé. Co ndache na cain nimé ixin ningaconhe na Pablo co Bernabé. Co hasta vantsjexin na na de ngain nontte mé. <sup>51</sup> Cottimeja Pablo co Bernabé contsjenga na rotté na para ixin vinttji jinche co jamé joinchehe na señal ixin chojni nttiha vitticaonha na joajné Jesucristo. Cottimeja sacjoi na ngain ciudad de Iconio. <sup>52</sup> Co chojni que vaguitticaon Jesús anto ché na co anto vacančjanda na Espíritu Santo para vaquetonhe na.

## 14

*Are Pablo co Bernabé ngain ciudad de Iconio*

<sup>1</sup> Ngain ciudad de Iconio Pablo co Bernabé joixinhi ningoe chojni judío co nichja na jian. Jañá tsje chojni judío co tsje chojni que jeha judío vitticaon na ngain Jesús. <sup>2</sup> Pero chojni judío que vitticaonha Jesús ndache chojni que jeha judío para ningaconhe na co řaxaon na jianha de ixin chojni que vaguitticaon Jesús. <sup>3</sup> Mexinxin Pablo co Bernabé vittohe na nttiha sé co nichja na co řaonha na co chonda na confianza ngain Jesús, tti chonda cain joachaxin. Co Jesús joinchese gurá tti jehe na ndačo na de ixin que řén Dios rinao cain chojni ixin joanjo joachaxin para joinchehe na tsje milagro. <sup>4</sup> Co nchion chojni de ciudad mé řaxaon na inchin chojni judío, co nchion na řaxaon na inchin nirepresentanté Jesús. <sup>5</sup> Mexinxin chojni judío co chojni que jeha judío nichjé na xinchíxin co cjoao chó na ixin rrocyaotte na na co rrocaxin na na řo. <sup>6</sup> Are Pablo co Bernabé conohe mé, sacoiinga na co sacjoi na ngain rajna Listra co ngain rajna Derbe, co ngain nontte te chiaon, co cayoi rajna mé te nonttehe Licaonia. <sup>7</sup> Co nttiha cai nichja na tti jian joajné Jesús.

*Are coaxin na řo Pablo ngain rajna Listra*

<sup>8</sup> Nttiha rajna Listra vehe ná xí que čhoha vacji desde are goan. <sup>9</sup> Xí mé tajittinhi xa tti ndačo Pablo, co Pablo tsjehe xa jian co conohe ixin xí mé vitticaon xa co vechonda xa fe de que ixin nchao rroxingamehe xa. <sup>10</sup> Cottimeja Pablo ndache xa sén:

—Daringattjen jian conixin rottea.

Co xí mé čhinca xa vingattjen xa co coexinhi xa cjoi xa. <sup>11</sup> Co are chojni vicon tti joinchehe Pablo,

coexinhi na coyao na ixin nguigoehé nonttehe Licaonia co ndačo na:

—Joí yó dios nganji na inchin xí.

<sup>12</sup> Co nimé ndačo na ixin Bernabé ná dios vinhi Júpiter co Pablo ná dios vinhi Mercurio ixin jehe tti nichja. <sup>13</sup> Co ngandehe rajna vehe ná nihngo tti vanchecoanxinhi na Júpiter. Co ná xidané Júpiter joiaho coxinttá jittea va tsjo. Co xidána co chojni mé joinao na rrogoen na coxintta para rrojinchesayehe na Pablo co Bernabé. <sup>14</sup> Pero are Bernabé co Pablo, yó de tti representanté Jesús, conohe na yá coinchje na lonttoe na co coinga na cjoí na ngain tti jí tsje chojni co ndačo na sén:

<sup>15</sup> —¿Quedonda jañá tenchehe ra? Janha na xí na inchin jaha ra. Co janha na joíhi na para ixin rrondattjo ra ixin chonda ra que tsinttohe ra cosa jiji que xonhi xé co sitticaon ra Dios tti jichon. Dios mé tti joinchechjian ngajni, nontte, ndachaon co cainxin cosa que jí. <sup>16</sup> Are icha saho Dios coančhanda chojni joinchehe na inchin joinao na. <sup>17</sup> Co masqui jamé, cainxin tiempo jehe nchehe jian ngain chojni co jamé tjago ixin jehe Dios. Jehe nchegania čhin co danjo jian cosecha, co chjá na cain tti jontte na co cai chjá na icha cosa para que ján na anto chá na.

<sup>18</sup> Pero masqui ndačo na cain yá, jehe na anto tangui cayacoenxin na chojni ixin goenha na coxinttá rrocodayexin na.

<sup>19</sup> Cottimeja canxion chojni judío que vitticaonha Jesucristo joixin de ngain ciudad de Antioquía co Iconio co jehe na ndache na chojni rajna Listra ixin coaxin na Pablo xó. Co are joexin coaxin na xó, jehe na xaxaon na ixin ondavenhe



Pablo co coinganji na hasta tti ngandehe rajna. <sup>20</sup> Pero are chojni que vaguitticaon Jesús xatte na ngandaji Pablo, jehe vingattjen co sacjan ngaxinhi rajna iná. Co nchanho yoxin sajoicao Bernabé ngain rajna Derbe.

<sup>21</sup> Ngain rajna Derbe nichja na tti jian joajné Jesucristo, co jañá tsje chojni vitticaon Jesús. Cottimeja cjan na iná ngain rajna Listra co ngain ciudad de Iconio co ngain ciudad de Antioquía. <sup>22</sup> Co ngain cainxin lugar mé Pablo co Bernabé ndache chojni que joinchehe sigue jian vaguitticaon Jesús. Co ndache na na ixin cain chojni chonda que tsixinhi na are anto tangui tsonhe na, co jamé rrochonda na parte ngain tti ttetonha Dios. <sup>23</sup> Co coinchiehe na canxion xí ngain cada lugar para vaquetonhe chojni que vaguitticaon Jesús nttiha. Co are joexin joinchecoanxinhi na Dios co are xa vinttecjáño na, jehe na joinchetsenhe na ñao Jesús, tti chonda cain joachaxin, ixin cjoenguijna cain chojni mé que vaguitticaon ngain jehe Jesús.

*Pablo co Bernabé sacjan ngain ciudad de Antioquía nonttehe Siria*

<sup>24</sup> Cottimeja vatto na ngain nonttehe Pisidia co joiji na ngain nonttehe Panfilia. <sup>25</sup> Co nichja na tti jian joajné Jesucristo nttiha ngain ciudad de Perge. Cottimeja sacjoi na ngain rajna Atalia. <sup>26</sup> Nttiha coaxin na barco co sacjoi na ngain ciudad de Antioquía, tti ciudad joixin na are coexinhi na sacjoi na are chojni que vaguitticaon Jesús nttiha joinchetsenhe na ñao Dios ixin cjoenguijna na ngain xa, co jaxon Pablo co Bernabé sacjan na ixin oJoehe na xa mé. <sup>27</sup> Co are joiji na ciudad de

Antioquía joatse na cain chojni que vaguitticaon Jesús co coequinhi na na cainxin tti joinchehe Dios ngain na co queẓén Dios coančhanda vitticaon chojni que jeha judío. <sup>28</sup> Co Pablo co Bernabé vittohe sé nttiha ngain chojni que vaguitticaon Jesús.

## 15

### *Are ẓatte na ngain Jerusalén*

<sup>1</sup> Co tiempo mé canxion xí que sacjoixin xa de nonttehe Judea para ngain ciudad de Antioquía coexinhi xa joinchecoenhe xa chojni ixin cain chojni que rinao sayé iná vida naroa chonda que tsa na ẓohe que dinhi circuncisión inchin coetonha Moisés. <sup>2</sup> Pero Pablo co Bernabé vitticaonha na ixin chojni que ditticaon Jesús chonda que tsa na ẓohe. Mexinxin anto joinchediscutí chó na. Cottimeja chojni que vaguitticaon Jesús nttiha Antioquía coinchiehe Pablo co Bernabé co icha xí para tsji sicjao representanté Jesús co tti vaquetonhe nivaguitticaon Jesús que jí ngain Jerusalén. Jehé na tsji na sicjao na na queẓén tsonhe, ¿atsa na ẓohe ani nahi?

<sup>3</sup> Chojni que vaguitticaon Jesús ngain ciudad de Antioquía rroanha na na. Sacjoi na co vatto na ngain nonttehe Fenicia co nonttehe Samaria. Co ndache na chojni nttiha ixin tsje chojni que jeha judío jai ovitticaon na ngain Dios. Co cainxin chojni que vaguitticaon Jesús nttiha anto ché na are coinhi na yá.

<sup>4</sup> Are Pablo co Bernabé joiji na ngain ciudad de Jerusalén, cain chojni que vaguitticaon Jesús

conixin cain representanté Jesús co cain xí que vaquetonhe chojni que vaguitticaon Jesús, cain nimé vayé na Pablo co Bernabé. Co coequinhi na na cainxin tti joinchehe Dios ngain na. <sup>5</sup> Pero canxion xifariseo que vaguitticaon Jesús vingattjen xa co vinttendačo xa:

—Chojni que jeha judío chonda que sayé na xohe que dinhi circuncisión are sitticaon na Jesús, co chonda que sinchehe na cainxin tti ttetonha ley que vayé Moisés.

<sup>6</sup> Cottimeja nirepresentanté Jesús co cain xí que vaquetonhe chojni que vaguitticaon Jesús, nimé niŕatte ixin cjoao na de ixin cosa mé. <sup>7</sup> Anto cjoao chó na. Cottimeja Pedro vingattjen co ndache na:

—Jaha ra noha ra ixin icha saho Dios co-inchiehna janha de ngayaha ra para que rrondattjan chojni que jeha judío tti jian joajna que danjo iná vida naroaxin, jamé para que jehe na sitticaon na ngain Jesús. <sup>8</sup> Co Dios, tti chonxin cainxin ansén na, cjoago ixin jehe vayé chojni mé ixin jehe rroanha Espíritu Santo ngain jehe na inchin rroanha nganji ján na. <sup>9</sup> Dios ndačo ixin jehe na co ján na ŕajeho na ngattoxon con jehe ixin jehe joincheroa ansén na por ixin confianza que chonda na ngain Jesucristo inchin joinchehe nganji ján na. <sup>10</sup> Jai, ¿quedonda ditticaonha ra tti joinchehe Dios? Nindogoelitoa na ŕančhjen čoha joinchehe ndo cain tti ndačo ley que vayé Moisés. Mexinxin čoha tsetonhe ra chojni que ditticaon Jesús que jeha judío ixin sinchehe na tsje ley que ni ján na čoha jointtoho na co ni ndogoelitoa na ŕančhjen čoha joinchehe ndo. <sup>11</sup> Ncheha ra jamé. Noa na ixin Dios vanjo iná vida

naroa co xonhi joinhecobrá ixin Jesús, tti chonda cain joachaxin, rinao na ján na co cai jehe na.

<sup>12</sup> Cottimeja cainxin jehe na tencoa na co coinhi na are Bernabé co Pablo coequinhi na quecá señal co milagro joinchehe Dios ngagué chojni que jeha judío. <sup>13</sup> Are joexin nichja na, Jacobo ndačo:

—Hermano, ttinna ni ra: <sup>14</sup> Simón Pedro coequinna na quexén Dios cjoago ixin anto rinao chojni que jeha judío co coinchiehe chojni mé cai para soan chojni Dios. <sup>15</sup> Cainxin yá inchin tti ocjin profeté Dios ngain tti jitaxin Palabré Dios. Co Palabra mé ndačo:

<sup>16</sup> Cottimeja janha rrocjan na sihi iná co inchin ná tti ttette nchia que oxantte, jañá janha sinttaha para ixin chojni sinchesayana na inchin joinchesayana na are tiempoe David;

janha sinttaha para ixin chojni sinchecoanxinna co sinchehe inchin janha rrondačjan,

<sup>17</sup> jañá sinttaha para que chojni ngoixin mundo sinao sitticaon na,

co para ngain cainxin nación sintte chojnina.

<sup>18</sup> Jañá čo Dios, tti chonda cain joachaxin, que joinchenona na cainxin jihi desde osé.

<sup>19</sup> Mexinxin janha ndačhjan ixin inttogetanha na tangui chojni que ditticaon Dios que jeha judío.

<sup>20</sup> Jeho rrocjinhi na na ixin isineha na tti joaquehe na ngain ídolo. Co ixin sinttejoacaoha na nčí que jeha nčíchihhi na o xí que jeha xixihi na, co ixin sineha na nntaohe coxigo diguisinguehe na ttosin ixin coxigo mé dinttjinguha va jni, co sineha na jní va cai. <sup>21</sup> Ixin ngain cada rajna co para tsje nano te chojni que nchecoenhe chojni ley que

vayé Moisés, co ley mé tsjehe na ngain ningoe chojni judío cada nchanho que nchejogaha na.

<sup>22</sup> Cottimeja nirepresentanté Jesús co tti xí que vaquetonhe chojni que vaguitticaon Jesús, conixin cainxin chojni que vaguitticaon Jesús ntiha Jerusalén, cain nimé cjoao chó na ixin coinchiehe na canxion chojni de ngagué na para rroanha na na conixin Pablo co Bernabé ngain ciudad de Antioquía. Coinchiehe na Judas que cai vinhi Barsabás co iná xí vinhi Silas. Co chojni que vaguitticaon Jesús anto vechonda respeto ngain cayoi xí mé. <sup>23</sup> Co chojni que coinchiehe na joinchechjian ná carta, co Judas co Silas joicao carta mé para ngain ciudad de Antioquía. Co carta mé ndačo carta:

“Janha na xo representante na de Jesús co xo ttetonhe chojni que ditticaon Jesús conixin cain icha chojni que ditticaon Jesús nttihi chjaha ra joajna jaha ra xo jeha judío ra pero ditticaon ra Jesús, jaha ra xo te ra ngain Antioquía co ngain nonttehe Siria co ngain nonttehe Cilicia. <sup>24</sup> Janha na coian na ixin canxion chojni cjoixin de nttihi co jointtaguetanha ra na tangui conixin tti ndačo na. Mexinxin jaha ra noaha ra quehe nchao sinchehe ra ixin jehe na ndattjo ra na ixin chonda que tsa ra xohe co sitticaon ra tti ttetonha ley que vayé Moisés. Pero xonhi tiempo janha na chjaha na na joachaxin para nichja na jañá. <sup>25</sup> Mexinxin cjoao chian na co xaxanho na ixin anto nchao jí ixin coinchiá na canxion chojni ngaguehna na ixin tsji na sitsjaha ra na conixin Bernabé co Pablo, tti ján na rinao na co tti ditticaon Jesús inchin cain na. <sup>26</sup> Co jehe na coín vidé na en

peligro de ixin causexin Jesucristo, tti chonda cain joachaxin para ixin ján na. <sup>27</sup> Mexinxin rroanha na Judas co Silas nganji ra co jehe na rroundattjo ra na cainxin tti cjoao chian na. <sup>28</sup> Espíritu Santo cjoenguijna na, mexinxin xaxanho na ixin nchao jí ixin itsetoanha ra na sitticaon ra tsje ley que anto tanguí para ixin chojni sinchehe. Jeho ley tehi chonda que sitticaon ra: <sup>29</sup> sintteha ra nntaohe coxigo que joaquehe na ngain ídolo, co cai sintteha ra jní va co ni sintteha ra nntaohe coxigo que diguisinguehe na ttosin, co sinttečhicoha ra nčhí que jeha nčhíchiha ra, ni xí que jeha xixiha ra. Co si sitticaon ra cain jihi, sinchehe ra jian. Dios senda ra tti te ra.” Jañá jitaxin carta.

<sup>30</sup> Cottimeja orroanha na na co sacjoi na ngain ciudad de Antioquía. Co nntiha joatse na cainxin chojni que vaguitticaon Jesús co joanjo na carta que joicao na. <sup>31</sup> Co are chojni que vaguitticaon Jesús tsjehe na carta mé, anto ché na ixin tti jitaxin ngá xón vantsjehe na joachjaon chonda ansén na. <sup>32</sup> Co ixin Judas co Silas cai chonda joachaxin de ndache chojni joajna que vayé na de ngain Dios, mexinxin jehe na anto joincheconsolá na co joincheanimá na chojni nntiha conixin tti ndache na na. <sup>33</sup> Co Judas co Silas vittohe canxion nchanho nntiha. Cottimeja are sacjan na ngain tti nirroanha na, chojni que vaguitticaon Jesús chjé na na joajna are sacjoi na. <sup>34</sup> Pero Silas ndačo ixin sittohe nntiha nchion icha. <sup>35</sup> Co cai Pablo co Bernabé vittohe nntiha ngain ciudad de Antioquía. Cayoi nimé co icha tsje chojni nichja na co joinchecoenhe na na joajné Jesucristo, tti chonda cain joachaxin.

*Are Pablo sacjoi nttiha yoxin para ixin nichja joajné Dios*

<sup>36</sup> Are ovatto nchion tiempo, Pablo ndache Bernabé:

—Chjin na iná ngain cainxin rajna tti nichja na joajné Jesucristo, tti chonda cain joachaxin. Sitsjehe na cain nihermano para tsonoa na si xa tenchehe na sigue ditticaon na jian ngain Jesús o ani nahi.

<sup>37</sup> Bernabé joinao rrojicaon Juan Marcos cai, <sup>38</sup> pero Pablo joinaoha rrojicaon na Juan Marcos iná ixin are saho coixinha joinchehe xa conixin jehe na, ixin are jehe na ngain regioen Panfilia, Juan Marcos cointtohe na co sacjoi Jerusalén.

<sup>39</sup> Anto joinchediscutí na hasta vačhjendehe chó na. Bernabé sajoicaon Marcos, co coá na barco co sacjoi na nontte ngosine ndachaon dinhi Chipre.

<sup>40</sup> Pero Pablo coinchiehe Silas. Co chojni que vaguitticaon Jesús joinchetsenhe na ñao Dios ixin jehe senda na. Cottimeja Pablo co Silas sacjoi na. <sup>41</sup> Co vatto na ngain nonttehe Siria co ngain nonttehe Cilicia. Nttiha joincheanimá na chojni que vaguitticaon Jesús.

## 16

*Pablo co Silas joicaon na Timoteo*

<sup>1</sup> Pablo co Silas joiiji na rajna Derbe co rajna Lистра. Nttiha Lистра jí ná xí tti vaguitticaon Jesús que vinhi Timoteo. Janné xa ná judía que vaguitticaon jan Jesús, co ndodé xa ná chojni griego. <sup>2</sup> Chojni que vaguitticaon Jesús que te na ngain rajna Lистра co ngain ciudad de Iconio nichja na jian de ixin jehe xa. <sup>3</sup> Co Pablo joinao joicaon Timoteo,

mexinxin chjé xóhe que dinhi circuncisión para que tsoñaoha chojni judío que vintte nttiha, ixin cain chojni mé nohe na ixin ndodé xa ná chojni griego co chojni griego ndačo ixin chondaha que tsa ni xóhe mé. <sup>4</sup> Co ngain cainxin rajna vatto na ndache na chojni que vaguitticaon Jesús cainxin tti cjoao chó nirepresentanté Jesús conixin tti xí que vaquetonhe chojni que vaguitticaon Jesús ngain ciudad de Jerusalén. <sup>5</sup> Co jañá chojni anto jian vaguitticaon Jesús co cada nchanho icha tsje chojni coexinhi vitticaon Jesús.

*Pablo vicononxinhi ná xí de nonttehe Macedonia*

<sup>6</sup> Espíritu Santo coančjandaha na nichja na joajné Dios ngain nonttehe Asia. Mexinxin vangaria na nonttehe Frigia co nonttehe Galacia. <sup>7</sup> Co joiiji na ngandehe nonttehe Misia. Cottimeja xaxaon na rrogatto na ngain nonttehe Bitinia. Pero Espíritu Santo que Jesús rroanha coančjandaha na. <sup>8</sup> Mexinxin jehe na vatto na nonttehe Misia hasta joiiji na ciudad de Troas jí ngandehe ndachaon. <sup>9</sup> Co nttiha are ttie, Pablo vicononxinhi ná xí que joixin xa de nonttehe Macedonia. Co xí mé tajingattjen xa co jinchetsenhe xa ñao Pablo co ndačo xa: “Datto sihi nttihi nonttehe Macedonia co ttjenguijna ni ra.” <sup>10</sup> Co ixin Pablo vicon cain yá, janha na jointtachjian na tti cjoinha na are sacjoi na nonttehe Macedonia. Co conona na ixin Dios rroanha na ixin nichja na tti jian joajna ngain chojni que te nttiha.

*Pablo co Silas ngain Filipos*



<sup>11</sup> Ngain ciudad de Troas janha na coaxin na barco co sacjoi na nao ngain nonttehe Samotracia que jí ngosine ndachaon. Co nchanho yoxin sacjoixin na nonttehe Samotracia co joaso na ngain rajna Neápolis. <sup>12</sup> De nttiha cjoi na ngain ciudad de Filípos. Ciudad mé ná ciudé chojni romano. Co ciudad mé icha importante que vehe lado činxin nchanho ngain nonttehe Macedonia. Nttiha vintte na janha na canxion nchanho. <sup>13</sup> Ná nchanho que nchejogaha chojni judío janha na vačhjexin na de ngain ciudad mé co sacjoi na ngandehe ndarío tti vačatte chojni judío para vanchecoanxinhi na Dios. Joaso na tavintte na nttiha co nichja na joajné Dios ngain ninčí dixatte nttiha. <sup>14</sup> Ná de tti nčí mé vinhi Lidia co nčí mé joixin nča de ngain ciudad de Tiatira. Co jehe nča vanchecji nča manta morado anto fino. Co nčí mé anto vanchecoanxinhi nča Dios inchin chojni judío. Co are janha na nichja na, jehe nča tajittinhi nča, co Dios, tti chonda cain joachaxin, cjoenguijna nča vitticaon nča tti jindačo Pablo. <sup>15</sup> Cottimeja joiguitte nča, jehe nča conixin nindoha nča. Cottimeja joinchetsenna na nča ñaho na co ndačo nča:

—Si jaha ra ditticaon ra que janha ndoa ditticanho Jesús, tti chonda cain joachaxin, chjin na nchiania sintte ra.

Co jañá joinchetsenna na nča ñaho na co sacjoinha na nča.

<sup>16</sup> Ná nchanho are janha na sacjoi na tti nchecoanxinxin na Dios, ngatja nttiha vetan na ná xannčí que vechonda xan ná espíritu jianha. Co espíritu mé vanchenichja xan cosa de quehe

tsonhe. Co jañá vagacha xan tsje tomi para ixin ninajní xan. <sup>17</sup> Xannčí mé coexinhi xan rroehna na xan Pablo co janha na. Co jehe xan jitoyao xan, co ndačo xan:

—Xí tehe xinchehe xé Dios tti ttjen ngajni. Co ndattjo ra xa quežén rrochonda ra iná vida nara.

<sup>18</sup> Jañá joinchehe xannčí mé tsje nchanho. Mexinxin Pablo coñao co ngaria co ndache espíritu jianha ngaxinhi xan:

—Conixin nombré co joachaxín Jesucristo janha ttetonha dačhjexin de ngain xannčí yá.

Co rato mé espíritu jianha vačhjexin de ngain xan.

<sup>19</sup> Pero are cain xinajní xan vicon xa que ičoha sachaxin xa xan icha tomi, tse xa Pablo co Silas co joicao xa ngain centroe ciudad tti jí xipolicía.

<sup>20</sup> Cottimeja joinchechienhe xa ngain xijuez romano co ndačo xa:

—Xí tehe judío, co ncheñao xa chojni ngain ciudad na. <sup>21</sup> Jehe xa nchecoenhe xa chojni costumbré xa co ján na čoha sinttoho na ni čoha sotticaon na ixin ján na romano na.

<sup>22</sup> Cottimeja chojni ngain ciudad ningaconhe na na. Co coetonha xijuez ixin vantsjehe na na lonto co goenxin na na nttá. <sup>23</sup> Co are joexin anto goen na na, xaxinhi na na ngaxinhi cárcel co coetonhe na tti jinda cárcel ixin jian venda. <sup>24</sup> Co are tti jinda cárcel coinhi mé, xaxinhi Pablo co Silas cuarto jí icha ngaxinhi cárcel mé co joaquehe rotté na ngagué yó nttá.

<sup>25</sup> Co are inchin ngosine ttie, Pablo co Silas tenchecoanxinhi na Dios co tetsje na himno ngain Dios, co icha chojni teaxinhi coinhi na mé. <sup>26</sup> Co

rato mé coingui nontte anto soji hasta contsjenga  
xo tenganguihi cárcel mé. Co rato mé xiré cainxin  
puerté cárcel co xindanguehe cainxin cadena  
techoaxin tti teaxinhi. <sup>27</sup> Co are mé tti jinda cárcel  
xingamehe. Co are vicon ixin tajiŋangué cainxin  
puerté cárcel, vantsje espadé para rrogoenxin  
cuerpoe ixin ŋaxaon que niteaxinhi osacoinga na.  
<sup>28</sup> Pero Pablo coyaotte co ndache:

—Nahi, jañaha nchehe. Cain janha na te na  
nttihi.

<sup>29</sup> Cottimeja tti jinda cárcel joanchia ná ŋohi co  
coinga joixinhi co jiŋanga ixin joaŋaon co cjo  
vettoxin nttajochjihi čhica rotté Pablo co Silas.  
<sup>30</sup> Cottimeja joantsje na co joanchianguihi na co  
ndačo ngain na:

—Soixin ra, ¿quehe chonda que sinttaha para  
sayá iná vida naroa?

<sup>31</sup> Co jehe na ndačo na:

—Ditticaon ngain Jesucristo, tti chonda cain  
joachaxin, co jamé jaha conixin cain nindoi rro-  
chonda ra iná vida naroa.

<sup>32</sup> Cottimeja Pablo co Silas ndačo na joajné  
Jesúcristo ngain jehe tti jinda cárcel co ngain cain  
nindoha. <sup>33</sup> Co are ŋa ttie, jehe tti jinda cárcel  
joincheŋoenhe tti conihi Pablo co Silas ixin vicaon  
na. Cottimeja jehe co cain nindoha joiguite na.  
<sup>34</sup> Co tti jinda cárcel sajoicao na nchiandoha co chjé  
na joine na. Co jehe conixin nindoha anto ché na  
ixin vitticaon na Dios.

<sup>35</sup> Co are ndoexin xijuez rroanha xa xipolicía  
ngain tti jinda cárcel ixin rrogantsje Pablo co Silas.

<sup>36</sup> Cottimeja tti jinda cárcel ndache Pablo:

—Xijuez coetonna ixin santsje jaha ra. Mexinxin nchao satsji ra. Dio sitaonha ra nttiha.

<sup>37</sup> Pero Pablo ndache xipolicía:

—Janha na chojni romano na. Co cjoih na ngain juzgado para chojni rrondačo ajian o jianha na. Pero masqui jamé, goen na na co tsje chojni tatetsjehe. Cottimeja coiaxinna na na ngaxinhi cárcel. Co jaxon rinao na santsje na na jimao. ¡Jañá nahi! Ndache ra jehe na ixin tsí na jehe na mismo para santsje na na.

<sup>38</sup> Xipolicía coequinhi xa cain yá xijuez romano, co xijuez xaon xa are conohe xa ixin Pablo co Silas chojni romano. <sup>39</sup> Cottimeja sacjoi xa ngain Pablo co Silas co joinchetsenhe xa ñao na ixin sinchetjañehe na xa. Cottimeja joantsje na xa de ngain cárcel co joinchetsenhe xa ñao na ixin satsjixin na de ngain ciudad mé. <sup>40</sup> Are vačhjexin na de ngain cárcel, sacjoi na nchiandoha Lidia. Cottimeja joitsjehe na chojni que vaguitticaon Jesús co joincheanimá na. Cottimeja sacjoi na.

## 17

### *Are chojni ngain Tesalónica coñao*

<sup>1</sup> Co are sacjoi Pablo co Silas, vatto na ciudad de Anfípolis co ciudad de Apolonia. Cottimeja joihi na ciudad de Tesalónica. Co nttiha vehe ná ningoe chojni judío. <sup>2</sup> Vittohe na nttiha Tesalónica ní semana, co cada nchanho que joinchejogaha na, Pablo cjoi ningoe chojni judío co nichjé nite nttiha, inchin costumbre que chonda Pablo ngain cainxin rajna. <sup>3</sup> Jehe ndache na ixin ngain tti jitaon Palabré Dios ndačo ixin Cristo chonda que

vetan tangui co después que ndavenhe chonda que cjan xechon. Co ndache na:

—Tti Jesús que janha rrindattjo ra, jehe mé tti Cristo.

<sup>4</sup> Cottimeja canxion chojni judío vitticaon ngain Jesús co vacao na Pablo co Silas. Co cai tsje chojni griego que vaguitticaon Dios inchin chojni judío coexinhí na vitticaon na Jesús. Co cai tsje nčí importante vitticaon ncha Jesús. <sup>5</sup> Pero chojni judío que vitticaonha conchjoehe na co joatte na canxion xí que nchehe jianha rridinttecoa ngá ntiha. Co cain nimé joinchequinga na chojni ngain ciudad. Co afuerza joixinhi na nchiandoha Jasón ixin tettjé na Pablo co Silas ixin rrogantsjexin na de nttiha co rrojicao na ngain chojni. <sup>6</sup> Pero ixin vittjaha na Pablo co Silas nttiha, mexinxin coinganjincoa na Jasón co icanxin chojni que vaguitticaon Jesús, co joicao na ngain xinchíxin co xipolicía de ciudad mé. Co ndačo na sén:

—Xí tehe ngoixin mundo joinchexenga xa chojni co cai nttihi joí xa. <sup>7</sup> Co Jasón vayé xa nchiandoha co cainxin jehe xa ningaconhe xa ley de rey romano ixin ndačo xa que jí iná rey que chonda icha tsje joachaxin que dínhi Jesús.

<sup>8</sup> Are chojni co autoridad de ngain ciudad mé coinhi na cain yá, anto coñao na. <sup>9</sup> Pero Jasón co icha nihermano que tse autoridad joanjo na tomi co mexinxin coančjanda na na.

### *Are Pablo co Silas vinttecji rajna Berea*

<sup>10</sup> Co are naxin xehe ttie mé, chojni que vaguitticaon Jesús chjé na na joajna, co Pablo co Silas sacjoi na para rajna Berea. Co are joiji na nttiha,

sacjoi na ningoe chojni judío. <sup>11</sup> Chojni judío que te nttiha icha joinao na coinhi na joajné Dios que nite ciudad Tesalónica. Anto coinhi na joajna mé co cada nchanho vacjé na tti jitaxin Palabré Dios para sicon na andoa tti tendache na na ni nahi. <sup>12</sup> Co jañá tsje chojni judío vitticaon ngain Jesús co cai ngagué chojni griego tsje nchí importante co tsje xí vitticaon na Jesús. <sup>13</sup> Cottimeja are chojni judío que te ciudad de Tesalónica conohe na ixin Pablo jinichja joajné Dios ngain rajna Berea cai, cjoi na nttiha para joincheñao na chojni ngain Pablo co Silas. <sup>14</sup> Pero chojni que vaguitticaon ngain Jesús toin rroanha na Pablo ngandehe ndachaon. Pero Silas co Timoteo vintteguittohe ngain rajna Berea. <sup>15</sup> Pablo sacjoi co cai canxion chojni sajoicao hasta tti ngain ciudad de Atenas. Co nttiha are sacjan na Berea, Pablo coetonhe na ixin ndache na Silas co Timoteo toin satsji na ngain Pablo.

### *Are Pablo cjoi Atenas*

<sup>16</sup> Are Pablo jichonhe Silas co Timoteo ngain ciudad de Atenas, jehe çhjoinha conohe ixin vicon nttiha anto tsje retratoe ídolo. <sup>17</sup> Mexinxin cjoi ngain ningoe chojni judío para nichjé jehe na conixin icha nivaguitticaon Dios inchin chojni judío. Co cai cada nchanho nichja ngain nivaguetan ngain ndásin. <sup>18</sup> Cottimeja canxion chojni coexinhi na nichja na ngain Pablo. Canxion chojni mé vacangui na tti çaxaon canxion xí vinhi epicúreos, co ícanxin na vacangui na tti çaxaon canxion xí vinhi estoicos. Canxion de jehe na ndaço na:

—¿Quehe jindaço xí yá que anto nichja xa?

Co icanxin na ndačo na:

—Jehe rinao sinchecoenhe chojni de ixin icanxin dios.

Jaña ndačo na ixin Pablo jinichjé na tti jian joajna de ixin Jesús co ndache na ixin cain chojni nchao rroxechon. <sup>19</sup> Cottimeja savicao na Pablo ngain ná jna vinhi Areópago, tti vařatte autoridad de ngain ciudad mé. Co nttiha jehe na ndačo na:

—Rinaho na tsonona na tti jaha rrinchecoenhe chojni. <sup>20</sup> Ixin tti rrinichja oje para ixin janha na. Co rinaho na tsonona na quehe rročo cain yá.

<sup>21</sup> Jaña ndačo na ixin cainxin chojni que te ngain Atenas co cai chojni que joixin cjin que te na nttiha, cain nimé anto vancheřoxinhi na vaquinhi na co vanichja na de ixin quexeho joajna naroaxin.

<sup>22</sup> Cottimeja Pablo vingattjen ngagué chojni mé nttiha Areópago co ndačo:

—Janha vicon ixin jaha ra řo te ra nttihi Atenas anto nchesayehe ra tsje dios. <sup>23</sup> Ixin are janha ngaria ngagaha rajná ra tsjá quecá tti nchesayexin ra dios. Are mé vittja ná tti dinchetsonji ra co nttiha jitaxin: “Jihi para ixin dios que chonxinha na.” Co jaxon janha rrinichja nganji ra de ixin Dios mé que jaha ra nchecoanxinhi ra masqui chonxinha ra.

<sup>24</sup> Tti Dios que joinchekhjian mundo co cainxin cosa que jí, jehe tti chonda cain joachaxin ngajni co nttihi ngataha nontte. Jehe dittoeha ngaxinhi nihngo que chojni nchekhjian. <sup>25</sup> Co jehe rrogondeha tti nchekhjian chojni para ixin jehe ixin jehe mismo tti chjá na vidá na co ĉhintto co cainxin tti dondá na cainxin na.

<sup>26</sup> Cainxin chojni que jí ngataha nontte joixin de tti nacoa chojni que joinchechjian Dios are saho. Co Dios coetonhe na ixin sintte na ngoixin ngataha nontte, co jehe coetonha quesa co quettinó sintte na. <sup>27</sup> Jamé joinchehe Dios ixin rinao que chojni tsjé na jehe co sitticaon na jehe ixin jehe cjinha jí de nganji naná ján na. <sup>28</sup> Ixin jí Dios, mexinxin techonxin na, tettingui na co nttoho na cain. Cai inchin coentaxin canxion tattita que dicjin xón nttihi nontteha ra are osé, co dicjin na jañá: “Ján na chojní Dios na.” <sup>29</sup> Mexinxin ixin ndoa que ján na chojní Dios na, xaxaonha na ixin Dios inchin ná cosa de oro ni de plata ni de xo que chojni joinchechjian conixin rá inchin xaxaon na. <sup>30</sup> Dios chjeha castigo ixin tti jianha que vanchehe chojni anto osé, ixin chojni mé vechonxinha jehe. Pero jai Dios ttetoan na cainxin na ngoixin mundo ixin tsentoxinhi na vidá na <sup>31</sup> ixin Dios ocoinchiehe ná nchanho are jehe sinchejuzguehe cainxin chojní ngoixin mundo. Co Dios coinchiehe ná xí para juez. Co jehe Dios cjoago ixin jihi seguro are joinchexechon xí mé.

<sup>32</sup> Are coinhi na ixin jí ná chojni que oxechon, canxion na cjoanoa na co icanxin na ndačo na:

—Otsian na icha are jaha rronichja iná.

<sup>33</sup> Cottimeja Pablo cointtohe na co sacjoi. <sup>34</sup> Pero canxion chojni vitticaon na ngain Jesús co savicao na Pablo. Ngagué chojni mé vehe ná xí vinhi Dionisio. Co xí mé vehe xa ná juez nttiha Areópago. Co cai ngagué chojni que vitticaon ngain Jesús vehe ná nanita vinhi Dámaris co icha chojni.



# 18

## *Are Pablo ngain Corinto*

<sup>1</sup> Cottimeja Pablo vačhjexin de ciudad de Atenas co sacjoi ngain ciudad de Corinto. <sup>2</sup> Co nttiha vetan ná judío que vinhi Aquila. Xí mé goanxin xa nonttehe Ponto. Nchion icha saho Aquila co čihi que vinhi Priscila joixin na nonttehe Italia ixin tiempo mé Claudio vehe emperador nttiha Roma, capitál de nonttehe Italia, co coetonha ixin cainxin chojni judío chonda que sačhjexin na de Roma. Cottimeja Pablo cjoí joitsjehe na ngain ciudad de Corinto. <sup>3</sup> Pablo joinohe řajeho řa que jehe na, ixin canio na joinohe na vanchechjian na nchia de ixin manta. Mexinxin Pablo vittohe ngain na para ixin sinchehe na řa mé. <sup>4</sup> Co cada nchanho que nchejogaha chojni judío, Pablo sacjoi ngain ningoe na co nttiha nichja de ixin Dios co cjoao chojni judío conixin chojni que jeha judío para que vitticaon na ngain Jesucristo.

<sup>5</sup> Co are Silas co Timoteo joixin na nonttehe Macedonia, Pablo ijoinchechjianha nchia de ixin manta, sino que nichja tti jian joajna nchanho co nchanho, co joinchecoenhe chojni judío ixin Jesús ndoa tti Cristo que jehe na techonhe na. <sup>6</sup> Pero chojni mé ningaconhe na co nichja na jianha de ixin jehe Pablo. Mexinxin Pablo contsenga lonttoe para ixin cain jinche cointtji nche ngataha nontte inchin ná señal que jehe satsji, co ndache na:

—Are ndasenhe ra sinchetján ra co jaho ra setsingataha ra co janha idancataha ni ra. Jaxon satsji janha para ixin rronichja tti jian joajna ngain chojni que jeha judío.

<sup>7</sup> Cottimeja vačhjexin ningoe chojni judío co sacjoi nchiandoha ná xí vinhi Justo. Xí mé jeha ná judío, pero vaguitticaon xa Dios inchin chojni judío. Co nchiandoha xí mé vehe nchia čhica ningoe chojni judío. <sup>8</sup> Co ná xí vinhi Crispo vaquetonha ngain nihngo mé. Co jehe xa conixin cainxin nindoha xa vaguitticaon na ngain Jesús, tti chonda cain joachaxin. Co cai anto tsje chojni nttiha ngain ciudad de Corinto coinhi na joajné Dios co vitticaon na ngain Jesús co joiguite na. <sup>9</sup> Cottimeja ná ttie Pablo vicononxinhi Jesús. Co jehe ndache Pablo:

—Xaonha, sino que nchehe sigue ndache chojni joajnana, co tencoaha <sup>10</sup> ixin janha rrihi nganji para ixin ttjenguijna co xonhi chojni nchao sintaniha jaha. Mexinxin xaonha ixin tsje chojni ngain ciudad jiji, mé chojnina janha.

<sup>11</sup> Mexinxin Pablo vittohe ná nano co rioho ntiha Corinto para cjoagoe na joajné Dios.

<sup>12</sup> Pero are Galión vehe xigobernador ngain nonttehe Acaya, chojni judío xatte na para ixin tse na Pablo. Co joicao na ngain juzgado, <sup>13</sup> co ndache na xigobernador:

—Xí jiji jittingaria jitjagoe chojni ixin ojé sinchecoanxinhi na Dios co jeha inchin jitaxin ley que janha na chonda na.

<sup>14</sup> Co Pablo rrojinichja are Galión ndache chojni judío:

—Si xí jiji rrojinchehe xa jianha inchin rroca-coa xa cosé na o rrogoen xa chojni, janha rroquian tti tendačo ra, jaha ra xo judío ra. <sup>15</sup> Pero jeha jamé. Jaha ra toñao ra jeha ixin jehe xa ojé jitjagoe

xa chojni quehe jitaxin ngain leya jaha ra. Janché jaho ra tjao chó ra de ixin cosa jihi ixin janha rinaoha rrožanttexin rana.

<sup>16</sup> Co jehe vantsjexin na de nttiha. <sup>17</sup> Cottimeja chojní Galión tse na Sóstenes, tti vaquetonha ngain ningoe chojni judío. Co vintja na jehe Sóstenes nttiha ngattoxon con xigobrnador. Pero masqui Galión vicon cain yá, jehe xonhi joinchehe ixin cosa mé ndosenha jehe.

*Are Pablo cjan Antioquía co coexinhi nttiha ninxin para joinichja joajné Dios icanxin rajna*

<sup>18</sup> Pablo xa vittohe tsje nchanho nttiha Corinto. Cottimeja jehe chjé joajna chojni que vaguitticaon Jesús ixin satsji jehe conixin Aquila co Priscila. Co are joiji na rajna Cencrea, Pablo cjinhi já inchin ná señal que jehe ojoinchecumplí ná promesa ngain Dios. Cottimeja canio na cjoí na coá na ná barco ixin satsji na ngain nonttehe Siria. <sup>19</sup> Are joiji na ciudad de Efeso, Pablo cointtohe Priscila co Aquila co sacjoi ngain ningoe chojni judío co cjoao chó chojni judío que važatte nttiha. <sup>20</sup> Co joinchetsenhe na ñao Pablo ixin rroguittohe icha sé nttiha, pero jehe čhoha. <sup>21</sup> Cottimeja chjé na joajna co ndačo:

—Chonda que sarihi ngain ciudad de Jerusalén are tsexinhi quiai que jitonchiaon. Pero si Dios rinao, rrocjan na janha sihi iná sitsjaha ra.

Cottimeja coá barco co sacjoixin de ngain Efeso. <sup>22</sup> Co are joiji ciudad de Cesarea Pablo vaniixin de barco co sacjoi ngain ciudad de Jerusalén para ixin chjé joajna ngain chojni que vaguitticaon Jesús nttiha. Cottimeja sacjoi ngain ciudad de

Antioquía. <sup>23</sup> Co vittohe canxion nchanho nttiha Antioquía. Cottimeja sacjoi iná co ngaria cainxin rajna ngain nonttehe Galacia co nonttehe Frigia co nttiha joincheanimá cainxin chojni que vaguitticaon Jesús.

*Are Apolos vanichja de ixin Dios ngain Efeso*

<sup>24</sup> Co are mé joihi ná xí judío ngain ciudad de Efeso, co xí mé vinhi xa Apolos co jehe xa diquixin xa de ciudad de Alejandría. Jehe xa anto jian nichja xa de ixin Dios co anto nohe xa tti jitaxin Palabré Dios. <sup>25</sup> Jehe xa ochonxin xa tsje de ixin quexén Jesucristo, tti chonda cain joachaxin, rinao sinchehe chojni. Co jehe xa anto vaché xa ixin vanichja xa de ixin Jesús, co jian vanchecoenhe xa chojni de ixin Jesús. Pero jehe xa jehovachonxin xa de tti vancheguitte Juan chojni. <sup>26</sup> Co jehe Apolos xaonha co anto nichja ngain ningoe chojni judío. Co are coinhi Priscila co Aquila tti ndačo Apolos, joicao na ngain nchiandoha na co joinchecoenhe na icha jian de ixin quexén Dios rinao sinchehe chojni. <sup>27</sup> Cottimeja are Apolos ndačo ixin satto ngain nonttehe Acaya, chojni que vaguitticaon Jesús nttiha Efeso cjoenguijna jehe ixin rroanha na ná carta ngain chojni que vaguitticaon Jesús nttiha Acaya ixin sayé na jian. Co are Apolos joihi ngain nonttehe Acaya, anto cjoenguijna tsje chojni que Dios chjé joachaxin ixin vitticaon na Jesús. <sup>28</sup> Apolos co chojni judío anto cjoao chó na co Apolos cjoagoe cainxin chojni ixin tti vařaxaon chojni judío nchaoha jí, co tti vandačo Apolos jehe na čhoha vandačo na ixin nchaoha jí cai porque jehe vacjagoe na conixin tti

jítaxin Palabré Dios ixin Jesús ndoa tti Cristo, tti Dios coinchiehe co tti jehe na techonhe na.

## 19

### *Are Pablo ngain Efeso*

<sup>1</sup> Are Apolos xa vehe ngain ciudad de Corinto, Pablo vatto ngain cainxin rajna que vintte ngagaha jna. Co jañaxon hasta joihi ngain ciudad de Efeso, tti vetan canxion chojni que vaguitticaon Jesús. <sup>2</sup> Co joanchianguihi na co ndačo ngain na:

—¿Ajoí Espíritu Santo nganji ra conixin joachaxin are vitticaon ra?

Co jehe na joattehe na:

—Janha na xonhi tiempo ttian na ixin jí Espíritu Santo.

<sup>3</sup> Cottimeja Pablo joanchianguihi na:

—Mexinxin ¿quexén joiguitte ra?

Jehe na joattehe na:

—Inchin Juan ndačo para joiguitte na.

<sup>4</sup> Pablo ndache na:

—Ndoa, Juan joincheguitte chojni que coentoxinhi vidé. Pero cai jehe ndache chojni ixin chonda na que sitticaon na ná tti tsí después de jehe. Co jehe mé ojoí, co jehe mé Jesús tti Cristo.

<sup>5</sup> Co are coinhi na jamé, cain na joiguitte na para goan na chojni Jesús, tti chonda cain joachaxin.

<sup>6</sup> Co are Pablo joaquehe rá ngataha já na, Espíritu Santo joí ngain na conixin joachaxin co jehe na coexinhi na nichja na ojeje nguigoa co nichja na joajna que vayé na de ngain Dios. <sup>7</sup> Co cain nivitticaon inchin tteyó xí.

<sup>8</sup> Pablo vittohe nttiha ciudad de Efeso ní conittjao co vacji ningoe chojni judío tsje nttiha. Nttiha

vanichja ngain chojni conixin confianza, co cjoao na para cjoagoe na de ixin quexén Dios ttetonha. <sup>9</sup> Pero canxion chojni joinaoha na vitticaon na tti ndačo Pablo. Co nimé johó nichja na jianha de ixin tti jian joajné Jesucristo ngatte con icha chojni. Cottimeja Pablo vačhjendehe jehe na co savicao chojni que vaguitticaon Jesús ngain ná escuelé ná ximaestro vinhi Tiranno. Co nttiha vanichja cainxin nchanho. <sup>10</sup> Co jańá vanchehe ngoixin yó nano. Mexinxin cainxin chojni que vintte ngain nonttehe Asia coinhi na joajné Jesús, tti chonda cain joachaxin. Chojni judío co cai chojni que jeha judío coinhi na mé. <sup>11</sup> Co Dios joanjo joachaxin ngain Pablo para ixin jehe joinchehe tsje milagro. <sup>12</sup> Anto tsje joachaxin joanjo Dios hasta chojni joiaho mantachjan co joiaho lontto que joincheguindatte na cuerpoe Pablo. Co are vajicao na cosa mé ngain chojni tenihi, chojni mé vaxingamehe na co tti espíritu jianha vagačhjexin de ngaxinhi na.

<sup>13</sup> Pero vehe cai canxion chojni judío que vangaria co vagantsje espíritu jianha de ngain chojni. Co chojni mé joinao rrojinchegonda na nombré co joachaxín Jesús, tti chonda cain joachaxin, para ixin rrogantsjexin na espíritu jianha de ngain chojni. Co ndache na espíritu mé:

—Conixin nombré Jesús, tti nombre que Pablo nichja, janha na ttetonha ra ixin dačhjexin ra de ngain chojni.

<sup>14</sup> Jańá joinchehe tti yáto xenhe ná chojni judío vinhi Esceva. Co jehe xí mé vehe xa ná xidána que vaquetonha ngain icha xidána. <sup>15</sup> Pero are ndačo xan yá, tti espíritu jianha joattehe xan:

—Janha nona quensen Jesús co nona quensen Pablo, pero jaha ra, ¿quensen jaha ra?

<sup>16</sup> Cottimeja tti xí que vechonda espíritu jianha činca řatja jehe nimé co anto cjoaya xa ngain na hasta que jehe na ttolocho na co conihí na sacingaxin na de nchia mé. <sup>17</sup> Cainxin chojni que vintte ngain ciudad de Efeso, chojni judío co cai chojni que jaha judío conohe na cain mé co anto řaon na, co ndačo na anto tsje cosa jian de ixin Jesús, tti chonda cain joachaxin.

<sup>18</sup> Cai tsje chojni que vaguitticaon ngain Jesús řatte na co ndačo na ngattoxon con icha chojni cosa jianha que joinchehe na icha saho. <sup>19</sup> Co tsje chojni ttoso joiaho řón de ixin joattosohe co řón mé cjoaga na řon co tatetsjehe cainxin chojni. Co are coequin na quejanhi rroguitte cain řón mé, vittja inchin cincuenta mil tomi de plata. <sup>20</sup> Jańá icha co icha chojni vitticaon na joajné Jesucristo co vicon na ixin joajna mé chonda tsje joachaxin.

<sup>21</sup> Cottimeja Pablo řaxaon satsji ngain tsje rajna nonttehe Macedonia co nonttehe Acaya. Cottimeja satsji ngain ciudad de Jerusalén. Co cai ndačo ixin are satsjixin de ngain Jerusalén cai chonda que satsji ngain ciudad de Roma. <sup>22</sup> Cottimeja Timoteo co Erasto, tti yó xí que vacjen-guijna, rroanha na para ngain nonttehe Macedonia. Co jehe Pablo řa vittohe sexin ngain nonttehe Asia.

*Are ngain ciudad de Efeso chojni cońao na*

<sup>23</sup> Are mé tsje chojni cońao ixin tti jian joajné Jesucristo que vanichja Pablo. <sup>24</sup> Ná xí vinhi Demetrio joincheńao cain chojni mé. Xí

mé vanchechjian xa tsje figurachjenhe nihngo conixin plata, xá ningoe ná ídolo vinhi Diana. Co chojni que vanchehe xé xa vagacha na tsje tomi. <sup>25</sup> Co jehe xa vayé xa nivanchehe xé xa conixin icha chojni que vanchehe xajeho xa co ndache xa na:

—Jaha ra noha ra que conixin xa que nttoho na tedacha na tsje tomi, mexinxin chonda na jian vidá na. <sup>26</sup> Co jaha ra coinhi ra co vicon ra quexén Pablo ngaria co ndačo ixin cain dios que vanchechjian chojni jeha Dios ndoa. Co jañá joincheguitticaon tsje chojni, co jeoha nttihi Efeso, cai merocoa ngoixin nonttehe Asia te chojni que ditticaon tti ndačo jehe. <sup>27</sup> Co nchaoha jí para ixin ján na ixin puede irrochondaha na xa. Co cai puede chojni irronichjaha na de ixin ningoe dios Diana co isinchesayeha na dios mé masqui jai cainxin chojni ngain nonttehe Asia co cainxin chojni ngoixin mundo anto nchesayehe na dios Diana.

<sup>28</sup> Co are cain chojni coinhi mé, anto coñao na co ndačo na sén:

—¡Anto jian dios Diana ngain ciudad de Efeso!

<sup>29</sup> Cottimeja ngain ciudad mé cain chojni anto coñao na. Co chinca na xatja na Gayo co Aristarco, tti yó xí que Pablo joiaoxin de nonttehe Macedonia. Co coinganji na xa hasta tti jí nchia tjaoxin chó na. <sup>30</sup> Pablo joinao rrojixinhi nttiha para ixin rrojinichjé chojni mé pero chojni que vaguitticaon Jesús coančjandaha na. <sup>31</sup> Cai canxion chojni que vaquetonha ngain nonttehe Asia niamigoe Pablo co nimé rroenhe na joajna ixin sixinttexinha nttiha. <sup>32</sup> Nttiha tti xatte na, jejé coyaotte chó na ixin



cain na coñao na co merocoa cain chojni noeha na quedonda xatte na nttiha. <sup>33</sup> Cottimeja canxion tti tengagué nttiha ndache ná xí vinhi Alejandro ixin quehe xattexin na nttiha, co jehe mé tti chojni judío vantsjeyexin na de ngagué na co joaquehe na xa ngatto con icha chojni. Alejandro conixin rá joinchehe seña ixin chojni rrotencoia na ixin rinao rronichja de ixin chojni judío para que icha chojni tsoñaoha ngain na. <sup>34</sup> Pero are chojni conohe ixin jehe ná judío, cainxin na coyaotte na inchin yó hora co ndačo na:

—¡Viva Diana de ngain ciudad de Efeso!

<sup>35</sup> Cottimeja are xisecretarioe ciudad mé onchao joinchetencoia xa chojni, jehe xa ndačo xa:

—Jaha ra de ciudad de Efeso, cainxin chojni ngoixin mundo nohe na ixin ján na nttihi Efeso tenda na ningoe dios Diana que chonda tsje joachaxin co ixin tenda na retratoe que xincanjinxin de ngajni. <sup>36</sup> Co xonhi chojni nchao ndačo ixin jihi ndoaha; mexinxin tencoa ra, co xaxaon ra jian saho que sinchehe ra ná cosa. <sup>37</sup> Xijoicó ra tehe xonhi vantsje xa de ngain ningoa na co ni nichjaha xa jianha de ixin dioa na. <sup>38</sup> Si Demetrio co ninchehe xé chonda na čhoan tti sičo na jie, jí xijuez; co cainxin nchanho te xa ngain juzgadoe xa. Mexinxin jehe na nchao satsji na ngain xijuez de ciudad jihi. Co nttiha cada chojni nchao rronichja tti joinchehe co tti joincheha. <sup>39</sup> Co si jaha ra ojé rinao ra, nchao satse ra chojni co tsjaoxin ra, pero jian inchin ley ttetonha. <sup>40</sup> Ixin puede čhoan chojni sinttacaxin na arinao na tsetocoho na gobierno romano, co ¿quehe rrondačo

na si čhoan chojni sanchianguia na ixin quedonda anto coñao na?

<sup>41</sup> Co are joexin nichja xa cain yá, coetonhe xa chojni ixin satsji na.

## 20

### *Are Pablo cjoí Macedonia co Grecia*

<sup>1</sup> Co are chojni que coñao ojoexin chjequé na, Pablo joatsetaonhe cain chojni que vaguitticaon Jesús co joincheanimá na. Cottimeja chjé chó na joajna co Pablo sacjoi nonttehe Macedonia.

<sup>2</sup> Ngain cain rajna que cjoí, joitsjehe cain chojni que vaguitticaon Jesús nttiha co joincheanimá na conixin tti ndache na. Cottimeja joiji nonttehe Grecia.

<sup>3</sup> Nttiha vittohe ní conittjao, co are jehe rroca barco ixin sarrocji ngain nonttehe Siria, conohe ixin chojni judío joinao na narrogoenxon na. Mexinxin cjoixinha nataon jinda sino sacjan vatto ngain nonttehe Macedonia iná.

<sup>4</sup> Co tsje xí sacjoi xa conixin Pablo. Ná vinhi Sópater que joixin xa rajna Berea; iná vinhi Aristarco, co iná vinhi Segundo, cayoi xí mé joixin ciudad de Tesalónica; co iná vinhi Gayo que joixin xa rajna Derbe; co iná xí vinhi Timoteo; co iyó xí vinhi Tíquico co Trófimo, co mé joixin xa nonttehe Asia.

<sup>5</sup> Cainxin xí mé vitaon xa nttiha co chonhe xa ixin janha na saso na nttiha ciudad de Troas.

<sup>6</sup> Co are joexin quiai are jine ni niottja que chondaha levadura, cottimeja janha na coá na barco co vačhjexin na de ngain ciudad de Filipos. Co are nchanho naonxin joiguetanxin na cain xí mé ngain ciudad de Troas. Co nttiha vittona na yáto nchanho.

### *Are Pablo ngain Troas*

<sup>7</sup> Co saho nchanho de semana janha na xatte na para ixin joine na tti niottja que dinhi Santa Cena. Co Pablo joinchecoenhe chojni que vaguitticaon Jesús. Co jehe Pablo nichja hasta ngosine ttie ixin jehe chonda que sarrocji nchanho yoxin. <sup>8</sup> Janha na oate na ngain ná cuarto piso ninxin. Co nttiha anto tsje xoi candil tedacaon. <sup>9</sup> Co nttiha ná xanxí vinhi Eutico tají xan ngain ventana. Pero ixin Pablo anto sé nichja, mexinxin xanxí mé anto chjé xan cottaçhin co tavejoa xan; cottimeja ndaditse xan cottaçhin co vetsinga xan de ngain ventana de ngain piso ninxin de nchia mé para ndoja. Co are jehe na joatsín na xan, ondadiguenhe xan. <sup>10</sup> Cottimeja Pablo vania co vettoxin nttajochjihi co cjóa xan co ndaço ngain chojni que vaguitticaon Jesús:

—Xaonha ra, ixin jichon xan.

<sup>11</sup> Cottimeja Pablo sacjan ngaxinhi cuarto noi iná co joine tti niottja que dinhi Santa Cena co joinecaho chojni nttiha. Cottimeja jehe nichja icha hasta vingasán, cottimeja sacjoi. <sup>12</sup> Co xanxí mé cjan xan xingamehe xan de ndadiguenhe xan co savicao na xan nchiandoha xan co cain na anto ché na.

### *Are sacjoixin na de Troas co sacjoi na Mileto*

<sup>13</sup> Pablo ndaço ixin jehe rotteo satsjixin hasta tti ngain rajna Asón. Mexinxin janha na coá na ná barco co vitaon na nttiha hasta tti ngain rajna Asón. Nttiha sirroataonxin na Pablo inchin cjoao na. <sup>14</sup> Co are janha na vetan na Pablo nttiha Asón, coaninxin barco conixin janha na

co sacjoi na ngain rajna Mitilene. <sup>15</sup> Janha na vačhjexin na de nttiha co nchanho yoxin joaso na ngain nontte ngosine ndachaon dinhi Quío. Co nchanho ninxin joaso na ngain iná nontte ngosine ndachaon dinhi Samos, co jointtajogaha na ngain rajna Trogilio. Co ndoexin joaso na ngain ciudad de Mileto. <sup>16</sup> Jañá conhe ixin Pablo joinaoha cončjenhe sé ngain nonttehe Asia ni joinaoha cjoi ciudad de Efeso ixin jehe joinao toin rroguiji ciudad de Jerusalén ixin joinao vehe nttiha are nchanho quiai que dinhi Pentecostés, si nchao.

*Tti nichja Pablo ngain nivaquetonhe chojni que vaguitticaon Jesús ngain Efeso*

<sup>17</sup> Are vehe Pablo ngain ciudad de Mileto, rroanha joajna ngain xí que vaquetonhe chojni que vaguitticaon Jesús ngain ciudad de Efeso para ixin tsonchienne na ngain. <sup>18</sup> Co are joí na ndache na:

—Jaha ra noha ra quexén vanttaha janha desde saho nchanho que joihi nttihi nonttehe Asia co hasta jai. <sup>19</sup> Cainxin nchanho janha joarihi nganji ra jointtaha tti coetonna Jesús, tti chonda cain joachaxin, co janha xonhi tiempo conona orguloso. Co jí nttiha tsjanga janha de ixin jaha ra. Co cai anto vetan tangui ixin tti joinchehe chojni judío nganji na janha. <sup>20</sup> Pero janha cointtoaha de vanichja nganji jaha ra cain tti nchao cjoenguijna jaha ra. Co jointtacoanha ra ngain lugar tti te tsje chojni co cai ngain nchiandai ra. <sup>21</sup> Janha coetoan chojni judío co chojni que jeha judío ixin chonda que tsentoxinhi na vidé na inchin Dios rinao co sitticaon na ngain Jesucristo, tti chonda cain

joachaxin para ixin ján na. <sup>22</sup> Co jaxon janha satsji ciudad de Jerusalén ixin Espíritu Santo coetonna, masqui nonaha quehe tsonna nttiha. <sup>23</sup> Jeho nona que ngain cainxin ciudad tti janha cjoí Espíritu Santo ndachjenji na ixin anto tangui tsonna co cai ixin siaxinna ngain cárcel. <sup>24</sup> Pero janha x̄aonha na de ixin tti ndachjenji na Espíritu Santo co x̄aonha na masqui ndasenne na. Jeho rinaho tsjexin x̄a que Jesús, tti chonda cain joachaxin, chjana. x̄a mé x̄a de rronichja tti jian joajna que ndačho ixin Dios anto rinao cain chojni.

<sup>25</sup> 'Are osé janha vanichja nganji ra ixin quexén Dios ttetonha. Co jai nona ixin ni ná de jaha ra rrocjan sicon ni ra janha iná. <sup>26</sup> Mexinxin jai rinaho rrondattjo ra que si čhonja chojni ditti-caonha, jeho setsingataha co janha idancataha na jehe. <sup>27</sup> Ixin janha ondattjo ra de ixin cainxin tti rinao Dios que sinchehe ra, co janha x̄onhi tjañana de ndattjo ra. <sup>28</sup> Mexinxin ttjiho ra cuidado jaha ra co cai dinttenda ra cainxin chojni que ditticaon Jesús ixin Espíritu Santo chjá ra x̄a jihi de dinttenda ra cain chojni que ditticaon Jesús, ixin Jesús, tti chonda cain joachaxin, ndavenhe para ixin cain ján na are joí jní jehe. <sup>29</sup> Co janha nona ixin are janha satsji, tsí ojé chojni co jehe na sinao na sinttayaha ra na ixin isitticaonha ra Jesús co nimé inchin colobo čhintto are tse va coleco co jine va va. <sup>30</sup> Co cai ngayaha ra jaha ra mismo sačhje tti nirronichja ndoaha, co jamé canxion chojni que ditticaon Jesús sitticaon na tti rrondačho jehe na. <sup>31</sup> Mexinxin ttjiho ra cuidado co x̄axaon ra que janha ngoixin ní nano nchanho

co ttie jointtacoanha ra hasta tsjanga janha por ixin jaha ra.

<sup>32</sup> Jaxon danchia Dios ixin jehe senda ra co ixin sitticaon ra tti joajna que ndačo ixin Dios anto rinao cain ra, co joajna mé chonda joachaxin de sinttaguitticaon ra jian que jaha ra cai tequininxin ra ngain Dios. <sup>33</sup> Co janha xonhi tiempo joinaho ná cosé chojni ni lontto ni tomi. <sup>34</sup> Jaha ra jian noha ra que janha vanttaha xa para ixin joarichonda cain tti vagondana co cai tti vagondehe nivacjinha. <sup>35</sup> Co jañá janha cjoagoha ra ixin icha jian nchehe ni xa co ttjenguijna ni ninoa. Co xaxaon ra tti ndačo Jesús, tti chonda cain joachaxin, are ndačo: “Icha čhjoin tonohé ansén chojni que danjo que tti tonohé ansén chojni que dayé.”

<sup>36</sup> Co are Pablo joexin nichja cain yá, vettoxin ntajochjihi jehe co cainxin chojni co joinchecoanxinhi Dios. <sup>37</sup> Cainxin na tsjanga na are cjóa na co coetoxin na Pablo. <sup>38</sup> Co anto vinttechín na ixin Pablo ndačo ngain na ixin irrocjanha na sicon na. Cottimeja joicanxin na hasta tti jí barco.

## 21

### *Are Pablo sacjoi Jerusalén*

<sup>1</sup> Are janha na cointtoa na chojni que vaguitticaon Jesús, coá na ná barco co sacjoi na nao ngain nontte ngosine ndachaon dinhi Cos. Co nchanho yoxin joaso na ngain nontte ngosine ndachaon dinhi Rodas co de nttiha sacjoi na ngain rajna Pátara. <sup>2</sup> Co nttiha rajna Pátara janha na vittja na ná barco sajittji ngain nonttehe Fenicia, mexinxin

coá na barco mé co sacjoi na. <sup>3</sup> Co vicon na nontte ngosine ndachaon dinhi Chipre co nontte mé vittohe lado cjon na co jañá sacjoi na hasta nonttehe Siria. Co nttiha ciudad de Tiro barco chonda que cointtohe barco carga joiaho barco, co mexinxin nttiha janha na vania na. <sup>4</sup> Ngain ciudad mé janha na vetan na chojni que vaguitticaon Jesús co nttiha vittona na ngain na ná semana. Co jehe na ndache na Pablo ixin icha jian tsjiha ngain ciudad de Jerusalén. Jañá ndache na ixin Espíritu Santo joinchenohe na quehe tsonhe Pablo nttiha Jerusalén. <sup>5</sup> Pero are joexin semana mé, janha na sacjoi na. Cainxin nivaguitticaon Jesús, nixí co çihi na co xenhe na, cain nimé joicanxin na na hasta tti ngandehe ciudad mé, co nttiha nganda ndachaon janha na joarittoxin na nttajochjihna na co jointtacoanxian na Dios. <sup>6</sup> Cottimeja chjaha na na joajna co cjóa na na co coá na barco co jehe na sacjan na nchiandoha na.

<sup>7</sup> Co jañá sacjoixin na ciudad de Tiro co joaso na ciudad de Tolemaida. Co nttiha vaniaxin na barco. Co ngain ciudad mé janha na vetan na nivaguitticaon Jesús co vittona na ná nchanho ngain na. <sup>8</sup> Co nchanho yoxin cain na janha na sacjoixin na de ngain ciudad de Tolemaida co joaso na ngain ciudad de Cesarea. Nttiha cjoí na nchiandoha ná xí vinhi Felipe. Xí mé joindache tsje chojni tti jian joajné Jesucristo, co jehe xí mé vehe ná de tti yáto xí que vacjenguijna co vachjé tti sine chojni que vaguitticaon Jesús ngain ciudad de Jerusalén. Co janha na vittona na ngain xí mé. <sup>9</sup> Co Felipe vechonda nó xenhe xannçhí que ça vinttecaoha xan xí. Co xannçhí mé vanichja xan

joajna que vagayé xan de ngain Dios. <sup>10</sup> Are janha na vintte na nttiha canxion nchanho, joiji ná xí que vanichja xa joajna que vagayé xa de ngain Dios. Xí mé joixin xa nonttehe Judea co vinhi xa Agabo. <sup>11</sup> Co xí mé joí xa joitsjena na xa. Co are jehe xa nttiha nganji na, coá xa cinturoen Pablo co coiattexin xa rotté xa co rá xa conixin cinturón mé co ndačo xa ngain Pablo:

—Espíritu Santo ndačo ixin ngain ciudad de Jerusalén chojni judío tsiatte na jaha janhi inchin janha coiatte rana co rotnena co jañá sinttachi-anha na ngain chojni que jeha judío.

<sup>12</sup> Are coian na jiji, janha na co chojni de ngain ciudad de Cesarea jointtatsán na ñao Pablo ixin tsjiha Jerusalén. <sup>13</sup> Pero Pablo joattehe:

—¿Quedonda nchehe ra ixin janha sarichinhi? ¿Co quedonda tsjanga ra? Janha rrihi dispuesto de jeoha tsiatte na na sino que cai rrihi dispuesto de ndasenhe na ngain Jerusalén para ixin causexin Jesús, tti chonda cain joachaxin.

<sup>14</sup> Pero masqui janha na nichjá na sé, jehe čhoha vitticaon tti ndattjan na. Mexinxin iřonhi icha ndattjan na, jeha ndačhan na:

—Que tsonhe inchin Jesús, tti chonda cain joachaxin, rinao.

<sup>15</sup> Co are joexin cain jiji, janha na coengachjian na tti cjoinha na co sacjoi na ngain Jerusalén.

<sup>16</sup> Canxion chojni que vaguitticaon Jesús que joixin na de ngain ciudad de Cesarea sacjoinha na na co ngayé cain chojni mé vehe ná xí vinhi Mnasón. Xí mé joixin xa nontte ngosine ndachaon dinhi Chipre, co osé jehe xa vaguitticaon xa Jesús.



Co janha na vittona na ngain nchiandoha xí mé canxion nchanho.

*Pablo joitsjehe Jacobo*

<sup>17</sup> Are joaso na ciudad de Jerusalén, chojni que vaguitticaon Jesús nttiha anto ché na co jian vayahna na na. <sup>18</sup> Nchanho yoxin Pablo co janha na sacjoi na joitsjá na Jacobo co nttiha cai vintte cainxin xí que vaquetonhe chojni que vaguitticaon Jesús. <sup>19</sup> Pablo chjé na joajna, cottimeja coequinhi na cainxin tti joinchehe jehe de ixin joachaxín Dios ngain chojni que jeha judío. <sup>20</sup> Are jehe na coinhi na yá, joinchesayehe na Dios. Cottimeja ndache na Pablo:

—Nchao jí hermano; pero jaha noha ixin jí tsje mil chojni judío que oditticaon Jesús. Co cain nimé anto rinao sitticaon na cain tti coetonha ley que vayé Moisés. <sup>21</sup> Co jehe nimé coinhi na ixin jaha nchecoenhe cainxin chojni judío que te ngain rajné chojni que jeha judío ixin sitticaonha na tti coetonha Moisés. Co coinhi na cai ixin jaha nchecoenhe na ixin icha jian rrochjeha na xenhe na xöhe que dinhi circuncisión co sincheha na inchin ndačo costumbrea na. <sup>22</sup> ¿Quehe sinttaha na reme? Nona na ixin chojni judío que ditticaon Jesús rroxatte na are tsinhi na ixin jaha ojoihi. <sup>23</sup> Mexinxin xaxanho na icha jian si jaha sinchehe inchin rrondattjo ra. Jí nó xí ngaguehna na que sinhecumplí ná promesa para ixin Dios. <sup>24</sup> Tsjiho xí mé. Co sinchehe inchin jehe xa are sinchehe xa cain tti ndačo chojni judío ixin sintte xa jian para ixin Dios. Co chjehe xa tomi para ixin tsenanxin xa cain tti sanjo xa ngain Dios. Cottimeja jehe xa

nchao rrocjinhi xa xajá xa. Jañá cainxin chojni rrochonxin que cain tti ndaço na de ixin jaha ndoaha. Co sicon na ixin cai jaha ditticaon cainxin ley que vayé Moisés. <sup>25</sup> Pero de ixin chojni que jeha judío, icha saho janha na rroanha na joajna ngain chojni mé co ndattjan na na ixin chonda que sineha na tti joaquehe na tti nchesayexin na ídolo, co sineha na jni, co sineha na nntaöhe coxigo diguinguehe na ttosin. Co cai que sinttejoacaha na nchí que jeha nchiçhihi na o xí que jeha xixihi na.

*Are tse na Pablo ngain nihngo icha importante*

<sup>26</sup> Cottimeja Pablo sajoicao tti nó xí co nchanho yoxin joinchehe inchin joinchehe xa para ixin vintte xa jian para ixin Dios. Cottimeja Pablo joixinhi nihngo icha importante para ndache na xidána quesa jeha co tti nó xí tsjehe na sinchehe na jamé, rroço quesa nchao soen na coxigo que sanjo na ngain Dios.

<sup>27</sup> Are merocoa vatto tti yáto nchanho are rrocojian tti nó xí, canxion chojni judío que joixin nonttehe Asia vicon na Pablo ngain nihngo icha importante. Chojni mé joincheñao na cainxin chojni co tse na Pablo. <sup>28</sup> Co ndaço na sén:

—Jaha ra xó xí Israel, xacoi ra co ttjenguijna ni ra. Xí jihi ttingaria xa cainxin rajna co ndache xa cainxin chojni ixin sitticaonha na chojnia na co sitticaonha na ley que vayé Moisés co sitticaonha na xidané ningoa na jihi. Cai joiaho xa canxion chojni griego ngaxinhi nihngo jihi co jañá joinchehe na menos ningoa na.

<sup>29</sup> Jañá ndačho na ixin jehe na vicon na Pablo ngain ciudad de Jerusalén conixin ná xí griego vinhi Trófimo que joixin xa ciudad de Efeso. Co jehe na řaxaon na ixin Pablo joicao xí mé ngaxinhi nihngo icha importante; pero Pablo joincheha jamé.

<sup>30</sup> Co cainxin chojni ngain Jerusalén anto coñao na co coinga na řatte na. Cottimeja tse na Pablo co coianganji na vantsjexin na de nihngo icha importante co coejé na puerté nihngo mé. <sup>31</sup> Jehe na joinao na narrogoenxon na Pablo, pero jehe tti vaquetonhe xisoldado romano coinhi ixin cain chojni ngain Jerusalén anto coñao na. <sup>32</sup> Co rato mé jehe tti vaquetonhe xisoldado vayé xisoldadoe co icha xí que vaquetonhe icha xisoldado co cain xí mé coinga xa cjoí xa tti vintte cainxin chojni. Co are cain chojni vicon xisoldado co tti vaquetonhe xisoldado, jehe na igoenha na Pablo icha. <sup>33</sup> Cottimeja jehe tti vaquetonhe xisoldado conchienne ngain Pablo co coetonhe xisoldadoe ixin tse xa Pablo co ixin coiatte xa Pablo conixin yó cadena. Cottimeja joanchiangui ixin quensen Pablo co quehe joinchehe. <sup>34</sup> Pero cainxin chojni coyaotte na co nichja na ojejé cosa. Mexinxin tti vaquetonhe xisoldado čhoča chonxin quehe conhe ixin anto coyao chojni. Co coetonha ixin sajoicao xa Pablo ngain tti vintte xisoldado. <sup>35</sup> Co are xisoldado joiči xa conixin Pablo ngain escaloen tti vintte xa, jehe xa chonda que vatsín xa Pablo noi ixin chojni joinao rrogoen Pablo iná. <sup>36</sup> Ixin cainxin chojni rroé na co ndačho na sén:

—Nadoenxon ra.

*Tti ndaĉho Pablo ngattoxon con cainxin chojni*

<sup>37</sup> Co are sajidicao xa Pablo tti vintte xisoldado, Pablo ndache xivaquetonhe xisoldado:

—¿Anchao rronichja nganji?

Co tti vaquetonhe xisoldado joattehe:

—¡Pero jaha nchao nichja nguigoa griego!

<sup>38</sup> Mexinxin jaha jaha xí que joixin Egipto que nchion sé coetocaho xa gobierno co sajoicao xa ngagaha jna nó mil xisoldado que anto ĉhintto.

<sup>39</sup> Cottimeja Pablo ndaĉho:

—Janha ná judío que joixin ciudad de Tarso que mé ná ciudad importante ngain nonttehe Cilicia. Co nttatsanha ñao, chjana joachaxin ixin rronichja ngain cainxin chojni.

<sup>40</sup> Co tti vaquetonhe xisoldado chjé joachaxin co Pablo vingattjen ngataha escalón mé, co joinchexhjian seña conixin rá para joinchetencoa cainxin chojni. Co are cainxin na tencoa na, Pablo nichjé na ixin nguigoa hebreo co ndaĉho:

## 22

<sup>1</sup> —Jaha ra, ĉho chonda ra nchion tsje nano inchin janha co ĉho daĉhichjan ra, ttinhi ra quehe rrondattjo ra.

<sup>2</sup> Co are coinhi na ixin Pablo nichjexin na nguigoa hebreo, jehe na tencoa na icha co Pablo ndache na:

<sup>3</sup> —Janha ná judío na. Co goanxin na ngain ciudad de Tarso nonttehe Cilicia co vanguixin na nttihi ciudad de Jerusalén co Gamaliel cjoiximaestrone. Jehe xa joinchecoanna xa jian de ixin ley que vayé Moisés. Cainxin nchanho janha joinaho jointtaha inchin janha ĉaxanho que Dios

rinao, inchin jaha ra nchehe ra jai. <sup>4</sup> Icha saho janha rroá co tse chojni que ditticaon Jesús co coiaxian na ngain cárcel, xí co nchí, co coetonha ixin nagoenxon na na. <sup>5</sup> Xidána icha importante co cainxin xittetonha ngain ningoa ra nchao rrondattjo ra na ixin jehe na chjana na carta para ixin chojni judío ngain ciudad de Damasco. Mexinxin janha cjoí nttiha ixin rrotse chojni que ditticaon Jesús para rrojiquian na nttihi Jerusalén co rrochjaha na castigo.

*Pablo ndache na quexén vitticaon ngain Jesús  
(Hechos 9.1-19; 26.12-18)*

<sup>6</sup> Co janha sacjoi, pero are ngatja nttiha chiaon ciudad de Damasco inchin chongúxin, rato mé vingasantte na ná xohi que joixin de ngajni ngá nttiha tti rrittji. <sup>7</sup> Co janha joaritsinga ngataha nontte. Cottimeja coian inchin ná tté chojni que ndachjenji na: “Saulo, Saulo, ¿quedonda jaha ningaonna co feo nchena?” <sup>8</sup> Cottimeja janha joanchianguia co ndachjan: “¿Quensen soixin?” Co ndachjenji na: “Janha Jesús tti joixin rajna Nazaret tti jaha ningaconhe co feo nchehe ngain.” <sup>9</sup> Co chojni que cjoinha janha cai vicon na xohi mé. Pero anto xáon na ixin coinha na tté Jesús que nichja nganji janha. <sup>10</sup> Cottimeja janha ndattjan: “¿Soixin, quehe chonda que sinttaha janha?” Co jehe ndachjenji na: “Dingattjen co nchehe sigue sattji ciudad de Damasco. Nttiha jí chojni que rrondattjo cainxin tti chonda que sinchehe jaha.” <sup>11</sup> Co rato mé janha choha vicon ixin xohi mé joinchenihi jmacon na janha. Co chojni que

cjoinha janha tse na na rana co sacjoinha na hasta joaso na Damasco.

<sup>12</sup> Nttiha vehe ná xí vinhi Ananías. Co xí mé anto nchesayehe xa Dios co anto ditticaon xa ley que vayé Moisés. Co cainxin chojni judío que te ciudad de Damasco nichja na jian de ixin xí mé.

<sup>13</sup> Co Ananías joí joitsjena co ndachjenji na: “Hermano Saulo, jaxon jaha sicon iná.” Co rato mé janha onchao vicon, co nchao tsjá xa. <sup>14</sup> Cottimeja Ananías ndachjenji na: “Dios de nindoguelitoa na ocoinchiaha jaha de osé. Jehé coinchiaha jaha para satsoan tti rinao Dios, co para rrochonxin Jesucristo, tti xonhi tiempo joinchehe cosa jianha, co para tsinhi tti rrondačo jehe Jesús nganji jaha.

<sup>15</sup> Jañá joinchehe Dios para ixin jaha rronichja de ixin Jesús ngain cainxin chojni co jaha tsequinhi na tti vicon co tti coinhi. <sup>16</sup> Choenha icha. Ditticaon ngain Jesucristo co dingattjen co diguite para sinhi chojni Jesús. Co jañá sitjañehe cain tti jianha que joinchehe.”

*Pablo coequin quedonda sacjoi ngain chojni que jeha judío*

<sup>17</sup> Co Pablo ndačo cai:

—Co are janha sacjan na nttihi Jerusalén, sacjoi ngain nihngo icha importante para jointtacoanxian Dios. Co nttiha janha vicononxinna Jesús, tti chonda cain joachaxin, <sup>18</sup> co ndachjenji na: “Jaca satsjixin de ciudad de Jerusalén ixin nttihi sitticaonha na tti jaha rrondačo de ixin janha.”

<sup>19</sup> Cottimeja janha ndattjan Jesús: “Soixin, cainxin chojni mé nohe na ixin janha vangaria tsje rajna co joixinhi cainxin ningoe cain rajna mé para vatse chojni que ditticaon na soixin, co gonhe na

co coiaxian na ngain cárcel. <sup>20</sup> Co are chojni coaxin na xo Esteban ixin jehe nchehe xa de nichja de ixin soixin, janha joarihi nttiha co vicon. Are mé, janha joarihi de acuerdo conixin tti jehe na joinchehe na co janha joarinda lonttoe na que vinttetsá na are goen na Esteban.” Jañá ndattjan Jesús. <sup>21</sup> Pero Jesús, tti chonda cain joachaxin, ndachjenji na: “Sattji ixin janha rrorroanha cjin ngain chojni que jeha judío.”

### *Are Pablo ngá rá tti vaquetonhe xisoldado*

<sup>22</sup> Cain chojni nttiha coinhi na tti ndacho Pablo hasta jehe ndacho ixin jehe tsji ngain chojni que jeha judío. Co are mé coexinhi na ndacho na sên:

—Icha jian xí jihi ndasenhe xa. Jiquininxinha sechon xa.

<sup>23</sup> Co ixin anto coñao na, coyaotte na co con-tsenga na lonttoe na que vinttetsá na co cjoa na jinche para noi. <sup>24</sup> Co tti vaquetonhe xisoldado coetonha ixin sajoicao xa Pablo ngaxinhi tti vintte xisoldado. Co ndache xisoldadoe ixin rrogoen xa Pablo conixin ná cuarta de roa para rroquequin Pablo quedonda cainxin chojni coyaotte na. <sup>25</sup> Co are joexin coenchoa xa rá co rotté Pablo ixin rrogoen xa, Pablo ndache xicapitán que vengattjen nttiha:

—¿Achonda ra joachaxin para sonhe ra ná chojni romano saho de sinchejuzguehe ra jehe?

<sup>26</sup> Are xicapitán coinhi xa yá, sacjoi xa co ndache xa tti vaquetonhe xisoldado co ndacho xa:

—Ttjiho cuidado tti sinchehe ngain xí yá ixin jehe xa ná chojni romano xa.

27 Cottimeja tti vaquetonhe xisoldado conchienne ngain Pablo co joanchianguihi co ndačo:

—¿Andoa jaha ná chojni romano?

Co Pablo joattehe:

—Jan, ndoa.

28 Cottimeja tti vaquetonhe xisoldado ndačo:

—Janha cjoenga hna tsje tomi ixin goan na chojni romano.

Co Pablo ndačo:

—Pero janha ná chojni romano ixin ndodana cjoico ndo ná chojni romano cai.

29 Are xisoldado que rrogoen Pablo coinhi xa mé, joixintonxin xa de tti jí Pablo. Co tti vaquetonhe xisoldado x̄aon are conohe ixin Pablo ná chojni romano ixin jehe ocoetonhe xisoldadoe ixin coenčo xa Pablo. Co jiquininxinha rrojinchehe xa jamé ngain ná chojni romano.

### *Are Pablo cjoico ngain juzgadoe nihngo*

30 Co ixin tti vaquetonhe xisoldado joinao chonxin quehe ndačo chojni judío ixin quehe cosa jianha joinchehe Pablo, mexinxin nchanho yoxin jehe joantsjehe cadena večoaxin Pablo co coetonha ixin x̄atte cain xidána que vaquetonha ngain icha xidána co cain xidána que vechonda joachaxin de juez ngain juzgadoe na. Cottimeja jehe tti vaquetonhe xisoldado sajoicao Pablo ngain juzgado mé co coetonhe Pablo ixin vingattjen ngagué cain nimé.

## 23

1 Pablo tsjehe ngain xite ngain juzgadoe nihngo co ndache xa:



—Soixin ra, janha tonona ċhjoin ngain ansenna ngattoxon con Dios de ixin cainxin tti janha joint-taha ngain vidana.

<sup>2</sup> Cottimeja Ananías que vehe xidána icha importante coetonhe chojni tsingaxintonxin de ċhiqué Pablo ixin rroquedoe na manaso rroha. <sup>3</sup> Co Pablo joattehe xa:

—¡Jaha tti ncheha inchin ndaċho, Dios cai soen jaha! Jaha nttihi rrihi ixin rrondachjenji na quehe jianha jointtaha janha inchin jitaxin ley. Pero ley ċhjaha joachaxin para coetonha chojni ixin rroquedoehna na manaso.

<sup>4</sup> Co chojni que vengattjen nttiha ndaċho na:

—¿Quedonda jaha nichja feo de ixin xidané Dios? ixin jehe xa tti dána icha importante.

<sup>5</sup> Pablo ndaċho:

—Soixin ra, nonaha ixin jehe xidána icha importante. Si janha rroconona yá, rronichjaha tti janha onichja ixin jitaxin ngain Palabré Dios: “Nichjaha jianha de ixin ná tti ttetonhe chojnia.”

<sup>6</sup> Cottimeja Pablo conohe ixin chojni ngain juzgadoe nihngo vechonda yó grupo. Ná grupo vehe chojni saduceo. Co iná grupo vehe chojni fariseo. Mexinxin Pablo ndaċho anto sén:

—Soixin ra, janha ná xifariseo na co ndodana cai cjoí ná xifariseo. Co soixin ra nttihi para rrondaċho ra si janha jian na ni jianha na ixin diticanho que tti nindadiguenhe chonda que rroxechon na.

<sup>7</sup> Are Pablo ndaċho yá, xifariseo co xisaduceo coexinhi xa joinchediscutí xa. Co cayoi grupoe xa ċaxaon xa ojejé. <sup>8</sup> Ixin xisaduceo vandaċho xa ixin tti nindadiguenhe irrocjanha rroxechon

na co ixin xonhi ángel jí co ni xonhi espíritu jí. Co xifariseo vandačo xa que ján jí cain mé.  
<sup>9</sup> Cainxin xa coyao xa icha co icha. Cottimeja vintgattjen canxion ximaestroe ley que vaguitticaon xa inchin xifariseo co ndačo xa:

—Xí jiji xonhi cosa jianha joinchehe xa. Co puede ná espíritu jian o ná ángel de Dios onichja ngain xa, mexinxin ttjiho na cuidado que ixin rroningacoenha na Dios.

<sup>10</sup> Co anto joinchediscutí xa hasta tti vaquetonhe xisoldado xaon ixin puede nasoenxon xa Pablo. Mexinxin rroanha joajna ngain xisoldadoe ixin vantsjexin xa Pablo de nttiha co sajoicao xa Pablo tti vintte xa iná.

<sup>11</sup> Co are ttie Jesús, tti chonda cain joachaxin, xago ngain Pablo co ndache:

—Xaonha Pablo, ixin jaha rronichja de ixin janha ngain ciudad de Roma inchin jaha onichja nttihi Jerusalén.

*Are xaxaon na quexén narrogoenxon na Pablo*

<sup>12</sup> Co nchanho yoxin canxion chojni judío cjoao chó na ixin narrogoenxon na Pablo. Co joinchejurá na ixin rrojineha na ni rroguilha na hasta narrogoenxon na Pablo. Co ndačo na ixin Dios nchao rrojinchehe feo ngain na si nasoenxonha na Pablo. <sup>13</sup> Co cain nicjoao chó mé icha que cuarenta xí. <sup>14</sup> Co sacjoi na ngain xidána que vaquetonha ngain cain icha xidána co ngain xivaquetonha ngain nihngo judío co ndache na xa:

—Janha na jointtajurá na co ndattjan na Dios ixin nchao sinchehe feo nganji na si nasoenxonha na Pablo. Co jointtajurá na ixin sineha na ni

siha na hasta soenja na Pablo. <sup>15</sup> Mexinxin jaxon, soixin ra co icha chojni que chonda joachaxin ngain juzgadoe nihngo, ndache ra tti ttonhe xisoldado ixin ndoe tsiaho Pablo nganji ra iná. Co ndache ra ixin rinao ra sanchianguihi ra icha. Pero Pablo tsiha ixin janha na rrochoan na ngatja nttiha para sonhe na.

<sup>16</sup> Co xancoén Pablo, xenhe nchichó Pablo, conohe xan cain yá co sacjoi xan tti vintte xisoldado para ixin ndache xan Pablo cain yá.

<sup>17</sup> Cottimeja Pablo vayé ná xicapitán co ndache xa:

—Nttatsanha ñao, ttjiho xan jihi ngain tti ttonhe xisoldado ixin chonda xan ná joajna para ixin jehe.

<sup>18</sup> Xicapitán mé joicao xa xan ngain tti vaquetonhe xisoldado co ndache xa:

—Pablo tti jiaxinhi vayahna para ixin joiquian xan jihi nganji ixin jehe xan chonda xan ná joajna para ixin soixin.

<sup>19</sup> Tti vaquetonhe xisoldado tse ná rá xan mé co joantsjenda xan nchion co joanchianguihi xan co ndačo:

—¿Quehe rinao rrondachjenji na?

<sup>20</sup> Cottimeja xan mé ndache xan:

—Canxion chojni judío ocjoao chó na ixin rrondattjo na soixin ixin ndoe tsjiho Pablo ngain juzgadoe nihngo. Jehe na rrondattjo na ixin rinao na sanchianguihi na Pablo icha. <sup>21</sup> Pero soixin ditticaonha na ixin ngatja nttiha sema icha que cuarenta xí de ngain ladoe na rrochonhe xa Pablo ixin nasoexon xa. Co ojoinchejurá xa ixin Dios nchao sinchehe feo ngain xa isi soenha xa Pablo

co cai sineha xa ni siha xa hasta soenja xa Pablo. Co jaxon techonhe xa quehe rrondačo soixin.

<sup>22</sup> Cottimeja tti vaquetonhe xisoldado ndache xan ixin rrondacheha xan ni ná chojni tti ndache xan jehe. Cottimeja coančhanda xan sacjoi xan.

*Are rroanha na Pablo ngain xigobernador Félix*

<sup>23</sup> Cottimeja tti vaquetonhe xisoldado vayé yó xicapitén co ndache xa:

—Sico yó ciento xisoldado que tsjixin rotté co setenta xisoldado que sinttetaha conxin co yó ciento xisoldado que sicao lanzé. Co cainxin ra sattji ra ttie a las nueve ngain ciudad de Cesarea. <sup>24</sup> Co cai ttjiho ra canxion conxin para ixin Pablo setaha. Co dinttenda ra Pablo hasta saso ra ngain Félix xigobernador ixin xonhi tsonhe.

<sup>25</sup> Co tti vaquetonhe xisoldado rroanha ná carta conixin xisoldado mé, co carta mé ndačo carta:

<sup>26</sup> “Janha Claudio Lisias chjaha joajna nganji soixin Félix xigobernador. <sup>27</sup> Chojni judío coiaxinhi xí jihi co joinao na narrogoenxon na xa. Pero are janha conona ixin jehe xa ná chojni romano, janha cjoi conixin xisoldadona co vantsjexin xa de ngá rá chojni judío. <sup>28</sup> Co janha cjoinha xa ngain juzgadoe ningoe chojni judío ixin joinaho conona quehe cosa jianha joinchehe xa. <sup>29</sup> Co janha vicon ixin chojni judío anto coñao na ngain xa pero jeho ixin jehe xa ditticaonha xa ley de jehe na. Pero jiquininxinha senhe xa ni jiquininxinha seaxinhi xa cárcel. <sup>30</sup> Cottimeja coian ixin canxion chojni judío ocjoao chó na ixin nasoenxon na xa. Mexinxin janha rroanha xí jihi nganji soixin. Co janha

ondattjan chojni judío que chonda que rrondat-tjo na soixin quedonda anto coñao na ngain xa.” Janhi jitaxin carta mé.

<sup>31</sup> Cottimeja cainxin xisoldado joinchehe xa inchin vitonhe xa. Tse xa Pablo co are naxin xehe sajoicao xa ngain rajna Antípatris. <sup>32</sup> Co nchanho yoxin xisoldado que vacjixin rotté sacjan xa ngain tti vintte xa. Co xisoldado que vicao conxin sajoicao xa Pablo hasta ciudad de Cesarea. <sup>33</sup> Co are joihi na ngain Cesarea, joanjo xa carta ngain xigobernador co cai cointtohe xa Pablo nttiha. <sup>34</sup> Co are xigobernador joexin tsjehe xa carta mé, joanchianguihi xa Pablo ttinó joixin. Co are coinhi xa ixin Pablo joixin nonttehe Cilicia, <sup>35</sup> ndache xa:

—Janha tsian tti rrondačo jaha are tsí nijoicho jie de ixin jaha.

Cottimeja coetonhe xa xisoldado ixin venda xa Pablo ngaxinhi palacioe Herodes.

## 24

### *Tti nichja Pablo ngain Félix*

<sup>1</sup> Are vatto naho nchanho, Ananías, tti xidána icha importante, joihi Cesarea conixin canxion xi-vaquetonha ngain nihngo judío. Co cai sajoicao ná xiabogado vinhi Tértulo. Cain nimé sacjoi na ngain xigobernador para joičo na jie de ixin Pablo.

<sup>2</sup> Co are Pablo conchienne ngain xigobernador, Tértulo coexinhi čo jie de ixin Pablo co ndache Félix xigobernador:

—Dio rrotsjenga hna soixin ixin cain na te na jian co ttetoha na. Co nonttehna na anto čjoin jí ixin soixin xaxaon jian co nchehe tsje cosa jian para ixin janha na. <sup>3</sup> Janha na anto rinaho na

chjaha ra soixin gracias ixin cain tti jian que dayá na de nganji soixin. <sup>4</sup> Co janha na rinaoha na santsjaha ra tsje tiempo. Pero nttatsanha ñao, ttinhí nchion tti janha na rrondačhjan na. <sup>5</sup> Janha na onona na ixin xí jihi anto joincheñao xa chojni. Co ngain cainxin nontte cjoí xa ngayé chojni judío co joinchechjian xa division. Jehe xa tti ttetonhe xa chojni que ditticaon Jesús, tti joixin rajna Nazaret. <sup>6</sup> Co jehe xa joinao xa rrojinchehe xa menos ningona na icha importante. Pero janha na tse na xa co joinaho na rrochjaha na xa castigo inchin jitaxin ley na. <sup>7</sup> Pero Lisias, tti ttetonhe xisoldado, joí co afuerza vantsjeyenanxin na xa. <sup>8</sup> Co cai ndačho ixin chojni que joičho jie de ixin Pablo chonda que joí na nganji soixin. Co si soixin sanchianguihi xí jihi, soixin rrochonxin ixin ndoa tti joičhjan na jie de ixin jehe xa.

<sup>9</sup> Co chojni judío que te na nttiha ngain xigob-ernador cai ndačho na ixin ndoa cain tti ndačho Tértulo. <sup>10</sup> Cottimeja xigobernador joinchehe xa ná señal ngain Pablo ixin nchao rronichja. Co Pablo ndačho:

—Anto chahna ixin soixin tsinhi tti janha rronichja, ixin janha nona que tsje nano soixin rrittetonha ngain nontte jihi. <sup>11</sup> Jai vittja tteyó nchanho que janha cjoí ngain Jerusalén para ixin jointtasayá na Dios. Soixin nchao tsonoha isi andoa ni nahi. <sup>12</sup> Co janha xonhi chojni cjoao co xonhi chojni jointtañao ngain nihngo icha importante, ni ngain icha nihngo, ni ngain iná parte de ciudad mé. <sup>13</sup> Chojni tehe chondaha na quehe rročho na jie de ixin janha ixin janha xonhi jianha jointtaha. <sup>14</sup> Pero tti ján ndoa es que

janha nttasayá Dios inchin nindogoelitona na vanchesayehe na Dios ixin janha nttaha inchin Jesús ttetonha. Mexinxin chojni tehe tendačo na ixin janha rrinttasayá Dios ngain ná manera ojé, pero ndoaha. Ixin janha ditticanho cainxin tti jitaxin ley que vayé Moisés co ditticanho tti ndačo profeté Dios. <sup>15</sup> Janha chonda confianza ngain Dios inchin chojni tehe ixin ditticanho que tti nindadiguenhe rrocjan rroxechon na masqui cjoí na chojni jian o ni nahi. <sup>16</sup> Mexinxin cainxin tiempo janha rinaho nttaha jian ngattoxon con Dios co ngattoxon con chojni.

<sup>17</sup> 'Co canxion nano janha ojoingaria tsje rajna. Cottimeja janha sacjan na ngain Jerusalén ixin janha cjoinha tomi ngain ninoa, co tomi mé tomi vachjana chojni. Co cai sacjan na para ixin rroganjo coxigo para ngain Dios. <sup>18</sup> Co janha cjoí ngaxinhi nihngo icha importante para jointtaha jamé, co ojointtaha inchin jitaxin ley para varihi ná chojni jian ngain Dios. Co are mé canxion chojni judío que joixin nonttehe Asia vicon na ixin janha tarrihi ngaxinhi nihngo mé. Pero tsjeha chojni vehe nganji na co xonhi chojni jointtaña. <sup>19</sup> Icha jian si chojni que vicon na nttiha tsí na nttihi co rročo na jie de ixin janha si rrondačo na ixin janha jointtaha jianha. <sup>20</sup> O que chojni tehe que cai vintte na ngain juzgadoe nihngo rrondačo na quehe cosa jianha xijuez de ngain juzgado ndačo xa ixin janha jointtaha. <sup>21</sup> ¿Apoco janha nichja jianha are janha ndattjan na sén: "Jai soixin ra chonda ra que sinchejuzgana ra ixin ditticanho que tti nindadiguenhe chonda que

rrocjan rroxechon na”?

<sup>22</sup> Are Félix coinhi yá, jehe joinao rronichja na icha pero iná nchanho ixin jehe oconohe jian queḡén nchehe chojni que vaguitticaon Jesús. Co jehe ndache na:

—Are tsí Lisias, tti ttetonhe xisoldado, jehe rrondachjenji na icha de ixin jihi.

<sup>23</sup> Cottimeja Félix coetonhe xicapitán ixin sinchehe xa sigue senda xa Pablo pero coetonha cai ixin rrochjé xa Pablo nchion libertad co cai tsančhanda xa niamigoe Pablo sitsjehe na co sicaohé na Pablo tti sondehe.

<sup>24</sup> Are vatto canxion nchanho cottimeja Félix cjoí ngain Pablo iná. Co joicao čhihi vinhi Drusila que mé ná nčí judía. Co Félix coetonha ixin vayé na Pablo ixin joinao rronichja de ixin queḡén ná chojni sitticaon Jesucristo. <sup>25</sup> Co Pablo ndache Félix ixin chonda que sinchehe ni jian inchin Dios rinao co ixin čhoha sinchehe ni inchin cuerpoe ni rinao co ixin tsí ná nchanho are Dios sinchejuzguehe cain chojni. Co are Félix coinhi cain mé, anto ḡaon co ndache:

—Sattji jaxon. Co are janha rrochonda icha tiempo janha sayaha iná.

<sup>26</sup> Félix ḡaxaon ixin puede Pablo rroganjo tomi ngain para ixin rrocánčhanda. Mexinxin jehe coetonha ixin vayé na Pablo tsje nttiha para ixin cjoao Pablo. <sup>27</sup> Jańá vatto yó nano, cottimeja Félix cointtohe de vehe xigobernador. Co ná xí vinhi Porcio Festo coexinhi vehe gobernador. Co Félix joinaoha ixin chojni judío rrocońao ngain, mexinxin cointtohe Pablo ngain cárcel.



## 25

### *Are Pablo nichja ngain Festo*

<sup>1</sup> Cottimeja Festo joiiji ngain ciudad de Cesarea para ixin coexinhi vehe gobernador. Co are vatto ní nchanho, sacjoixin de ngain Cesarea co cjoí ngain Jerusalén. <sup>2</sup> Nttiha xidána que vaquetonha ngain icha xidána co chojni judío que vechonda joachaxin joičo na jie de ixin Pablo ngain Festo. <sup>3</sup> Co jehe na ocjoao chó na ixin rroanha na xí ixin rrogoen xa Pablo ngatja nttiha. Mexinxin anto joinchetsenhe na ñao Festo ixin rrogayé Pablo ngain Jerusalén. <sup>4</sup> Pero Festo čhoča co joattehe ixin Pablo veaxinhi nttiha Cesarea co jehe řaxaon ixin tsjeha nchanho rrocončjenhe co toin rrocjan nttiha. <sup>5</sup> Co ndache na:

—Nchao nittetoanha ra tsjinha na ngain ciudad de Cesarea co jehe na sičo na jie de ixin Pablo, si jehe joinchehe jianha.

<sup>6</sup> Festo vittohe ngain Jerusalén jeha jni o tte nchanho icha, cottimeja sacjan ngain ciudad de Cesarea. Nchanho yoxin jehe vetaha xintaon que gondehe are vehe gobernador co coetonhe xisolado ixin vayé xa Pablo. <sup>7</sup> Co are Pablo joí, řatte tsje chojni judío que joixin de Jerusalén co chojni mé joičo na jie de ixin Pablo co ndačo na ixin jehe joinchehe anto tsje cosa jianha, pero čhoča joincheguitticaon na Festo que ixin ján seguro Pablo joinchehe jamé. <sup>8</sup> Cottimeja Pablo ndačo de ixin jehe mismo:

—Janha řonhi jianha jointtaha ngain ley chojni judío, ni ngain nihngo icha importante, ni ngain emperador romano.

<sup>9</sup> Festo joinaoha ixin chojni judío rrocoñao na ngain, mexinxin ndache Pablo:

—¿Arinao satsji Jerusalén? Co nttiha janha sinttajuzgaha jaha.

<sup>10</sup> Co Pablo joattehe:

—Jaxon janha rrihi ngain juzgadoe emperador romano co nttihi tti janha jiquininxin soan na juzgado co nahi ngain Jerusalén. Soixin ochonxin que janha xonhi jianha jointtaha ngain chojni judío. <sup>11</sup> Si janha jointtaha jianha co jiquininxin ndasenhe na, janha rronichjaha nahi. Pero si jehe na ndačo na ndoaha de ixin janha, xonhi chojni chonda joachaxin para sinchechienhe na janha ngain na. Janha rinaho que xiemperador ngain ciudad de Roma sinchejuzgana.

<sup>12</sup> Cottimeja Festo cjoao nivacjenguijna vaquetonha, cottimeja ndache Pablo:

—Jaha ndačo ixin jaha rinao que ixin xiemperador sinttajuzgá; mexinxin jaha satsji ngain xa.

### *Are Pablo nichja ngain xirey Agripa*

<sup>13</sup> Canxion nchanho después Agripa xirey co Berenice nchichó xa cjoí Cesarea para ixin joit-sjehe na Festo. <sup>14</sup> Co ixin vittohe na nttiha nchion nchanho, Festo coequin Agripa de ixin Pablo. Co ndache xa:

—Jí ná xí que tti Félix cointtohe ngain cárcel nttihi are janha coexian joarihi gobernador. <sup>15</sup> Are janha cjoí Jerusalén xidána que ttetonha ngain icha xidána co tti xí que ttetonha ngain ningoe chojni judío joičo na jie de ixin jehe xí mé. Co jehe na rinao na ixin janha sinttacondená xa para ndasenhe xa. <sup>16</sup> Co janha ndattjan na ixin ley

romano ndačo ixin čhoča sinchecondená ni ná chojni para ndasenhe antes que chojni mé tsinhi tti rrondačo chojni que joičo jie de ixin jehe. Co cai chonda que chojni mé rronichja de ixin quehe joinchehe jehe are chojni que tjanguihi tsinhi na tti rronichja jehe. <sup>17</sup> Mexinxin are chojni judío joí na nttihi, janha toin nchanho yoxin joaritaha xintaoen xigobernador co vayá Pablo. <sup>18</sup> Janha řaxanho que jehe joinchehe ná cosa anto jianha, pero nijoičo jie de ixin jehe nichjaha na inchin janha řaxanho. <sup>19</sup> Jeho ndačo na ixin jehe diticaonha religioen na. Co nichja na de ixin ná xí vinhi Jesús que ndavenhe. Pero Pablo ndačo ixin xí mé jichon xa. <sup>20</sup> Janha joinonaha quehe rrojinttaha, mexinxin janha joanchianguia Pablo si jehe rinao tsji Jerusalén para soenxin juzgado nttiha. <sup>21</sup> Pero Pablo ndačo ixin jehe rinao Augusto tti emperador sinchejuzguehe. Mexinxin janha coetonha ixin jehe vittohe ngain cárcel hasta que janha nchao rroanha jehe ngain emperador mé.

<sup>22</sup> Cottimeja Agripa ndache Festo:

—Cai janha rinaho tsian tti rrondačo xí mé.

Festo joattehe:

—Ndoe tsinhi tti rrondačo xa.

<sup>23</sup> Co nchanho yoxin Agripa co Berenice vint-tengá lonttoe jian co čhjoin te. Co are chojni anto joinchesayehe na, cayoi na sacjoi na ngaxinhi ná cuarto jie tti vintte tsje nivaquetonhe xisoldado co tsje nivechonda joachaxin ngain ciudad mé. Festo coetonhe xisoldadoe ixin vayé xa Pablo.

<sup>24</sup> Cottimeja Festo ndačo:

—Rey Agripa co cainxin soixin ra que joihi ra, nttihi jí tti xí. Tsje chojni judío ngain Jerusalén co nttihi Cesarea joičo na jie de ixin jehe xa. Co cainxin nchanho ndachjenji na na ixin jehe xa jiquininxin ndasenhe xa. <sup>25</sup> Pero janha xaxanho que jehe xa xonhi joinchehe xa para jiquininxin ndasenhe xa. Co ixin jehe xa joanchia xa que Augusto tti emperador sinchejuzguehe xa, mexinxin janha rrorroanha jehe xa ngain jehe emperadoar na. <sup>26</sup> Pero janha nonaha tti cosa jianha que joinchehe xa para janha nchao rrocjin na joajna ngain emperador. Mexinxin janha vayá xa para soixin ra sicon ra co para rey Agripa sicon co sanchianguihi ra xa tti cosa jianha que joinchehe xa. Jamé puede janha nchao rrocjin na joajna para ngain emperador. <sup>27</sup> Ixin xonhi xé si janha rrorroanha ná tti teaxinhi cárcel co čhoha rrondat-tjan tti cosa jianha que joinchehe.

## 26

### *Are Pablo nichja ngain rey Agripa*

<sup>1</sup> Cottimeja Agripa ndache Pablo:

—Jaha nchao nichja de ixin tti jaha joinchehe jaxon.

Co Pablo vatsín rá para chjé joajna ngain Agripa co coexinhi nichja ngain co ndačo:

<sup>2</sup> —Soixin, anto chahna ixin chjana joachaxin de rronichja nganji soixin de ixin tti jianha que ndačo chojni judío de ixin janha. <sup>3</sup> Co cai anto chahna ixin soixin onoha jian cainxin costumbre de chojni judío co onoha quexehe cosa nchediscutí na. Mexinxin nttatsanha ñao soixin, ttinhi jian tti janha rrondatto.

*Quexén vanchehe Pablo icha saho, antes de que rroguitticaon ngain Jesús*

<sup>4</sup> 'Cainxin chojni judío chonxin quexén janha jointtaha ngayé na ngain rajnana co ngain ciudad de Jerusalén desde janha xa nchín na. <sup>5</sup> Co cai jehe na chonxin na co nchao rronhattjo na soixin, si jehe na rinao na, ixin de osé janha joarihi ná fariseo. Co xifariseo icha dicao cuidado de nchehe cainxin tti jitaxin ley que vayé Moisés que icha chojni judío. <sup>6</sup> Co jaxon janha nttihi rrihi para que soixin rrondaçho ixin janha, ajian na ni jianha na ixin ditticanho que Dios sinchexechon nindadiguenhe inchin ndaço Dios ngain nindogoelitoa na. <sup>7</sup> Cainxin chojni ngain tti tteyó grupoe chojni Israel chonda na confianza ixin Dios sinchexechon nindadiguenhe ixin jañá ndaço. Mexinxin nchesayehe na Dios nchanho co ttie. Co jaxon, canxion chojni judío joiçho na jie de ixin janha ixin janha chonda confianza mé cai. <sup>8</sup> ¿Apoco soixin ra xo judío ra ditticaonha ra ixin Dios sinchexechon nindadiguenhe?

*Icha saho quexén Pablo vanchehe jianha ngain chojni que vaguitticaon Jesús*

<sup>9</sup> 'Icha saho janha vařaxanho ixin janha vanttaha jian are vanttaha feo ngain chojni que ditticaon Jesús, tti joixin rajna Nazaret. <sup>10</sup> Co jañá janha vanttaha ngain ciudad de Jerusalén. Co xidána que ttetonha ngain icha xidána chjana xa joachaxin de coixian tsje chojni que ditticaon Jesús. Co are jehe xa ndaço xa ixin navenxon na, janha cai ndaçhjan ixin nchao vanchehe xa. <sup>11</sup> Anto tsje nttiha janha jointtaha feo ngain chojni

que ditticaon Jesús ixin rinaho que chojni mé irroguitticaonha na Jesús icha. Co jañá vanttaha ngain cainxin nihngo. Co janha anto vacoñaaoa na, mexinxin hasta vacjé chojni mé ngain tsje rajna de oje nontte.

*Pablo nichja iná de ixin quexén jehe coexinhi vitticaon Jesús*

*(Hechos 9.1-19; 22.6-16)*

<sup>12</sup> 'Co are janha vanttaha jamé, janha sacjoi ciudad de Damasco conixin joachaxin de xidána que ttetonha ngain icha xidána. <sup>13</sup> Pero are janha ngatja ntthi ngosine nchanho, janha vicon vinganante na ná xohi que joixin ngajni ngá ntthi que rrittji janha conixin chojni que cjoinha. Co xohi mé anto icha soji xoi que nchanho. <sup>14</sup> Cottimeja cain na vinttji na ngataha nontte. Co janha coian tté Jesucristo nichjaxin nguigoahna hebreo co ndacho: "Saulo, Saulo, ¿quedonda ningaconna co feo nchena? Jaho rritoniha ixin jaha inchin coxinttá are xantoe va con garrocha." <sup>15</sup> Cottimeja janha ndachjan: "¿Quensen, soixin?" Co Jesús, tti chonda cain joachaxin, ndacho: "Janha Jesús tti jaha ningaconhe co feo nchehe ngain. <sup>16</sup> Dingattjen, janha joihi nganji co nichjaha para sinchehe xana. Janha coinchiaha jaha ixin jaha rrondate chojni quexén jaha vicon na janha jai co cai tti janha tsjagoha jaha are jaha sicon na janha icha. <sup>17</sup> Co janha rrorroanha jaha ngain chojni que jaha judío. Co janha tsjenguijna jaha are jaha ngayé chojni judío co chojni que jaha judío para ixin cain chojni mé nasoexonha na. <sup>18</sup> Janha rrorroanha jaha ngayé chojni que

jeha judío para que jaha sinchecoehne na tti ndoa. Jamé jehe na tsinttohe na de nchehe na cosa jianha co tsexinhi na sinchehe na cosa jian. Co jehe na isitticaonha na tti ndačo xijianha, sino que sitticaon na ngain Dios. Co jañá janha sinttat-jañá na cain cosa jianha que nchehe na. Co jehe na sintte na conixin icha chojni que coinchiehe Dios.”

*Pablo vitticaon tti ndačo Jesús*

<sup>19</sup> Mexinxin, soixin, janha vitticanho cain tti ndačo Jesús nganji na are janha vicononxinna. <sup>20</sup> Janha saho nichja ngain chojni ngain ciudad de Damasco. Cottimeja nichja ngain chojni ngain ciudad de Jerusalén, cottimeja nichja ngain chojni ngoixin nonttehe Judea co ngain chojni que jeha judío. Janha ndattjan cain chojni mé ixin tsen-toxinhi na vidé na co sincheha na cosa jianha, sino que sinchehe na cosa jian inchin Dios rinao para tsjagoe na icha chojni que ndoa jehe na coentoxinhi na vidé na. <sup>21</sup> Co canxion chojni judío tse na janha ngain nihngo ixin janha nichja jamé. Co chojni mé joinao rrogoen na janha. <sup>22</sup> Pero Dios cjoenguijna na, mexinxin janha xa rrinichja cain tti janha vicon ngain chojni noa co ngain chojni rico, co cainxin tti janha nichja jí de acuerdo conixin cain profeté Dios co Moisés dindačo ixin chonda que tsonhe. <sup>23</sup> Co cain nimé dicjin na ixin Cristo chonda que anto tangui tsonhe co ixin Cristo ndasenhe co rroxechon icha saho de cainxin chojni que ndadiguenhe. Co jañá tti Cristo tsjagoe chojni judío co chojni que jeha judío ixin ndoa jehe nchao danjo ngain cain chojni iná vida naroaxin.

*Pablo joinao ixin rey Agripa rroguitticaon Jesús*

<sup>24</sup> Are Pablo jinichja cain yá de ixin jehe, Festo ndačho sén:

—¡Pablo, jaha ndadixenga! Jaha dixantte ttjelea ixin anto coangui xón.

<sup>25</sup> Pero Pablo joattehe:

—Nahi, soixin, janha dixengaha na. Cainxin tti janha ndačhjan ndoa. <sup>26</sup> Co nttihi jí rey Agripa. Jehe chonxin cain yá. Janha nichja ngain jehe conixin confianza ixin nona que jehe ochonxin cain tti janha ndačhjan. Ixin cain tti ndačhjan janha ndoa conhe ngattoxon con tsje chojni.

<sup>27</sup> Cottimeja Pablo ndache rey Agripa:

—Soixin, ¿aditticaon tti dicjin profeté Dios? Janha nona que soixin ditticaon.

<sup>28</sup> Cottimeja Agripa ndačho:

—Ngain nchion tiempo jihi ¿axaxaon ixin sincheguitticaon na Jesús?

<sup>29</sup> Cottimeja Pablo ndačho:

—Masqui nchion o tsje tiempo, anto jian si soixin co cain icha chojni nttihi que tettinhi tti janha rrinichja sitticaon ra co sintte ra inchin janha. ¡Pero nahi siatthea ra conixin cadena inchin janha!

<sup>30</sup> Are Pablo joexin nichja cain yá, xirey, xigob-ernador, Berenice co cain icha chojni que te nttiha vingattjen na, <sup>31</sup> co vačhjexin na de cuarto co coexinhi na cjoao chó na co ndačho na:

—Xí jihi xonhi cosa jianha joinchehe xa, mexinxin jiquininxinha xa ndasenhe xa ni jiquininxinha xa siaxinhi xa cárcel.

<sup>32</sup> Co Agripa ndache Festo:



—Si xí jìhi rrondačhoha xa ixin rinao xa que xiemperador sinchejuzguehe jehe xa, ján na nchao rrogantsje na xa de cárcel.

## 27

### *Are rroanha na Pablo para Roma*

<sup>1</sup> Cottimeja jehe na cjoao chó na co rroanha na na janha na para nonttehe Italia. Co are mé jehe na ndache na ná xicapitán que vinhi Julio ixin sajoicao xa Pablo conixin icha nivintteaxinhi nttiha. Jehe Julio cjoì xicapitén ná grupoe xisoldado vinhi Augusto. <sup>2</sup> Cai ná xí vinhi Aristarco que joixin xa de ngain ciudad de Tesalónica ngain nonttehe Macedonia cjoì xa conixin janha na. Coá na ná barco que joixin ciudad de Adramitio. Co barco mé vehe listo sajittji barco ngain canxion rajna ngain nonttehe Asia. <sup>3</sup> Co nchanho yoxin joaso na ciudad de Sidón. Julio joinchehe jian ngain Pablo co coančhanda Pablo vanianxin de barco co joitsjehe niamigoe nttiha co coančhanda niamigoe Pablo chjé na jehe tti gondehe. <sup>4</sup> Cottimeja janha na sacjoixin na de nttiha ngain barco. Anto soji jìtja čhintto, mexinxin janha na vatto na nontte ngosine ndachaon dinhi Chipre ngain lado cjon ixin nttiha čhintto mé icha sojiha čhintto. <sup>5</sup> Cottimeja vatto na ndachaon chian nonttehe Cilicia co nonttehe Panfilia. Co joaso na ciudad de Mira ngain nonttehe Licia.

<sup>6</sup> Nttiha xicapitén xisoldado vittja xa ná barco que joixin ciudad de Alejandría co barco mé sajittji ngain nonttehe Italia. Jehe xa coetonha xa ixin janha na coá na barco mé para jointtaha sigue

sacjoi na. <sup>7</sup> Co canxion nchanho sacjoi na anto yao co anto tangui joaso na chian rajna Gnido. Anto soji čhintto co čhoča sacjoi na nao icha, mexinxin vatto na chiaon rajna Salmón ngain nontte ngosine ndachaon dinhi Creta ixin nttiha čhintto icha sojiha. <sup>8</sup> Anto yao vatto na ngoixin nontte mé hasta joaso na ná lugar chian rajna Lasea. Co lugar mé anto nchao para cainxin barco dintengattjen barco nttiha, mexinxin dinhi Buenos Puertos.

<sup>9</sup> Are mé ovatto canxion semana hasta joaso na lugar mé, co anto chiaon tiempoe quin are anto soji čhintto. Mexinxin Pablo nichja tti řaxaon <sup>10</sup> co ndačo:

—Janha ndattjo ra ixin anto tangui tsoan na isi satsji na icha. Barco jihi rroxantte ixin anto soji tseto jinda. Co barco co cargue sitján. Co anto peligro para cain na ján na cai.

<sup>11</sup> Pero xicapitén xisoldado icha joinchehe xa caso tti ndačo xí que vagueca barco mé co tti ndačo xí que coehna barco mé. <sup>12</sup> Co masqui lugar tti vintte na anto nchao para cainxin barco vaguengattjen, nchaoha nttiha para barco vaguitttohe ngoixin tiempoe quin are anto soji čhintto. Mexinxin merocoa cainxin chojni řaxaon ixin icha jian janha na sacjoixin na de nttiha. Jehe na joinao na rrogaso na ngain ciudad de Fenice ngain řajeho nontte mé para rrogatto na tiempoe quin are anto soji čhintto, ixin ngain ciudad mé veva čhinttoe norte ni čhinttoe sur.

*Are coeto ndachaon soji*

<sup>13</sup> Cottimeja jói ná čhinttoe sur que sojiha čhintto danto, co jehe na řaxaon na ixin nchao

satsji na icha. Mexinxin janha na sacjoixin na de lugar mé co sacjoi na anto chiaon ngandehe ndachaon čhiqué nontte ngosine ndachaon que dinhi Creta. <sup>14</sup> Pero nchion después joí ná čhintto anto soji que joixin nontte mé co vinhi čhintto Nordeste. čhintto mé anto soji joinchenguittjen čhintto barco mé. <sup>15</sup> Co čhintto mé coančjandaha barco para sacjoi nao, mexinxin tti veca barco ndajoinchengattonoa barco. Cottimeja coančjanda ixin čhintto veca barco mé. <sup>16</sup> Co vatto na ná nontte nchín que jí ngosine ndachaon que dinhi nontte Claudia. Co nttiha čhintto mé joinchenguittjenha barco soji inchin icha saho. Mexinxin masqui tangui, janha na nchao vantsje na ná lanchachjan de ngataon jinda tti jičhoanito barco para xantteha lanchachjan mé. <sup>17</sup> Co joaqué na lanchachjan mé ngaxinhi barco. Cottimeja coiattehe na barco conixin jino jieto. Co joaqué na jino mé čhinguíhi barco para ixin barco rroxantteha. Co anto řaon na ixin řaxaon na puede barco satsji ngain lugar vinhi Sirte, tti jí tsje nchise co ningaha jinda. Mexinxin jehe na joinchegania na manta jie que joinchegonda čhintto para deca barco. Cottimeja barco mé sacjoi lado jitjaxin čhintto. <sup>18</sup> Co nchanho yoxin řa anto soji čhintto, mexinxin jehe na coexinhi na vancajinhi na barco cargué barco čhinguí ndachaon para ixin barco setsinganguíha jinda ixin anto soji coinguittjen jinda. <sup>19</sup> Co nchanho ninxin janha na conixin rana na vancanguixin na jinda tsje cosa tti nchexin na řa ngaxinhi barco. <sup>20</sup> Tsje nchanho janha na viconha

na ni nchanho ni conotse. Co janha na xaxanho na ixin ndarroguenhe na nttiha ixin xa anto soji coinguittjen ndachaon co chintto.

<sup>21</sup> Co are vatto tsje nchanho que jehe na joineha na, Pablo vingattjen ngagué na co ndacho:

—Icha jian isi jaha ra rroguitticaon ra tti janha ndattjo ra icha saho. Icha jian isi rrocjixinha na de Creta. Pero jai cainxin cosé barco ndavitján.

<sup>22</sup> Co jaxon janha ndattjo ra ixin taha ra joachjaon, ixin masqui barco jiji sitján, pero xonhi chojni ndasenhe. <sup>23</sup> Jamé nona, ixin are naxin xehe joí nganji na janha ná ángel Dios, tti ttetonna co janha rrinttaha xé jehe Dios mé.

<sup>24</sup> Co ángel mé ndachjenji na: “xaonha, Pablo, ixin jaha chonda que satsji ngain emperador romano. Co ixin Dios anto rinao jaha, ni ná chojni conixin jaha ngaxinhi barco jiji ndasenhe.” Jañá cho ángel Dios.

<sup>25</sup> Mexinxin taha ra joachjaon ixin janha chonda confianza ngain Dios co ditticanho ixin cainxin cosa tsonhe inchin ndacho Dios. <sup>26</sup> Pero seguro que masqui barco rroxantte, pero ján na saso na ngain ná nontte.

<sup>27</sup> Jañá vatto yó semana de chintto. Cottimeja ná ttie joaso na ngain parte de ndachaon que vinhi Adria. Co johó chintto veca barco mé. Co ngosine ttie mé, jehe nitenda na barco vicon na ixin barco mé ojoiji barco chiaon de ngain tti jí jinche. <sup>28</sup> Jehe na vattechoha na jinda para chonxin na que xén ningaxin vehe jinda mé. Co jinda vechonda nda treinta y seis metros nttiha. Co are vatto na nchion icha, cjan na vattechoha na jinda iná co nttiha vechonda veintisiete metros. <sup>29</sup> Co ixin jehe na xaon

na ixin puede barco rroxantte ngataha x̄o, mexinxin vancahngui na jinda nó chia yeye conixin jino para ixin coengattjen na barco mé. Co jehe na anto joinao na jaca rrojingasán. <sup>30</sup> Nivinttenda barco joincheḡaxaon icha chojni ixin jehe na tedancahngui na icha chia jinda conixin jino nojixin barco. Pero jeho joincheyehe na na ixin joinao na sarroquina na de ngain barco ngaxinhi lanchachjan. <sup>31</sup> Cottimeja Pablo ndache xicapitán co xisoldadoe:

—Si xí que tericao barco jiji sittoeha xa ngaxinhi barco, jaha ra ndasenne ra čingui jinda.

<sup>32</sup> Mexinxin xisoldado cončhinji xa jinoe lanchachjan icha saho que xí que tericao barco vengá lanchachjan mé. Co sajoıcao jinda lanchachjan mé.

<sup>33</sup> Co are ojidingasán Pablo ndache cain na:

—Icha jian isi jaha ra sintte ra ixin vatto yó semana co x̄onhi jointte ra ni vinttečina ra.

<sup>34</sup> Mexinxin jintte ra para ixin rrochonda ra fuerza. Co taha ra joachjaon ixin x̄onhi tsonha ra ni tsoniaha ra.

<sup>35</sup> Co are joexin nichja Pablo cain yá, jehe tse ná niottja co chjé gracias ngain Dios are cainxin chojni coinhi na. Cottimeja jehe cončhinji niottja mé co coexinhi joine nio. <sup>36</sup> Cottimeja cain na goan na animado de ixin tti ndačo Pablo, co jehe na cai joine na. <sup>37</sup> Co janha na vintte na doscientos setenta y seis chojni ngaxinhi barco mé. <sup>38</sup> Co are joexin joine na niottja mé co ocojehe na, coexinhi na vancahngui na trigo ndachaon para ixin itsonontteha barco čingui jinda.

*Are xantte barco*

<sup>39</sup> Co are vingasán, jehe nitericao barco chonxinha na nontte ngosine ndachaon tti joaso na. Pero vicon na ná lugar ngandehe nontte mé ttinó jinda ijittinguittjenha nda co tti ojí nchise. Jehe na joinao na rroguca na barco nttiha, si nchao. <sup>40</sup> Cottimeja jehe na cončhinji na jinoe chia yeye que coengattjenxin na barco co vittohe chia čingui jinda. Cottimeja coxindanguehe na direccioen barco čingui jinda que jehe na gondehe na para ixin veca na barco mé nao. Cottimeja jehe na vatsín na manta jie ngain já barco para ixin čhintto nchao veca čhintto barco mé. Cottimeja barco sacjoi ngain lugar tti ijittinguittjenha jinda. <sup>41</sup> Pero sacjoi na ngain lugar tti jinda vetanxin chó nda. Co jinda tse nda barco co sajoicao nda ngain ná jnanchjan de puro nchise čingui jinda. Co já barco mé čoha vačhjexin de nttiha. Co noton barco mé coexinhi xantte ixin anto soji goen jinda. <sup>42</sup> Rato mé xisoldado řaxaon xa ixin narrogoenxon xa tti vintteaxinhi ixin řaon xa que puede tti vintteaxinhi nchao sarroquina na are oviji na ngataha nontte xema. <sup>43</sup> Pero xicapitán joinaoha xa ixin Pablo ndasenhe, mexinxin coančjandaha xa xisoldadoe xa goen xa tti vintteaxinhi; sino que coetonhe xa cain chojni que onohé nchenadá rročhinca na ngain jinda hasta siji na ngain nontte xema. <sup>44</sup> Co cai coetonhe xa cain chojni que noeha nchenadá ixin queřén satto ngataonhe jinda ngataha nttatablé barco co ngataha icha cosé barco. Co jañá cain na joaso na tti xema nontte co řonhi conna na.

## 28

### *Are Pablo ngain nonttehe Malta*

<sup>1</sup> Co are cain na joaso na nontte, coian na ixin nontte mé dinhi Malta. <sup>2</sup> Co chojni nttiha coiaconoana na. Jehe na joinchechjian na ná xohi jie ixin anto quin co ixin jittí čhin. Cottimeja ndachjenji na na ixin rroxixona na ngandehé xohi mé. <sup>3</sup> Pablo tse ná manojó de nttaniho co joaquehe nttá ngataha xohi. Co rato mé ná conché vačhjexin va de ngacjan xohi mé ixin anto soa co joinehe va rá Pablo co taveriahnda va nganito rá Pablo. <sup>4</sup> Are chojni que joixin nontte mé vicon ixin conché mé taveriahnda va nganito rá Pablo, jehe na ndache chó na:

—Seguro xí jihí ná tti doen chojni. Co masqui ndavenha xa ngain ndachaon, pero chonda que ndasenhe xa ixin joinchehe xa jianha.

<sup>5</sup> Pero Pablo contsenga rá co vanca va ngatto xohi. Co xonhi conhe Pablo. <sup>6</sup> Co chojni que joixin nontte mé chonhe na para ixin rroguicon na rrogatjoe rá Pablo o que rato mé ndarroguenhe Pablo. Pero chonhe na sé co Pablo xonhi conhe, mexinxin xaxaon na oje co coexinhi na ndačo na ixin Pablo ná dios.

<sup>7</sup> Ná xí vinhi Publio vaquetonhe nonttehe Malta. Jehe xa chonda xa jnguihi xa chiaon tti janha na texixona na, co jian vayahna na xa ngaxinhi nchiandoha xa ngoixin tti ní nchanho que vintte na nttiha. <sup>8</sup> Tiempo mé ndodé Publio tavetsinga ndo ngataha saoen ndo ixin anto vechonda ndo soa co anto vechonda ndo diarrea. Pablo sacjoi joitsjehe ndo. Jehe tsín rá ngataha ndo co joinchecoanxinhi Dios. Co jehe ndo xingamehe ndo. <sup>9</sup> Cottimeja

cainxin chojni nihi ngain nontte mé joí na ngain Pablo co cain jehe na xingamehe na. <sup>10</sup> Co anto tsje cosa joinchettogna na na. Co are janha na sacjoi na, jehe na cjoenguijna na na jointtaca na iná barco cain cosa mé.

### *Are Pablo joihi Roma*

<sup>11</sup> Are vatto ní conittjao que janha na vintte na ngain nontte mé, coá na iná barco que nttiha vehe ngoixin tiempo quin are anto soji čhintto. Co barco mé joixin de ngain ciudad de Alejandría. Co ngain nojaxin barco mé vintte yó retratoe dios, ná vinhi Cástor co ná vinhi Pólux. <sup>12</sup> Co ngain barco mé sacjoixin na de nonttehe Malta que jí ngosine ndachaon co joaso na ciudad de Siracusa. Vittona na nttiha ní nchanho. <sup>13</sup> Cottimeja sacjoixin na de nttiha co sacjoi na chiaon ngandehe ndachaon hasta joaso na ngain ciudad de Regio. Co nchanho yoxin coexinhi cjoa ná čhinttoe sur, mexinxin janha na sacjoi na norte co ndoexin joaso na ngain ciudad de Puteoli. Nttiha vanianxin na de barco. <sup>14</sup> Nttiha janha na vetan na canxion chojni que vaguitticaon na ngain Jesús, co jehe na vayahna na na ngain nchiandoha na para ngoixin ná semana. Cottimeja janha na sacjoi na para ciudad de Roma. <sup>15</sup> Co chojni que vaguitticaon Jesús ngain Roma coinhi na de ixin janha na. Mexinxin vačhjexin na de ciudad mé co vetan na na ngatja nttiha. Canxion na sacjoi na hasta ngain rajna Foro de Apio co icha na sacjoi na hasta ngain lugar que dinhi Tres Tabernas para vetan na na. Co are Pablo vicon na, jehe chjé gracias ngain Dios co goan animado. <sup>16</sup> Are joaso na ngain Roma, xicapitán joanjo xa tti



vintteaxinhi ngain xivaquetonha cárcel de Roma. Pero jehe xa joanjo xa joachaxin que Pablo vittohe ngain ná nchia, jehe conixin nacoa xisoldado para venda xa.

*Are Pablo joinchecoenhe chojni de ixin Dios ngain Roma*

<sup>17</sup> Are vatto ní nchanho de joaso na Roma, Pablo rroanha joajna cainxin nivaquetonha chojni judío que vintte na nttiha Roma ixin xatte na ngain jehe Pablo. Cottimeja Pablo ndačo ngain na:

—Hermanos, masqui janha xonhi jianha joint-taha ngain chojni judío ni ngain costumbre que chonda na de ngain nindogoelitoa na xančhjen, pero masqui jamé coiaxinna na nttiha Jerusalén co joanjo na na ngá rá chojni romano. <sup>18</sup> Co chojni romano anto cjoao na co ndačo na ixin janha jiquininxinha ndasenhe na. Mexinxin jinao na rrocančhjanda na na rrogačhjexin de cárcel. <sup>19</sup> Pero chojni judío čhoha na. Mexinxin janha chonda que joanchia ixin xiemperador sinchejuz-gana janha masqui chondaha ni ná cosa jianha para rronichja de ixin chojni judío. <sup>20</sup> Mexinxin janha vayaha ra ixin janha rinaho sicon ra co rronichjaha ra ixin jaxon janha rričoaxin cadera jehó ixin janha ditticanho ngain jehe tti techonhe cain chojni judío.

<sup>21</sup> Cottimeja jehe na ndache na Pablo:

—Janha na xonhi joajna vayá na de ngain nont-tehe Judea de ixin soixin. Co xonhi chojni judío que joixin nttiha nichja jianha de ixin soixin.

<sup>22</sup> Pero janha na nona na ixin ngain cainxin lugar

te chojni que anto coñao ngain chojni que ditti-caon Jesús. Mexinxin janha na anto rinaho na tsian na tti rrondachjenji ni ra soixin.

<sup>23</sup> Cottimeja jehe na coín na ná nchanho para ixin jehe na xatte na iná. Co nchanho mé jehe na co anto tsje icha chojni xatte na ngain nchia tti vehe Pablo. De vingasán hasta ttie Pablo ndache na de ixin quexén Dios ttetonha. Pablo joinao ixin cain chojni mé rrochonxin na quensen Jesús, mexinxin conixin ley que vayé Moisés co xón que dicjin profeté Dios Pablo cjoagoe chojni de ixin quensen Jesús. <sup>24</sup> Co canxion chojni vitticaon na tti ndačo Pablo co icanxin na čoha vitticaon na. <sup>25</sup> Co ixin vintteha na de acuerdo, sacjoi na cada na nchiandoha na. Cottimeja Pablo ndačo:

—Anto ndoa tti ndačo Espíritu Santo ngain nindogoelitoa na are nichjé Isaías co ndačo:

<sup>26</sup> Sattji ngain chojni tehe co ndache na:

Jaha ra ján tsinhi ra, pero tsinxinha ra.

Jaha ra ján sicon ra, pero rrochonxinha ra quehe rročo tti sicon ra;

<sup>27</sup> ixin ansean ra anto concha

co rinaoha ra tsinhi ra

co coejehe ra jmacon ra

para que siconha ra conixin jmacon ra

ni tsinhi ra conixin ndatsjoan ra,

ni tsinxin ra ngain ansean ra

ni tsentoxinhi ra vidá ra para que janha sint-taxingamaha ra.

<sup>28</sup> Co cai Pablo ndačo:

—Mexinxin chonxin ra ixin Dios de jai pa ndaha sanjo joachaxin ngain chojni que jaha judío ixin sitticaon na Jesús co jehe sinchetjañehe na cosa

jianha que nchehe na. Co chojni mé sinao na tsinhi na cain tti ndačo Dios.

<sup>29</sup> Co are joexin nichja Pablo cain yá, sacjoi chojni judío co anto joinchediscutí na de ixin cain yá.

<sup>30</sup> Co Pablo vittohe nttiha yó nano ngain nchia que joincherentá. Co vayé quexeho chojni vacji nchiandoha. <sup>31</sup> Co Pablo nichja de ixin quexén Dios ttetonha. Co joinchecoenhe chojni de ixin Jesucristo, tti chonda cain joachaxin. Co xonhi chojni cayacoen Pablo para nichja joajné Dios.

## **Tti jian joajné Jesucristo New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

### **Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Popoloca, San Marcos Tlalcoyalco

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a23ba35e-b016-5f67-a705-694e460cf18a